

醫學生叢書之一

二十二年來中日之關係



東 北 喪 朋  
 乃 終 有 慶  
 安 貞 之 吉  
 應 地 無 疆

上海中華書局印行

民國十六年五月九日發行  
民國十七年五月九日發行



(學生叢二十一年來之中日關係)

△ 全一冊定價銀三角



編輯者 中華書局

校閱者 長沙黃鴻壽

發行者 中華書局

印刷者 中華書局

印刷所 中華書局

上海靜安寺路二七七號

總發行所 上海棋盤街 中華書局

分發行所 中華書局

北京 天津 奉天 廣州 長沙 開封 溫州 長春  
漢口 南昌 南京 杭州 濟南 保定 武昌 太原  
常德 福州 成都 重慶 雲南 徐州 西安 汕頭  
沙市 蘭州 衡州 貴陽 吉林 潮州 安慶 桂林  
東昌 廈門 邢台 綏化 煙台 鄭州 梧州  
石家莊 黑龍江 張家口 新加坡

劄

史仲瑾曰。讀中日二十年來交涉史。而不惻然以悲。毅然以奮者。必非血性人也。東亞之大邦。厥爲中日。車同軌。書同文。往古弗論已。論其近者。試挈二十年前之中日。與今日之中日較。其相去果何如。昔也。非直平等。或猶過之。今也。求爲邾魯之相附。抑又不逮。悲夫。悲夫。疇則使之然哉。吾不能不痛恨於甲午一役。甲午之役。我則無罪。我有疆土。日則侵之。我有藩屬。日則齧之。遂爲封豕長蛇。以薦食上國。迨黃海之師。旣覆而我。龐然舊邦。遂爲世界禁巒。而瓜分之議起矣。自是厥後。割土租地。無復寧歲。內鬩繼之以興。是故不有甲午。無以有戊戌之遏。新機不有戊戌。無以有庚子之戕。國脈迭相爲因而危。機四伏。警耗頻仍。幾於不國。雖然。使能以經過者爲止境。不復更有所觀。覩則亦何樂乎舊事。重提誠有以知其不能也。曩者外兵深入國門。而不欲有所侵。割爲均勢。故今歐戰旣亟。不均於西。何有於東。異時干戈底定。移其西征之銳。轉旆東指。亡固無日。抑尤有可懼瀛島之力。

不。足。以。支。西。來。師。旅。勢。尤。必。伸。手。於。大。陸。而。與。我。中。土。發。生。之。關。係。且。愈。益。滋。多。  
國。民。將。何。以。審。處。之。也。謀。國。者。在。彰。往。而。知。來。我。不。自。弱。於。強。敵。乎。何。有。故。由。強。  
而。之。弱。必。有。其。所。以。弱。由。弱。而。之。強。必。有。其。所。以。強。審。乎。強。弱。之。所。以。殊。勢。而。毋。  
忘。前。車。之。所。當。戒。斯。亂。國。理。矣。是。編。起。甲。午。迄。日。俄。之。戰。源。委。具。在。可。以。觀。焉。凡。  
我。青。年。異。時。學。成。致。用。則。執。干。戈。而。衛。山。河。者。非。異。人。任。覽。此。其。亦。可。以。興。感。云。  
自。日。俄。之。戰。以。至。於。今。不。載。也。蓋。猶。莫。知。其。所。屆。誠。欲。他。日。措。置。得。宜。發。揚。我。神。  
州。之。光。也。則。在。今。日。國。民。之。自。強。焉。耳。矣。

學生叢書之一  
二十年來之中日關係

目錄

緒論

第一章 中日之戰

第一節 中日之交通及日本侵略之開始

第二節 中日兩國與朝鮮之關係及日本強認朝鮮爲獨立國致釀成中

日失和之原因

第三節 中日開戰前之形勢

第四節 中日交戰及未宣戰前中國之受創

第五節 中國陸軍之敗績

第六節 中國海軍之敗績

第七節 中日媾和之波折

第八節 日本提出條約之酷烈及中國之損害

第九節 俄德法三國之干涉與遼東之返還

第十節 中日戰爭之結果爲列強分割中國之開端

## 第二章 拳匪之禍

第一節 拳匪之略歷

第二節 滿清政府崇尚拳匪之原因

第三節 拳匪排外時之勢燄

第四節 各國軍隊之聯合及攻陷占領各地與清室西狩之情形

第五節 東三省與俄國開戰及被俄軍之占領

第六節 各國公使於議和前之協商及英德協約

第七節 北京媾和

第八節 中俄密約及英日同盟

## 第三章 日俄之戰

第一節 俄國滿洲撤兵之違約及制限日本對於朝鮮之勢力

第二節 日俄開戰前之交涉

第三節 日俄開戰時中國宣告中立及日本乘機與朝鮮訂保護協約

第四節 日俄交戰

第五節 日俄媾和

第六節 日俄媾和後中日締結滿洲善後協約及日本勢力之膨脹

學生叢書之一 二十年來之中日關係

緒論

扶桑旭日。照耀寰瀛。持東洋之霸權。爲亞陸之盟主。誠決決大國之風哉。然論其幅隕。無吾二萬萬方里之廣也。稽其戶籍。無吾四百兆民族之衆也。而吾中國獨忍垢蒙辱。箝口結舌。以俯受其裁制。而不敢與較者。抑又何也。吾知當軸者必曰。日本之稱雄也久矣。甲午之後。吾國爲其所挫衄。卒以割地償金。貽莫大之辱。其國威之伸張。蓋雖以雄視亞歐之俄羅斯。而亦一戰敗者。不復與抗。今吾國國基甫定。內治未修。更何事開釁端於強敵。以自取決裂哉。斯言也。彼固以爲持穩健主義。聯與國歡心者也。吾則謂正惟甲午一役。爲吾國由衰而將亡之機。亦惟甲午一役。爲日本對我得寸進尺之漸。自海禁開通以後。如鴉片煙之役。而有南京條約。英法聯軍入京之役。而有中英中法天津條約。中英北京條約。俄國占領黑



龍江與烏蘇里江伊犁各役。而有愛璦條約。天津條約。北京續約。伊犁條約。雲南瑪加利一案。而有芝罘條約。他若琉球之夷於日。安南之喪於法。緬甸之併於英。無不喪權辱國。爲天下笑。然當其時歐美列強尙未至公然倡瓜分之說者。則以吾國土地之廣。人民之衆。無敢爲首先發難耳。迨甲午一戰。吾國國威墮落。不可復振。其荏弱之眞象。遂顯豁呈露於人前。始也棄朝鮮。割臺灣。以饜日本之所欲。繼也俄法英德。卽羣起效尤。於是各劃定其勢力範圍。利益範圍。而旅順口。大連灣。威海衛。膠州灣。廣州各口灣。九龍半島。諸租借條約。乃紛紛出見矣。其路礦權之許與者。更指不勝屈。誰爲戎首。而使中國竟日日爲人所宰割。則日本爲列強先河之導。抑又何疑。厥後因拳匪肇禍。而發生中俄密約。此尤爲日本朝野所痛心疾首。而不能不與俄國一決雌雄者也。及波子瑪斯條約。今日北京新約。告成。而南滿全部。東蒙一部。遂逐漸拍入日人之掌握。顧猶美其名曰保全中國領土。維持東亞平和。此雖五尺之童。當亦共見。司馬氏之心矣。蓋彼所謂保全中國領

土者以中國領土爲其所有而保全之俾確立其盟主之地位也維持東亞平和者屏絕列強勢力於東亞區域之外彼得從容以處分乃公事也嗚呼中國嗚呼中國主權讀杜牧之罪言揮賈生之熱淚吾國民其能忍而與之終古耶故論中國最近外交史者以甲午一戰爲一大樞紐自有此役而拳禍後俄國之占領東三省與夫日俄之戰皆屬因果相生顯然有蛛絲馬跡之可按越此三役而日人在中國之勢力益無限制中國奄奄欲斃之狀態亦益無從掩飾於是乘歐洲戰事各國均勢中國之局停止時復以全力迫中國承認此次新約貽中國以將來無窮之大患吾中國其何以堪茲特搜羅此役之事實輯成此編以見中國之有今日者皆日人早有以促成之也至今日之以朝鮮處吾以埃及印度視吾則尤其數十年處心積慮所表見者也天下興亡匹夫有責願讀是編者奮然興起圖救將來也

## 第一章 中日之戰

第一節 中日之交通及日本侵略之開始

中國秦始皇時。惑於方士言。遣徐福赴海上求三神山。說者謂卽中日兩國交通之始。又越百年。漢武帝滅朝鮮。日本始有驛使通中國。當時史氏稱爲倭奴。或稱倭國。迨唐貞觀時。始有日本國之名。先是晉宋齊梁隋各朝。日本亦屢次遣使來聘。後因唐太宗德威遠被。日人喁喁向化。故二百年間。使節來華。十有餘次。昭宗以後。政教不修。交通遂斷。五代及宋。惟僧侶商船。私渡中國。國交彼此皆絕。嗣元世祖欲招致之。兩次遣使往。一逐還。一斬之。復兩次發兵攻日。皆無功。及末次中途遇颶。全軍覆沒。於是倭禍遂終。元明兩代。爲沿海各省之患。雖當明成祖之世。日本曾受中國冊封。上書稱臣。然彼特藉此以博貿易之利耳。嘉靖中海警尤亟。後經總兵官俞大猷。戚繼光等。力挫其鋒。倭勢始衰。然中國人性質柔弱。已久爲其所窺見。於是彼大政大臣豐臣秀吉。遂有覆韓侵明之舉。在萬曆十四年設非秀吉病歿。德川家康起而執政。一矯秀吉所爲。則朝鮮滅國之禍。已不必待至二十世紀。

時矣。滿清入關以後。彼此雖無正式交涉。然沿海無警。中國人之經商於日本者。一如往昔。惟康熙二十七年。以限制中國商船入港。逐年減少貿易不少。迨明治維新。與西洋各國結通商條約。中國人亦得援例在彼雜居貿易。維時中國已大開口岸。日本亦遂援利益均沾之說。於同治十年。派伊達宗城、原前光爲正副使。來我國修好。朝命李鴻章與訂約於天津。翌年。日本復遣副島種臣爲特命全權大使。來議改約。於十二年四月。約成互換。計修好規條十八條。通商章程三十三款。規定日本得置領事於中國所開口岸。乃踰年四月。而臺灣生番戕害琉球難民。日本派兵至臺之事以起。

琉球在中國福州正東一千七百里。係合數島嶼而成國。史稱爲中山王。自明太祖以來。卽臣服中國。世受冊封。賜其姓尙。然至萬曆時代。已爲日人干涉其財政。且責令其世子年及十五歲時。應赴日本鹿兒島遊歷。蓋事實上早成爲中日兩國之屬國矣。同治十三年。琉球有遭風難民五十四名。漂至臺灣。被生番牡丹族

所殺。日本遂藉此以實行其侵略主義。一方面向臺灣出兵。一方面由其換約全權大使副島種臣。遣副使柳原前光。詣我總理衙門。提出琉球難民被害事件。並問生番是否屬於中國版圖。而大臣毛昶熙董恂等答以二島俱我屬土。屬土之人相殺。裁決在我。不煩貴國過問。且臺灣生番。向在化外。未便窮治云云。前光歸白狀。日人卽直認生番之地非中國版圖。派兵征臺。各社番民紛紛降服。勢如破竹。維時中國政府知前日之失言。頓翻前議。要求日本撤兵。不許。遂派兵援臺。兩國之交。已將中絕。後得英公使調停。中國政府遂與日本參議大久保利通締結中日和約。最重要者爲第一條。有日本國此次所辦。原爲保民義舉。清國不指以爲不是等語。寥寥數語而已。默認琉球版圖爲日本所轄矣。厥後光緒五年閏三月。日本滅琉球。夷爲沖繩。我國與爭不理。

第二節 中日兩國與朝鮮之關係及日本強認朝鮮爲獨立國致釀成中

日失和之原因

註。中國歷史稱朝鮮爲高句麗。或稱爲高麗。中復有馬韓、弁韓、辰韓之分。新羅、百濟之別。明太祖時。彼國疆域統一。始改國號曰朝鮮。至滿清光緒二十二年。又改國號曰大韓。然朝鮮之名。實始於周武王封箕子於遼東之時。厥名最古。故文中統以最古之名稱爲標準。

朝鮮對於中國。叛服不常。至明清以來。始世受冊封。朝貢不絕。其於中國有宗屬關係。不但史冊昭然。卽海禁開通以後。亦爲列強所公認者也。其於日本。則三韓時代。曾經日本崇神天皇。賜弁韓國號曰任那。又神功皇后。亦曾於辰韓地之新羅國。遣兵征服。其馬韓地之百濟國。後亦貢獻於日。三韓均爲日本屬國。在中國漢晉時

自唐以後。復脫離日本關係。胡元時。且起兵四萬。戰艦九百。以爲元世祖征日之應援。迨至明初。朝鮮恭讓王始與日本對馬島島主宗氏結通商條約。定釜山浦。乃而浦鹽山浦爲兩國貿易口岸。萬曆時。日本大政大臣豐臣秀吉。假道朝鮮。驅其兵以躡明地。朝鮮昭敬王不許。且舉以告明。並大修城池。以待日軍。秀吉大怒。

起兵往攻朝鮮。自對馬島上陸。北向漢陽。朝鮮八道幾盡沒。日本軍旦暮且渡鴨綠江。明雖三遣援。皆敗績。旋因秀吉病卒。德川家康起而執政。欲修隣好。乃遣對馬島主宗義智往朝鮮。朝鮮亦遣使赴日報聘。自是兩國通商遣使不絕。朝鮮當英孝王在位之時。正日本倡尊王攘夷之論。兩國使聘因之中斷。日本明治元年。遣對馬島守吏宗重正往朝鮮重修舊好。維時英孝王已薨。嗣王李熙尙幼。攝政之大院君。圖執鎖國主義。不接日本國書。宗重正返國。以朝鮮冥頑。非口舌可爭。須以兵力懼之等語。報告日政府。適大院君又將東萊釜山兩府所置之日韓兩國官吏接見所一律撤去。並發布與日本人交際者。處以死刑之條例。於是日本外務大輔上野景紀等。爭謂朝鮮暴慢。非興師問罪不可。事雖未及實行。而中國之斷送朝鮮。致釀後日之戰禍。即已於此時種其因矣。當是時也。日本全權大使副島種臣以琉球難民一案赴中國交涉。卽以朝鮮暴慢問中國之責任。總理衙門乃以中國對於朝鮮。雖與封册及正朔。然其內治與和戰。皆朝鮮自主。

與中國無關係云云覆之。種臣返國。遂與日廷決定以獨立國待遇朝鮮。自此中日交涉之棘手。乃日甚一日矣。

雖然朝鮮之對於中國。固明明自認爲屬邦矣。當光緒五年。美國政府曾派水師提督修說德請於日本政府。介紹美人與朝鮮結通商修好約。朝鮮拒之。美提督乃至中國。求直隸總督李鴻章以書介紹。朝鮮始受美國國書。並由鴻章代爲起草。訂定條約。八年約成。命道員馮建威等往結盟。後英法俄意德奧六國亦如之。時中國新與朝鮮訂定商民水陸貿易章程。其序言有此次所結水陸貿易章程。係中國優待屬邦之意。非與各國一體均沾之例云云。是朝鮮之爲中國屬邦。固有約章可證。朝鮮之外交。斷非不經中國之指導與允可。而貿然可與外國訂約者也。顧中國外交當局。沈沈如夢。既於副島種臣之問答而斷送朝鮮矣。又於江華灣條約。默許朝鮮有與外國訂約之權。先是光緒初元。日本軍艦雲揚號者。將赴中國牛莊。寄泊於朝鮮京城之河口江華。朝鮮礮臺守兵發礮擊之。日兵應戰。



而拔礮臺。並奪永宗城。日廷遂利用此時機。派黑田清隆爲全權辦理大臣。井上馨爲副。迫脅朝鮮締結江華灣條約。明年約成。凡十二款。其最重要者。一爲朝鮮爲自主之邦。與日本有平等之權。二爲朝鮮於沿海二處。開通商埠。三爲朝鮮沿海。任日本人自由測量。蓋日本既絕對認定朝鮮爲自主。則一切交涉。得與朝鮮直接辦理。而中國之宗主權。自可無形消滅。顧亦不能不有所顧慮。曾於江華灣事起後。派全權公使森有禮赴中國。向總理衙門宣告日本對朝鮮之意見。總理衙門。雖亦根據中日修好條約以爲答復。該條約內有所屬邦土不相侵越之語。並主張日本朝鮮如有問題發生。應先與中國交涉。不應直接興師問罪。而森有禮終以朝鮮外交悉由自主。則日本國應以自主國待之爲言。談判累日。卒未得要領。迨江華灣條約既發表。中國應極端反抗。設法撤消。其第一款。以鞏固我於朝鮮確有宗主權之地位。乃默不一言。聽其批准交換。自是而日本對於朝鮮之跋扈飛揚。遂不認我有發言權。是又斷送朝鮮而致釀中日戰禍之第二原因也。

夫國必自侮。然後人伐之。苟朝鮮脫離中國宗屬關係。而確有獨立自主之能力。則日本又安得而逞其陰謀哉。乃江華灣條約締結以後。又有大院君與開化黨金玉均徐光範等之衝突。致釀成光緒八年暴兵之亂。當時大院君嗾使暴兵殺斃教練朝鮮新軍之日本陸軍中尉堀本禮造等七名。又襲擊日本花房義質公使使館。並追殺日本巡查及通譯四名。日本遂派兵往朝鮮。由花房公使提出要求條件。維時直督李鴻章急發兵。遣道員馬建忠提督丁汝昌吳長慶往。建忠與駐日中國公使黎庶昌先後告花房公使及其外務大臣井上馨以調停之意。皆爲所拒絕。井上且揭明其事曰。貴國雖視朝鮮爲屬國。日本視朝鮮爲獨立自主國。自有明治九年日本朝鮮直接訂約以來。卽江華灣條約爾後無須依賴貴國調停。鴻章不得已。命長慶誘致大院君至營。送歸天津。而任聽日本與朝鮮結濟物浦條約六款。其最重要之第五款。有自後日本以軍隊駐朝鮮京城。衛護公使館。及兵營設置之費用歸朝鮮擔負云云。他若捕究兇徒。禮葬被害日人。償給卹金兵費。

暨遣使謝罪。各款均不經中國之允可。於是中國政府見日本對於朝鮮之勢力日益增進。乃漸定干涉朝鮮內政之方針。由鴻章遣商務總辦陳樹棠及德人穆麟德爲朝鮮政府顧問。又任今大總統袁公爲全權委員。留兵二千屯其京城。並與其外戚閔氏深相結托。贊助其守舊政策。至此而日本平日所抱之侵畧主義。將全歸失敗。日人乃一變其政策。先將濟物浦條約所定償金減去五分之四。以市恩。一面援助獨立黨。亦名日本黨與守舊黨。亦名中國黨傾軋。並由日本公使竹添進一郎密與獨立黨洪英植朴詠孝金玉均等商定作亂。於十年十一月陽曆十二月四日乘舉行郵政局開業式之際。刺殺守舊黨右衛大將閔泳翊等十餘人。竹添復率兵突入王宮。逼令國王更換大臣。任命倡亂之金朴等入內閣。所有政權悉入獨立黨之掌握。不三日。袁公亦率兵二千。迫其王宮。竹添督軍應戰。日兵不敵。竊背負國王。避入林間。國王以日人不足恃。並以王妃一族皆在袁軍。卽亦夤夜逃至。至是竹添進退失據。遂自焚其使館。走還仁川。告急於本國政府。蓋其陰險伎倆。

至此而路人皆知矣。時獨立黨內閣雖於二日內顛覆。守舊黨勢力依然恢復。然日本狡謀愈逞愈烈。旋派井上馨爲全權大使。中國亦派吳大澂爲欽差大臣。均率兵至朝鮮。冀籌善後之策。乃井上拒絕大澂。一面與朝鮮國王直開談判。並詰責朝鮮全權金宏集等。不得受第三國干涉。遂結條約五款。而兩國始復言歸於好。然此次之變態。名爲朝鮮黨派之鬭爭。實則中日國際之衝突。彼此固不得不協商善後之策。乃於翌年三月。日本全權伊藤博文與鴻章締結天津條約三條。自是而中日兩國對於朝鮮之勢力。歸於平等矣。是又中國放棄其宗主權。而釀成中日戰禍之第三原因也。

### 第三節 中日開戰前之形勢

自天津條約告成後。中國全權委員袁公鑒於日本之對朝鮮。一方面扶持其勢力。一方面以獨立國介紹於世界。形勢日亟。我非實行其宗屬政策。則中國在朝鮮之地位。必被日本剝奪無遺。故對於朝鮮之外交內政。無不竭力以干涉之。如

朝鮮遣派公使朴定陽駐美一事。朝鮮派定陽赴美。袁公以未經申請中國詰責李鴻章訓令定陽至美後須先至駐美中國公使處由中國公使向駐在國政府介紹祝賀延宴朝鮮公使必在中國公使之下如有重要交涉事件須先問中國公使之意見。咸鏡道防穀令一案。光緒十五年咸鏡道監司以歲歉禁止穀物輸出之條文由日使向朝鮮交涉並索賠償損失十四萬元雖朝鮮因日使強硬勢將開衅後卒以償金十一萬元結局然此案相持數年經三公使任皆不協議皆能實行其宗屬政策日本亦無如之何者也。嗣後又有刺殺金玉均一案發生而中日交涉乃有厝火積薪之勢。蓋金玉均與朴詠孝等爲朝鮮日本黨之首領於京城變亂失敗後逃匿日本。朝鮮曾求日本交還未允。因派刺客池連永李逸植先後渡日。令乘機刺殺之。後逸植復囑洪鐘宇與玉均陽爲交好。密圖暗殺。適玉均與鐘宇於光緒二十年正月同赴上海。鐘宇遂於上海旅館以手鎗擊殺玉均。鐘宇當場被獲。由上海各國領事經駐京各公使要求總理衙門處鐘宇以相當之罪。而勸朝鮮政府於玉均遺體送還朝鮮後不加侵辱。乃鴻章既不認鐘宇爲有罪。朝鮮政府復大賞其功。且對於玉均之遺體處以大逆不道之罪。日本與

論大譁。且又發見朝鮮駐日公使同謀之證。彼此感情。殆益無浹洽之望。未幾而東學黨之亂又起。中日之戰事遂成。

東學黨者。以明人倫。誅污吏。革秕政。救生靈。標爲目的者也。光緒二十年四月。黨魁全捧準率衆擊敗全羅道官軍。勢漸猖獗。朝鮮政府派兵討捕。未能獲勝。乃一面增加防剿。一面向中國全權委員袁公請求中國出兵援助。遂由直督李鴻章派提督葉志超率兵六營。督同先鋒聶士成。由海路前往。五月初五日。全軍抵朝鮮上陸。志超卽於初七日入牙山。定本蒙。

先是。日本有少壯軍人策士一團。後名天祐俠團前赴朝鮮。助東學黨倡亂。與本國通消

息。其目的在糜爛朝鮮半島。以啟中日兩國戰禍。該團入黨之始。頗竭其智慮。以博黨人歡心。繼漸跋扈。全捧準力不能制。朝鮮官軍正領官洪啟薰於兩軍疲戰之時。曾遣軍使至東學黨議和。東學黨已爲所動。天佑俠團恐事平不能達其最大目的。因斬軍使。以激彼此之戰。卒使朝鮮糜爛。中日兩國出兵。顧中國之出兵。

係根據朝鮮政府之請求。且爲保護屬邦之慣例。當經李鴻章照天津條約。以出兵照會。交由駐日公使汪鳳藻。送日本外務省。中有我朝保護屬邦慣例之語。乃日外務陸奧宗光。直以日本未認朝鮮爲貴國屬邦之公文。照復鳳藻。並令其駐京公使小村麥太郎。以日本出兵照會。致總理衙門。總理衙門於翌日。又以復文致日公使云。中國以朝鮮政府之請求出兵。非日本所比。若日本爲保護公使館領事館。及商民起見。則無須大軍。且日兵每入朝鮮境內。不免中日兩國衝突。日政府復云。日本此次派兵。一依日朝濟物浦條約。一依中日天津條約。至出兵多寡。日本政府自決之。且日兵紀律嚴肅。縱與貴國兵相遇。不致生事。蓋日本自認朝鮮爲獨立國以來。早決定與中國開衅。自締結天津條約後。尤亟亟整理內政。擴張軍備。冀以一戰驅中國勢力於朝鮮之外。至是遂日爲千載一時之機遇。故其答辯甚強硬也。

當葉志超定營牙山之時。日本兵之陸續抵朝鮮者。已有七千六百餘人。東學黨

以中日兩國各派大軍。恐懼逃亡。亂事即歸平靖。當由袁公照會朝鮮日公使大鳥介圭。言亂徒已散。中日兩國可同時撤兵。大鳥不應。其時日外務陸奧宗光。已提出對待朝鮮共同改革案。付閣議。一、中日兩國兵協同平定朝鮮內亂。二、朝鮮內亂平定後。兩國設委員於京城。調查其財政。淘汰其官吏。設警備兵。保持其國內安寧。三、整理朝鮮財政。募公債。興一切公益。閣議悉贊成之。翌日。又增入兩條。一、無論中國政府贊成提案與否。日本軍隊決不撤回。二、若中國政府不贊成提案之時。日本政府以獨力迫朝鮮實行改革。蓋陸奧逆料中國不贊成提案。故增此二項。俾異日外交立於自動者之地位也。此二項亦得閣議贊同。乃於五月十二日。照會中國公使汪鳳藻。並電令其駐京小村公使。駐津荒川領事。先後將提案送交總理衙門直隸總督。旋經總理衙門命汪公使詣日本政府。告以共同改革案。中國不表同意。且以朝鮮內亂已平。各按天津條約。各自撤兵。五月十八日。陸奧復以公文與汪公使。大旨謂朝鮮事變屢起。缺獨立要素。若不代謀匡救。非



但有戾鄰邦友誼。且非日本自衛之道。本大臣披胸襟。吐誠意。縱令與貴國政府所見不同。帝國政府斷不能撤去現屯之軍隊。陸奧此言。卽表示中國既不贊同改革案。則日本以獨力擔任之。殆卽宣戰之先聲也。旋於五月十九日。大鳥公使電命已屯朝鮮之混成旅團長陸軍少將大島義昌。率全軍入朝鮮京城。翌三日。由大鳥公使面謁朝鮮國王。提出甲乙兩案。甲案。摘錄中國駐日汪公使保護屬邦及聶士成檄文中。愛恤屬國保護藩屬之文字。詰問朝鮮政府承認與否。謂中國派來之軍隊。侵害朝鮮獨立。並蔑視日本朝鮮之條約。不可不使其撤退。乙案。日本政府勸告之改革案。促朝鮮決答。若不應勸告。則用脅迫。責其實行。朝鮮政府逡巡數日。派重臣申熙正、金宗漢、曹寅承三人爲改革委員。與大鳥協議改革事項。至六月十四日。遂承認大鳥提出之改革案。乃至十六日。忽由袁公令朝鮮政府撤消承認之案。並要求日本撤兵。蓋其時中國朝鮮皆恃有外國干涉。故對於日本亦持強硬態度也。乃無何而俄國對日本之責言。英國對中日之調停。美

國對日本之忠告。皆歸無效。大鳥遂以朝鮮因袁公撤消其承諾案。向朝鮮政府提出左之極端照會。一、日本政府自行架設京城釜山間之軍用電信。二、朝鮮政府依濟物浦條約。速爲日本建設兵營。三、在牙山之中國兵。原以不正名義派來。速令撤退。四、中國朝鮮之水陸貿易章程及其他抵觸獨立國之中國朝鮮各條約。均一切廢棄。五、以上各項回答之期。以二十日爲限。朝鮮政府接此照會。頻開會議。不能決定。二十日。送與漠然無要領之回文。大鳥卽照會朝鮮外務督辦趙秉稷。稱日本不得已依兵力解決。二十一日晨。混成旅團長大島。率兵向王宮進發。護衛兵發砲拒之。日兵應戰。護衛兵皆潰退。日兵直入王宮。閔族之中國黨。皆狼狽逃遁。獨立黨則意得甚。袁公見形勢已非。不得已返國。於是中國在朝鮮之勢力。掃地無餘。朝鮮無所依賴。遂全依大島之要求。並公然將中國朝鮮歷年所締條約。宣布廢棄。又託日本以軍力驅逐中國駐屯牙山之兵。於是戰局遂開。中國且日處於失敗地位。蓋自袁公回國而朝鮮實權悉爲日人所握。固不待交戰。

而已。情見勢絀矣。

#### 第四節 中日交戰及未宣戰前中國之受創

光緒二十年七月一日。中國下宣戰之詔。日本亦於是日宣戰。兩國公使各下旂還國。西洋各國紛紛宣告中立。法俄墨英國請以上海爲中立地。日本亦請以上海不爲戰鬪準備。均經中國政府許之。先是葉志超駐軍牙山。兵止六營。見日本海陸大軍併進。迭向本國催發援兵。李鴻章擬卽遣派大兵。爲反對派所阻。僅於六月十九日。租英商三輪船。載援兵八千六百名。由大沽向牙山進發。並派軍艦濟遠廣乙二艦護送。乃日本政府已探知之。卽由陸奧經英公使照會中國政府。有五日内若中國增派援兵。則視爲威嚇運動之語。迨至中國援兵已經出發。日政府卽命混成旅團長大島。率軍攻擊牙山。一面更命聯合艦隊遊弋黃海。二十三日。中國軍艦濟遠廣乙與日本軍艦吉野浪速秋津洲三艘。遇於豐島。濟遠先向日艦發砲。日艦應戰。須臾我廣乙艦體大受損傷。向南奔駛。艦長林國祥自放

火燬之。率衆奔牙山。濟遠向西逃走。吉野追擊之。不能及。時我國礮艦操江號。與所雇英商船之高陞號。在西北方海面。日艦秋津洲欲逕擊操江。操江卽揭白旗。艦長王承發以下八十二人皆降之。浪速號先令高陞號投錨不應。浪速卽發礮擊中高陞船機關。轉瞬人船沉沒。載兵一千二百名是役日艦一萬一千一百零六噸。中艦僅三千九百噸。日艦微受損傷。不失一兵。中國失操江廣乙高陞三艘。損失兵力一千一百七十二名。

牙山之中國駐屯軍。以成歡爲扼要之地。築堡壘五處以爲防禦。六月二十三日。日將大島率混成旅團進攻牙山本營。分全軍爲左右兩翼。中途遇聶士成之伏兵。激戰三十分。聶兵潰敗。其左翼兵。復用榴散彈炸裂聶營成歡之堡壘。次第陷落。牙山本營遂不可守。士成敗奔洪州。惟葉志超率守兵千名在天安。故未與此戰。然聞警後。已舉措失宜矣。

以上陸海二戰。爲兩國交鋒之開始。勝敗之分。卽將來軍氣消長之所關。影響於

全。局。甚。大。假。使。中。國。早。依。李。鴻。章。多。派。大。兵。之。計。畫。或。不。至。有。豐。島。成。歡。之。禍。

### 第五節 中國陸軍之敗績

當中日兩國國交將破之際。中國派馬玉崑統毅字軍。衛汝貴統盛字軍。左寶貴統奉軍。豐陞阿統奉天盛字營。由大連灣出發。六月二十八日渡鴨綠江。七月四日達平壤。諸將依李鴻章命令。奉葉志超爲統帥。察看形勢。以平壤負山帶海。有險可據。遂築二十七壘。分四軍守之。日軍總指揮官野津道貫。知中國將卒。祇能據險自固。無奮勇進取之志。定計包圍攻擊。使我軍彼此不能應援。八月十六日。令混成旅團長大島率隊攻平壤正面。朔寧支隊攻平壤北面。其師團本隊。則由平壤西南各路進攻。又令元山支隊。以一半協助朔寧支隊。以一半扼甑山。斷我後路。我軍馬玉崑所部之防禦線。在橋頭堡一帶。爲大島之混成旅團所攻。馬軍憤甚。激戰八小時。日軍死傷甚衆。卽退至水灣橋。馬軍亦不出壘追擊。至衛汝貴、豐陞阿兩軍。則在平壤西南。爲日軍之師團本部所攻。退匿壘下。不敢還擊。日軍

以其壘堅亦不能攻破。其攻平壤北面之朔寧元山兩隊。則用榴散彈擊破牡丹台。左寶貴死之。兵氣大沮。紛紛潰走。日軍又以榴散彈攻破元武門。一湧而進。城內遂懸白旗乞降。時正午後五時。天忽大雨。乃約翌日獻城。志超遂率領殘軍遁至義山。又被甌山之元山支隊截殺四百餘人。平壤遂失。是役也。雖因我軍無榴散彈。遂使日軍因之取勝。然志超身居統帥。畏葸無能。諸將亦皆昧於戰略。惟左寶貴之殉身。馬玉崑之全師而退。尙差強人意。自此以後。我軍悉退駐於鴨綠江西岸之九連城、鳳凰城一帶。朝鮮境內無復我軍蹤影矣。噫傷已計是役。日軍死傷五百三十五人。我軍戰死二千人。

平壤敗報至北京。海軍在大東溝亦同時敗績政府且驚且怒。李鴻章、葉志超均受譴責。而以

四川提督宋慶、幫辦北洋軍務以黑龍江將軍依克唐阿、督辦遼陽兵站事務。仍受鴻章節制。鴻章因命宋慶統率諸將防禦安東、葦子溝、大東溝、大孤山一帶。命依克唐阿防禦鴨綠江上流長甸、安平、江各要地。又增加東三省及河南、山西兵。

共五十餘營。以厚國防。另增加大同軍二千及天津徐邦道之兵五營。以厚大連旅順之陸地防禦。同時又集合各省大兵九十二營。分紮天津、大沽、山海關、營口、通州之間。以護衛北京。

日本於平壤戰勝後。又組織第一第二兩軍。第一軍以陸軍大將山縣有朋爲司令官。第二軍以陸軍大將大山岩爲司令官。由海路上陸。爲進窺遼東半島。及大連、旅順之計。九月二十七日。第一軍攻九連城東北虎山。先夜。工兵隊在鴨綠江。冒險架橋。我軍昏昏不知。天將徹曉。日軍已大渡江。遇我軍馬金敘。激戰二時許。馬玉崑又出九連城援之。乃援未至。而馬金敘之軍。已向靉河亂走。日軍遂分二道夾攻玉崑軍。玉崑軍亦退還九連城。虎山卽爲日軍所占。翌日。日軍又乘勝克九連安東城。旋復分爲二道。一迫鳳凰城。一向大東溝。鳳凰城爲前敵總統宋慶駐軍之所。時諸軍瓦解。宋慶亦爲懦兵所惑。悉燒城外街市。率隊退至奉天。十月朔。鳳凰城遂爲日軍占領。其向大東溝之日軍。經大東溝。收大孤山。更進攻岫巖。

駐防將軍嘉善、與敗將豐陞阿不戰而走。於是日軍卽在岫巖休養士卒。至十月中旬。又由日桂中將占據析木城、海城等處。維時我軍又已分退至遼陽牛莊方面。聞海城被陷。宋慶、玉崑率六十餘營進逼海城。冀圖恢復。二十三日。玉崑與日軍大迫之隊大戰於瓦缸寨。大迫大敗。大島與日桂兩軍急赴援救。混戰五時。日軍死傷山積。卒不屈。三次奮進。我軍始退向牛莊營口方面。是役日軍死傷甚衆。我軍全勝。無一戰死者。爲開戰以來所僅有。日軍自經此役。頗有戒心。遂由第二軍撥乃木一隊與第一軍相合。十二月十五日。日分三軍攻取蓋平。守將章高元負重傷。提督楊壽山以下二百人皆死之。自後依克唐阿及吉林將軍長順與湖南巡撫吳大澂屢圖恢復海城。皆不利。翌年正月二十六日。宋慶又由營口進窺太平山。所部六十營。以南北太平山村及東西七里溝爲陣地。三十日。日軍先擊我東七里溝之軍。宋慶、姜桂題次第退却。西七里溝之馬玉崑軍亦因敵礮猛烈潰退。二月十日。敵將乃木進攻營口。時遼河左岸有營口礮臺。可以射擊東南北



三面。西方與西南方復布設地雷二百餘具。守兵二千三百名。以逸待勞。以主待客。本占優勝之勢。顧統領蔣希夷聞警卽潰。日軍遂乘勝進襲。旋至遼河左岸。列大礮七十三門。猛擊田莊台。交戰不及三時。宋慶各營已皆潰走。自此而遼東半島。遂悉入日軍掌握。

日將大山岩所率第二軍。由花園口。貔子窩附近上岸。進迫金州。副都統連順與總兵徐邦道以重兵據守。十月十九日。日軍分三路夾逼城下。以爆發彈破碎城門。金州遂陷。次日更分三路進攻大連。迭擊和尚島。大藍山。各礮臺。我軍不應戰。日軍進探之。則守兵已於先夜聞金州陷落。遁至旅順。日軍狂喜。遂入大連。且視旅順守兵如籠鳥池魚。不復能作困獸之鬪矣。先以書招降守兵。不答。二十日。遂分三軍攻之。時旅順防禦艦隊。雖已逃赴威海衛。而船局總辦龔照瑗所部尙有二十四營。再副以邦道之援兵。果能憑險一戰。則勝負尙不可知。乃二十四日。椅子山礮臺。先爲日軍攻陷。遂臨高下擊。攻破旅順背面各壘。同時二龍山。黃金山。

各礮臺亦一併陷落。其黃金山礮臺能旋轉環擊。最爲得力。此處陷落。無可救矣。維時照璵已航海逃匿芝罘。其他將卒之逃至金州方面者。多被日軍截殺。日軍狂歌入旅順。復屠戮無戰鬪力之兵民四日。其行爲頗背陸戰法規。大爲世界文明國所誹笑。至此而東洋第一要塞。變爲日軍海軍根據地。後中國政府雖將照璵等治罪。然噬臍之悔。又何及耶。

北京聞旅順陷落。大起恐慌。乃以兩江總督劉坤一爲欽差大臣。總轄軍務。然逗遛榆關。迄無進取之志。時湖南巡撫吳大澂統率新軍駐屯牛莊。號稱知兵之魏光燾。李光久等皆隸部下。銳氣極盛。中外屬望。乃魏李諸將因規復海城之故。轉於牛莊方面防禦疎懈。二月初七日。日將日桂自西北進。奧保鞏自東南進。夾擊牛莊。魏李兩軍聞警急返。布設未周。已爲日軍所包圍。攻擊猛烈。勢漸不支。不得已。在街市激戰。我軍高踞民房。日兵多被狙擊。未幾。日軍以爆發彈破碎民房。我軍失所據。或殪。或降。牛莊遂陷。蓋吳大澂本一書生。以虛僑之氣。敵方張之寇。其

不克有濟也。識者固早知之矣。

### 第六節 中國海軍之敗績

豐島海戰之後，中國艦隊遂不敢取攻擊之勢。八月十三日，李鴻章令劉盛休、統銘字軍十二營乘運送船五艘，前往平壤，命海軍提督丁汝昌率北洋艦隊定遠、鎮遠、靖遠、致遠、來遠、經遠、威遠、揚威、超勇、廣甲、廣丙、平遠軍艦十二艘，及水雷艇六艘護送之。十五日，安抵大東溝，士卒糧械次第上陸。各軍艦即碇泊於大東溝西南十三海里之處。先是，日本聯合艦隊護送陸軍大將山縣有朋至朝鮮。八月十三日，抵仁川。聞中國馬玉崑等援兵自大連出發，即由日本海軍總司令伊東祐亨率聯合艦隊進大同江，爲陸軍之援。旋聞平壤陷落，伊東又命遊擊艦隊吉野、高千穗、秋津洲、浪速、四艦爲先鋒，已則率本艦隊橋立、千代田、巖島、比叡、扶桑、赤城、松島、西京丸八艘，同向黃海遊弋。忽見東北面有縷縷淡煙搖曳，波上知係中國艦隊，立卽下令備戰。本隊與先鋒隊均以同一之陣形前進。我海軍提督丁

汝昌見敵艦將迫近。命作翼梯陣。即人字陣以決戰。以定遠、鎮遠二巨艦居中央。餘艦分左右兩翼。少頃彼此相距六千米。突我軍即發礮開戰。日艦不應。再進三千米。日艦始還礮。激戰未久。日先鋒艦隊忽突過我右翼。其本隊之殿後艦又疾駛而前。衝入我鎮遠經遠之間。我艦陣形大亂。日艦先鋒隊與本隊復乘勢夾擊。我軍遂不支。是時我艦超勇早起火。未幾沉沒。濟遠甫交陣。艦長方伯謙即懸旂告重傷。旋又圖遁。誤撞揚威。沈之。飛遁入旅順口。致遠負重傷。艦長鄧世昌欲撞敵艦。與同沈。鼓輪疾進。未及而沒。經遠管帶林永升鼓輪追敵。艦誤中水雷轟裂。廣甲初戰即遁出陣外。倉皇間誤觸礁石。來遠起火。一時撲滅。鎮遠受彈最多。本艦長林泰曾力戰得免。於難。定遠爲汝昌坐船。迭中巨彈。鏖戰時放大礮數門。全艦震盪。汝昌墮自艦橋。悶久始蘇。復糾合鎮遠及餘艦拒戰。時際日沒。日軍停戰。召還先鋒隊。汝昌亦率殘艦歸威海衛。是役我艦沈沒四艘。殉艦將領兵士約七百人。餘艦皆受重傷。無一完全者。死傷兵又五百人。日艦止比叻、赤城、西京丸受重

傷。然未喪一艘。日軍死者僅九十三名。傷者二百人。蓋此次我軍致敗之原因。一由於軍艦之速力。與礮彈之命中。概不及日軍。一由於將卒之恐懼慌亂。進退失措。日軍則臨危不驚。將卒奮勇。精神上適得其反。自是而我北洋之艦隊。遂一敗塗地。黃海之判海權。悉爲日本所有。奉天南部。黃海西部。皆可以任意侵犯矣。北洋艦隊敗報到天津。李鴻章請求政府。將南洋艦隊。與北洋殘艦合併。以爲海上防禦。軍機處不許。於是北洋殘艦。遂潛伏威海衛。不敢越雷池一步。然有此殘艦。日艦尙不敢侵犯渤海沿岸諸地。時中國陸軍於平壤戰敗後。又值日軍將奉天東南部。及旅順。蓋平等處攻陷。風聲鶴唳。全國震動。山東沿海諸城。尤爲吃緊。山東巡撫李秉衡。與道員戴宗騫。止竭全力。以營威海衛西北方之防禦。不及顧登州東南之守備。日軍探知之。遂於十二月二十五。乘機派第一游擊隊。侵茶城灣。該處東西北三面環山。南控海成灣之內。水源可入巨艦多艘。而僅有鞏字兵三哨。任該灣守禦。日軍艦七艘駛入灣內。復以小艇運兵上陸。鞏字兵發礮拒之。

日兵急退歸艦上應戰。時方大雪。守兵旋望風潰奔。迨雪止後。日軍不聞我軍礮聲。復操艇前進。始知守兵已走。遂入茶城縣。休兵三日。再向威海衛進軍。五月初五日。日將黑木率右縱隊。由柳家莊踰險銜枚。匍匐猛進。次日黎明。抵孤山後。摩天嶺之守兵大驚。應戰未久。下山逃走。日軍遂占摩天頂礮臺。憑高俯擊。不踰時。南岸之鹿角嘴。龍廟嘴。謝家所。趙北嘴。諸礮臺。先後陷落。逃兵多被截殺。同日。日軍左縱隊。轉戰溫泉。湯鳳林集。虎口村。楊家灘。各方面。戴宗騫率諸軍次第退却。日軍悉占領之。並於正月初八日。進窺威海衛城。是時我軍之在威海衛者。僅殘艦數艘。及留公島。日島。兩礮臺而已。先是汝昌接茶城敗報。知陸軍不可恃。欲破壞南岸諸礮臺。使不爲敵用。以全我殘艦。宗騫反抗之。至是北洋守兵聞風潰走。汝昌復急勸宗騫破壞北岸諸礮臺。及水雷營。火藥庫等。正月十一日夜。日水雷艇闖入港內。定遠被轟壞。次夜。日水雷艇再由東口襲進。來遠。威遠。及水雷布設船。復被擊沈。兵氣愈沮喪。將卒皆不欲戰。煽動留公島居民。及所部兵勇。向汝昌

乞生命。所雇之外國人亦勸汝昌暫時乞降。免致兵民塗炭。均經汝昌嚴詞拒絕。並慰以援兵將至。衆情稍安。一面遣密使至芝罘。致書於道員劉含芳。言十六十七援軍不至。則船島皆不可守。十七日得密復。言李秉衡走萊州。援兵無望。汝昌乃始決計。率全艦隊突出港外。爲最後之決戰。繼又擬盡燬軍艦。軍器礮臺。爲無條件之乞降。無如諸將皆不應命。且報諸機關爆藥等。皆損燬。雖欲破軍艦礮臺而不能。維時日軍已於十六日由威海衛北岸礮擊留公島。島內陸軍潰亂。不可制止。汝昌憤甚。遂一面致李鴻章電報。言始意船沈人盡。而後已。奈衆心齊亂。無可如何。一面卽服藥自殺。總兵劉步蟾。張文宣以下同死者七人。吁可哀已。旋由道員牛昶昞等祕其喪。而命英人張爾齊。巴伊。假汝昌名。代繕降書。遣廣丙艦長陳璧光。送致於日司令官伊東祐亨。求勿傷害中西水陸官民兵。而以現在之船艦礮臺軍械等。獻納之。伊東大喜。卽復書許之。昶昞等始宣布丁提督於接日本司令官回文後自殺。並遣璧光報告於伊東。伊東命以他官代行降服一切事務。

遂由昶昞與日軍委員訂降服條約十一條。自是北洋艦隊殲滅無遺。渤海南北門戶皆被日軍占領矣。

日軍既殲滅北洋艦隊。又欲甘心於南洋軍艦。使中國全失其海上勢力。且欲得澎湖列島。爲南海海軍根據地。於是另編一艦隊。先行規取澎湖。以進窺臺灣。二月十九日。海陸軍向澎湖出發。二十七日。砲擊澎湖島東南礮臺。同時。陸軍由裏正角上陸。陷拱北礮臺。畧馬公城圓頂半島。守將郭潤馨率兵將六百名出降。漁翁島礮臺守兵。則燬臺而遁。澎湖列島遂悉爲日軍占領。時休戰條約雖告成。而日本欲割取臺灣。強以澎湖、臺灣置休戰條約之外。仍繼續戰鬥。然未幾。日軍中疫病大起。又未幾。和約成。兩國戰爭遂以此役終。

### 第七節 中日媾和之波折

中日之戰。因朝鮮宗屬問題而發生。當中日宣戰之初。日本大鳥公使已乘機與朝鮮訂立新協約。一、朝鮮政府實行改革內政。二、京仁、京釜鐵道許與日本敷設。



三、日本所設京仁京釜間之電線。依然保存。四、全羅道開一通商口岸。五、兩國不追究六月二十一日之變。六、將來兩國派員協議朝鮮獨立自主。此七月二十日之條約也。旋於二十六日。又結日本朝鮮攻守同盟條約。即協定日朝兩國合力驅逐中國軍隊於朝鮮境外。以鞏固其獨立自主者是也。依此二條約。朝鮮遂移而爲日本之屬國。迨至開戰以後。優勝劣敗。已昭昭不可掩。中國情勢。岌岌遂不得。不。首。先。承。認。朝。鮮。之。獨。立。自。主。以。爲。媾。和。中。必。要。之。條。件。願。當。旅。順。未。陷。以。前。政府尚不肯遽言停戰。惟李鴻章已逆料戰局之必敗。力請各國出爲調停。於是英國政府首欲連合各國。與中日周旋。於二十年九月初旬。由駐日英公使。以各國擔保朝鮮獨立。與中國賠償日本軍費兩條件。勸日本休戰。日本政府以英國之提議。已經各國協贊。頗爲躊躇。乃未幾。而德政府首斥英政府之議。俄外部亦申言中國不直接與日本乞和。則非干涉之時機。日政府遂乘機拒英國之勸告。我國不得已。乃直接向日本探詢媾和條件。任天津關稅務司德瑾琳爲媾和使。

令攜鴻章致伊藤博文之照會。往日本議和。德璀琳以十一月二十日抵神戶。因兵庫縣知事求見伊藤。并致鴻章之照會。伊藤以德璀琳爲鴻章之私傭。無代表交戰國資格。又以其照會爲私書。不足代表中國政府。拒絕之。而不見德璀琳。送返上海。然未幾。中國政府仍派遣張蔭桓、邵友濂二人爲議和全權大臣者。則以美國曾以友誼之調停怵戰局之延長。實以啓其端者也。當十月間。美政府命駐日公使達五訪陸奧外務。云美國大總統以真正友情。希望東方和平。依於中日兩國均不毀傷名譽。願執調停之勞。陸奧答云。中國尙未直接向日本求和。則中國尙無休戰之意。此語蓋含有中國如直接乞和。則日本願美國從中斡旋之意者也。十月二十五日。駐北京美公使鄧畢。又寄達五電云。中國政府以直接開媾和談判之任務。委托本公使。其媾和條件。則爲朝鮮獨立。及賠償軍費。願以此旨達日本外務省。日本政府以此條件。未能滿其慾壑。不允承認。並復美公使。謂中國如誠實求和。須派全權委員。與日本全權委員會合。日本始得提出休戰條件。

時我國政府。迭接海陸軍敗報。急欲媾和。遂從其要求。初請以上海爲議和地點。日本不允。後經雙方協議。始決定於日本內地另擇媾和地點。當經日本政府以廣島爲兩國全權會合地。此中國政府於十一月二十日。遣派張邵兩全權渡日之所由來也。中國全權所賚國書文曰。大清國大皇帝問大日本大皇帝之好。我兩國誼屬同洲。素無嫌怨。近以朝鮮事。彼此用兵。勞民傷財。豈真出於不得已者。現經美國調處。兩國派全權大臣會商結局。茲特派尙書銜總理各國事務衙門左侍郎張蔭桓、頭品頂戴署湖南巡撫邵友濂爲全權大臣。前往貴國商辦。願大皇帝接待。俾諸使臣得盡職務。是所望也。時日政府亦派總理大臣伊藤博文、外務大臣陸奧宗光爲議和大臣。伊藤等詳察中國全權所賚國書。不認爲委任全權文憑。却不受。蓋此次國書。其性質係平時外交官就任他國。由本國元首授以信憑。呈之於接受國元首。俾接受國信用此人。而非委任全權之文憑也。於是中國全權。又提示上諭一道。內言諭尙書銜總理各國事務大臣戶部左侍郎張蔭

桓頭品頂戴署湖南巡撫邵友濂。茲派爾爲全權大臣。與日本派出之全權大臣會商事宜。爾仍一面電稟總理衙門。請旨遵行。隨行官員。歸爾節制。爾其殫竭精神。謹慎將事。勿負朝命。此項上諭。仍非正式之全權文憑。蓋所謂全權文憑者。必記明爲何事。又記明有締結條約及調停之全權者也。今諭中既不記明事件。且又有電稟總理衙門請旨遵行之文字。則張邵二人之職務。實無全權之資格。伊藤等遂以照會確詢張邵二人之權限。張邵回文聲明無專對專決之權。伊藤乃於第二次會見時。爲拒絕談判之演說。其大旨一、中國慣以孤立猜疑爲政策。外交上向缺公明信實之例。不一而足。二、兩閣下帶來之文憑。既不記明談判事件。又無全權結約之權限。不過中國政府之通信員而已。三、貴國如誠實求和。非委任確實全權有名爵資。望能擔保條約實行之資格者。則談判不能繼續。張邵兩全權。請由本國政府改換全權文憑。仍繼續談判。伊藤等又拒絕之。中間復經美公使向日政府挽回。而日政府決定不肯再認已經拒絕之全權。於是張邵兩全

權。遂。悄。然。返。國。此。雖。由。日。本。之。故。意。爲。難。然。中。國。政。府。不。知。國。際。公。法。致。爲。全。球。所。憫。笑。亦。可。憐。矣。

先。是。日。政。府。決。議。媾。和。條。件。如。預。向。列。強。開。示。是。導。人。以。干。涉。之。漸。故。寧。專。向。中。國。要。求。萬。一。事。後。有。第。三。國。異。議。再。爲。臨。時。處。置。因。是。中。國。政。府。雖。迭。經。美。公。使。探。詢。條。件。而。日。政。府。始。終。嚴。守。祕。密。迨。經。張。邵。兩。全。權。一。番。跋。涉。而。於。媾。和。條。件。仍。絲。毫。不。獲。聞。知。時。列。國。對。於。日。本。之。舉。動。大。加。注。意。俄。英。駐。日。公。使。且。忠。告。日。政。府。對。於。中。國。要。求。不。可。失。之。太。苛。日。本。見。歐。洲。形。勢。將。不。利。於。己。不。得。不。恢。復。和。平。以。新。列。強。之。視。聽。乃。舉。前。此。之。祕。密。不。宣。者。於。正。月。二。十。三。日。經。美。公。使。通。知。中。國。政。府。於。賠。償。軍。費。承。認。朝。鮮。獨。立。外。尚。須。割。讓。土。地。與。得。最。惠。國。利。益。各。項。於。是。中。國。政。府。派。遣。大。學。士。李。鴻。章。爲。頭。等。全。權。大。臣。經。美。公。使。轉。告。日。政。府。日。政。府。又。詢。李。全。權。有。執。行。二。十。三。日。日。本。政。府。所。開。各。條。件。之。權。限。與。否。總。理。衙。門。以。確。有。此。等。全。權。答。之。日。本。乃。定。馬。關。爲。兩。國。全。權。會。合。議。和。地。

光緒二十一年二月二十三日。中國議和頭等全權大臣李鴻章率同隨員。並其子李經芳。行抵馬關。二十四日。李全權與伊藤博文、陸奧宗光爲第一次會見。交換全權文憑。彼此查閱無異。李全權即要求先議休戰條約。日全權約以明日正式之會合畢。李與伊藤本舊交。遂暢論東西洋大勢。及中日同盟之必要。又贊慕伊藤之功績。與日本之進步。談論風生。至數時之久。翌日第二次會見。日本兩全權提出休戰條約如左。

一、大沽、天津、山海關均歸日本軍隊占領。

二、右各處中國軍隊之軍器軍需全繳與日本軍隊。

三、天津山海關之鐵道歸日本軍務官管轄。

四、休戰中日本軍隊之軍費歸中國負擔。

李全權接閱此案。連呼條件太酷。謂天津大沽山海關皆北京鎖鑰。若歸日本軍隊占領。則帝都安固之基已壞。豈中國所能堪。要求另提寬大別案。日全權斷言。

祇可修正本案。不能另提別案。李全權復謂兩國主要目的在克復和平。不在休戰。請暫置休戰問題。直入媾和談判。日本全權則謂非先議休戰問題不可。若休戰問題不先議決。斷不能論及媾和問題。李全權請延緩三日以資審慮。

二十八日爲第三次會見。李全權決言撤去休戰問題。要求即時開示媾和條件。日本全權約以明日遂各分散。李全權由會議所春帆樓歸旅館。出門未遠。忽遇日本暴徒小山六之助。以短銃擊中左頰。槍子深入左目下。傷勢頗重。日全權聞警馳往慰問。旋日天皇賜御醫診治。日皇后賜御製繙帶。待遇儀式頗爲優隆。然以全權而遭暗擊。爲中外所僅見。若李全權卽以負重傷爲辭。將談判中止。毅然回國。然後一方面詰責日本非理之行爲。一方面引起列強之感情。誘之干涉。則日本對中國之要求。自當讓步。乃李全權尙計不及此。而日本若已預知此等非禮之行爲。爲環球所震動。故以爲待遇優隆之外。尙須與中國以實際之利益。以平李全權之憤。因由伊藤奏准日皇。勅許爲無條件之休戰。李全權聞之大喜。三

月三日。即與陸奧於病床協定休戰條約如左。

一、奉天直隸東三省地方。兩國海陸軍休戰。

二、兩國休戰軍隊。各有保持現在駐屯地之權利。但現在休戰期內。不得出進現在駐屯地之外。

三、兩國政府於休戰期限內。不得對於敵之方面準備進擊。及增派援兵與一切增加戰鬪力之事。然非爲現時戰地從事戰鬪之目的。而爲新兵之配布運送。則爲無妨。

四、海上運送兵員軍需。及一切戰時禁止品等。仍依戰時法規捕獲之。

五、休戰期間。自本約調印之日起。以二十一日爲限。即以明治二十八年四月二十日光緒二十一年三月二十六日之正午爲止。若期限內和議不成。本約即歸無效。

右休戰條約僅限於東三省。至臺灣、澎湖、列島方面。依然繼續戰爭。與本條約毫



無關係。李全權力爭無效。蓋此時日政府早決計脅迫中國割讓臺灣全省也。

### 第八節 日本提出條約之酷烈及中國之損害

休戰條約既成立。媾和條件乃開始談判。陸奧全權按談判順序方法。定甲乙二案。甲案將媾和條件之全體一時提出協議。乙案將媾和條件分款提出。次第協議是也。東邀李全權之子經芳至會議所。令即自擇便宜。經芳要求甲案。三月初七日。遂由陸奧提出媾和案全體。送交李全權要求於四日內答覆。其概要如左。

#### 一、中國確認朝鮮爲完全無缺之獨立國。

二、中國割讓奉天省南部及臺灣澎湖列島與日本。甲、奉天省南部之地。以自鴨綠江口至三叉子。由三叉子北至榆樹底下。又正西至遼河下。至北緯四十一度之地點。又沿同緯度至東經百二十二度。張家屯止沿該二經緯線以內之地。及遼東東岸與黃海北岸之諸島嶼。均爲割讓地域。乙、臺灣全島及澎湖列島。與其附近諸島嶼。均爲割讓地域。

### 三、賠償日本軍費銀三億兩

四、以現時中國與歐洲各國所有諸條約爲基礎，結中日新條約。即歐洲列國對中國所有之利權，日本皆得享有之。此外中國更讓以左之七項：甲、開北京、湘潭、重慶、梧州、蘇州、杭州爲通商口岸。乙、揚子江上流宜昌、重慶間。西江下流廣東、梧州間。自揚子江溯湘江至湘潭。自上海經吳淞口入運河，以蘇州、杭州間之四航路。准日本汽船自由航行。丙、中國對於日本所輸之貨物，除納原價百分之二以抵代稅外，其餘一切稅金皆免除之。對於日本人在中國內購買之輸出貨物，無論何項稅目，皆免除之。丁、日本人輸出入之貨物，有借貸倉庫之權利。免除入倉稅。戊、日本國民對中國所納之諸稅及手數料等，得以日本銀貨代納。己、日本人得在中國內地，從事各種製造業。庚、浚滌黃浦河口之吳淞淺灘。

五、爲擔保條約之實行，日本軍隊暫時占領奉天府、威海衛二處。俟賠款償還

及通商條約批准交換。然後撤回軍隊。且占領中之軍費。由中國負擔。

李全權接此提案。於三月十一日。草長文辯駁書。分朝鮮獨立。割讓土地。賠償軍費。通商權利。四大綱。遂段辯論。要求輕減條件。翌日日全權答言。貴全權勿徒爲怨言。哀訴。須速覆全案。諾否。或分條諾否之決答。同日。中國政府以李全權負傷。恐礙和局。添派李經芳爲全權大臣。經美公使照會日本。十二日。伊藤復招經芳至會議所。謂休戰期間。僅餘十四日期限。以明日與確答。經芳以割地。償款。二問題。過於重大。請再經兩國全權會商。然後提出回文。伊藤又峻拒之。復爲威脅之詞。謂貴全權須熟慮。今日兩國之地位。卽日本爲戰勝國。中國爲戰敗國。是也。戰爭結果之要求。不可以通常談判爲比例。不幸談判破裂。六七十艘之運漕船。以一令之下。載大軍向戰地。北京之安危不可知。故此已非遷延時日之際。經芳歸告李全權。翌十三日。向日本提出修正案如左。

一、中日兩國共認朝鮮爲獨立國。彼此不侵犯其獨立主權。

二、割讓地。奉天限於安東縣、寬甸縣、鳳凰廳、岫岩州之四處。南方限於澎湖列島。

三、償金爲一億兩。分四年半作五次還清。無利息。

四、中日通商條約。以現時中國與歐洲列國之條約爲基礎。自後兩國彼此皆以最惠國待遇。

五、爲擔保條約實行。日本軍隊暫以軍隊占領威海衛。

六、將來兩國間有紛爭。或條約上有誤解。起異議時。請第三友國爲仲裁者。

日全權接此案後。於十五日與李全權爲第五次會見。刻意磋商。毫無讓步。伊藤提出最終修正案如左。

一、朝鮮獨立。不能更改原案第一條之字句。

二、土地割讓。臺灣與澎湖列島如原案不變更。奉天省南部則改爲溯鴨綠江至安東河口。由該河口至鳳凰城、海城及營口以南之地。并遼東灣東岸、黃

### 海北岸之諸島嶼。

三、償金爲二億兩。分七年、八次還清。每年分百分之五之利息。

四、通商條約。如原案不變。更。但新開市場。減爲沙市、重慶、蘇州、杭州。四處自由航路。改爲宜昌、沙市間。與上海、經吳淞、江入運河。至蘇州、杭州間。

五、不認設仲裁者。處理兩國紛爭之條件。

李全權力爭營口不割讓。且以日本軍隊並未占領臺灣。力駁臺灣割讓無理由。然伊藤力持此最終提案。謂一字不能更改。限三日確實答覆。李全權以俟北京回電。請再延期。伊藤祇許延長一日。時休戰期日已將屆滿。日本運兵船陸續過馬關。李全權迭電總理衙門。痛陳形勢迫切。總理衙門覆電。謂可爭轉一分。則爭一分。十九日。李全權又致總理衙門電云。本日三十餘艘運兵船已過馬關。向大連。小松親王等。即督隊前進。明日爲最終會議。如和議不成。則京師不可保。故不得已。擬不俟電訓。將條約蓋印。三月二十日。西五月十五日兩國全權爲第六次會見。李

全權遂不爭一語。全認日本之要求。結媾和條約二十一款。卽世所稱馬關條約是也。其主要事項如左。

一、中國確認朝鮮爲完全無缺之獨立自主。故凡有虧損獨立自主體制。卽如該國向中國所修貢獻典禮等。嗣後全行廢絕。

二、中國將管理下開地方之權。併將該地方所有堡壘、軍器、工廠及一切屬公物件。永遠讓與日本。甲、奉天省南邊地方。從鴨綠江口。溯該江以抵安平河口。又從該河口。折線劃至鳳凰城、海城及營口。而止。所有前開各城市邑。皆包括在劃界線內。該線抵營口之遼河後。卽順流至海口止。彼此以河中心爲界。遼東灣東岸。及黃海北岸。在奉天所屬諸島嶼。亦一併在所讓界內。乙、臺灣全島。及所有附屬各島嶼。丙、澎湖列島。卽英國格林尼次東經百十九度起。至百二十度止。及北緯二十三度起。至二十四度之諸島嶼間。右割讓地方之中國人民。願遷居割讓地方以外者。准於二年內。任便變賣所有產

業退去界外。但二年期滿之後。尙未遷徙者。酌宜視爲日本臣民。

三、中國賠償日本軍費庫平銀二萬萬兩。一萬萬兩。自本條約批准後十二個月內分二期交清。餘一萬萬兩。自本條約批准後七年內分六次交清。未經交完之款。按年加五釐利息。

四、兩國從前之條約。一概作廢。中國以與泰西各國現行約章爲基礎。速與日本結通商航海及陸路交通貿易新約。又遵行以下諸項。甲、中國現今已開通商口岸之外。應准添設下開各處。立爲通商口岸。以便日本臣民往來僑寓。所有新開沙市、重慶、蘇州、杭州各口岸。日本得置領事官駐紮。乙、日本輪船。得駛入下開各口。附搭行客。裝運貨物。一、從宜昌至重慶。二、從上海經吳淞江入運河。以至蘇州、杭州間。丙、日本臣民在中國內地購買貨件及生產物。或將進口商貨運往內地之時。得有暫租棧房存貨之權。並免除稅鈔。及一切派征諸費。丁、日本臣民得在中國各通商口岸城邑。任便從事各項工

藝製造。又各項機器進口。僅納進口稅。日本臣民在中國製造一切貨物。其於內地一切稅課及租借棧房之利益。即照日本人民輸入中國之貨物一體辦理。至應享優例豁除。亦莫不同。

五、爲擔保本條約實行。日本暫以軍隊占領威海衛。俟第一第二兩次賠款交清。作爲剩款並息之抵押。又通商行船約章批准互換之後。將通商口岸關稅。日本可允撤回軍隊。倘中國政府不即確定抵押辦法。則未經交清末次賠款之前。及通商行船章程未經批准互換以前。雖交清賠款。日本仍不撤回軍隊。

本條約締結之外。更訂別約三條。即規定占領威海衛之軍隊。不得越一旅團。駐屯地域。限於威海衛沿岸四十里之地。週年軍費。由中國津貼庫平銀五十萬兩。又休戰期限。延長至四月十五日止。和議既終。李全權於三月二十三日回國。日本旋命內閣書記官伊東已代治爲換約全權大臣。中國亦派伍廷芳、聯芳爲換



約全權大臣於四月十四日在煙臺交換。

觀此則條約中之割讓臺灣及擴張日本通商權利皆在日本戰勝應得權利之外。中國竟拱手聽命則戰敗國之價值可以見矣。至朝鮮問題既由中國片面承認其完全獨立而又割遼東以斷中國與朝鮮之聯絡則朝鮮之入日本掌握更不待言。以後日本據旅順、大連爲海軍根據以制黃海、渤海之海權而中國北部數省之命運亦爲所扼矣。據澎湖爲海軍根據以制南海之權而中國南部數省之命運又爲所握矣。且其工商業既在中國內地大加擴張矣而又享片面的最惠國條例以收永久利益則我國之損害實不可思議。當時在廷臣工均反對和議紛紛陳奏。湖廣總督張之洞且主張割新疆北數城賂俄割西藏南數城賂英請其助我攻擊日本一雪此恥。此雖書生之見未必能盡如人意。然馬關條約之損權辱國固我中國人民所切齒不忘者也。臺人尤憤。主事邱逢甲登臺誓衆於新竹宣言臺灣爲獨立民主國。舉巡撫唐景崧爲總統。通電中外冀得中國與列

強之贊助。願無應者。中國政府且勵行和約。既諭禁中外臣工不得再行論奏。復於五月初旬。遣派李經芳爲割臺使。並禁止內地運輸軍火入臺。臺人勢孤。又以軍民不習。故不十日間。內亂旋作。城中火起。總統微服出亡。日兵來收城。於是臺灣省之地圖。遂變更顏色矣。同年六月十一日總理衙門又與日公使林董依馬關條約所規定另締中日通商行船章程十九條

### 第九節 俄德法三國之干涉與遼東之返還

俄羅。斯。經。營。遠。東。雄。心。勃。勃。匪。伊。朝。夕。祇。以。海。參。崴。即浦鹽軍港。長期結凍。且又易爲日本海軍所制。致其囊括亞東之志。終未得伸。而我國旅順。大連。爲東方最有價值之軍港。若一旦爲日本所有。則俄國將永絕東海之希望。故自馬關訂約開始。俄政府聞中國有割讓遼東之事。遂決意起而干涉之。西四月九日俄國開陸軍委員會。議決聯合俄法之東洋艦隊。以制日本於海上。蓋俄法本同盟國。法固有不能拒俄之請之關係在。時德國又爲德意奧三國同盟中之主位。與俄法同盟有對立之勢。彼此牽合。正非易易。嗣德人見俄法兩方面日加親密。

且見日本大擴張其工商業於中國。於己國貿易將受損害。乃亦乘機與俄國相接近。一可以融和俄法之感情。一以挫折日人之勢力。而自保其在東方貿易上之利益。於是三國抗議之運動成。而日本乃不得不俯就範圍矣。

三月三十日。駐日之俄法德三公使。先後訪日外務省。以本國政府之命。勸日政府放棄遼東半島。其大旨謂日本若占領遼東半島。則不僅中國之國都日危。即朝鮮之獨立亦歸有名無實。是極東和平之大障礙。應特以誠實之友誼。勸貴政府放棄該半島之領有權。以保平和。時俄人已將己國軍力著著準備。令其海軍中將智爾多福。將所統之太平洋艦隊。共二十九艘。約七萬三千噸。迅即退歸本港。又令其東

部西伯利亞總督。統轄其現役兵。預備兵。共五萬人。全調集於海參崴。一若戰鬪即在俄頃間者。海參崴軍務知事。並以公文通告日本領事云。奉本國政府之命。本處為臨戰地域。日本居留人民聞之。倉皇退去。日政府接到三國抗議。並聞俄國預備軍力之消息。上下人心。極為慌亂。蓋其時日本勁兵。悉屯駐遼東半島。軍

艦之精良者。亦悉向臺灣澎湖出發。本國沿海各地海陸軍備。全然空虛。於是伊藤總理提出三策。交付御前會議。一、斷然拒絕三國勸告。二、遼東問題。付列國會議議決。三、依三國要求。以遼東返還中國。閣員以內外形勢。不能新增敵國。決議行第二策。時陸奧外務養病於舞子。伊藤即夜奔舞子。徵其意見。陸奧極反對之。謂招請列國會議。則俄德法三國外。必另請二三強國與會。恐各國主張己國之利益。議論紛紜。必不能限定遼東半島。萬一枝節橫生。則馬關條約必至全體破壞。伊藤亦深以爲然。遂決行第三策。陸奧又恐中國政府乘三國干涉。不肯批准馬關條約。因主張對三國與對中國之政策。區分爲二。即對三國讓步。對中國不讓步也。然陸奧仍冀有所挽回。曾電訓駐俄日公使。以日俄兩國歷年親密。勿傷善鄰關係。求俄國政府熟慮。旋得覆稱。俄政府嚴拒請求。且嚴整軍備。維時駐英美之日公使。亦各得其本國政府訓令。請其駐在國政府。出爲援助調停。乃英美兩國。亦止聲稱限於局外中立之範圍內。可與協力。是英美之援助調停。均屬無

望。除決行第三策對三國讓步外。無他法也。

四月初七日。

西四月三十日

日政府又命駐俄日公使。以日本除留金州廳外。其餘遼東

半島。悉依俄國勸告。放棄其占有權。但日本得向中國索相當報償之照會。送俄國外務省。顧日本之占有金州。卽占有旅順。得此以爲海軍根據地。則雖放棄遼東全半島。而於俄國仍形不便。故仍嚴詞拒絕。且中國政府以三國干涉爲口實。亦經美公使介紹。將馬關條約批准交換之時間。要求展限。至是陸奧外務以對中國對三國之兩問題。不速分別決定。勢必互相牽制。恐馬關條約已成之局。因而推翻。遂與閣員決議。一面聽三國之勸告。拋棄遼東半島。以截住外交難問題。一面將馬關條約。嚴催中國批准交換。不得拖延。四月十三日。電命駐俄德法三國公使。向三國政府提出照會云。日本帝國政府。依俄德法三國政府友誼之忠告。願將遼東半島永久占有權。全然拋棄。十七日。三國駐日公使。各向日本政府稱奉本國之命。贊揚日本爲宇內謀平和。並述祝詞。於是中日兩國於芝罘換約。

後。復將條約內第二款所列奉天省南部之割讓地。全行返還中國。而中國仍納庫平三千萬兩。以報償日本。中日戰局。遂以此告終。

#### 第十節 中日戰爭之結果爲列強分割中國之開端

馬關條約。中國所蒙損害。盡人知之。然當時實行侵略主義。而完全告厥成功者。僅一日本而已。苟外交當局。經此創巨痛深之際。爲懲前毖後之方。有精銳之眼。光則幣重言甘者。無以施其計。有靈敏之手腕。則威脅力迫者。無以逞其強。又豈至有豆剖瓜分之禍。爲埃及印度之續哉。乃自甲午戰敗以後。一無振作。德借膠州。俄租旅大。法借廣州。英借威海九龍。各劃定其勢力範圍。利益範圍。以促我國人之命運。其間礦山鐵路權之貿然許與者。更指不勝屈。國威既墮。國權隨之。我國人傷心飲恨之事。又孰有過於是者耶。

當李鴻章赴日議和之際。與駐京俄公使喀西尼約曰。俄國若能從中爲我助力。則中國當與俄以何項報償。鴻章因與喀公使私相約束。在俄使館密議數日。其

後俄國干涉割讓遼東問題。雖全出於己國之侵略主義。然亦由鴻章報償之言。有以歎動之也。嗣中政府欲急償日本賠款。以撤去威海衛之日本駐屯軍。而又以戰敗之餘。無力應付。俄皇尼哥拉斯二世。運其敏腕。下俄國政府擔保之詔。勅命俄法銀行。以四分之息。應中國初期公債一億兩。以救中國之窮困。其市惠於我者。至矣。迨遼東返還以後。而俄之索償於我者。尤急。喀公使即欲將前與鴻章私約者。提出作爲公文。要求總署。值物議沸騰。鴻章罷職。入閣閒居。於是暫緩其事。一八九六年五月二十六日。爲俄皇加冕巨典。喀公使遂百計運動。鴻章充賀使。中國政府先派湖北藩司王之春爲賀使。喀公使抗言王位卑言輕。不足當此。可勝任者惟李中堂耳。乃改派鴻章。且謂遼東事件。俄國有力於中國。甚大。不可不確定報償條件。又日本以還付遼東之恨。將捲土重來。中國欲保全疆土。不可不與俄國爲協同防禦。故須與李鴻章全權俾得協定一切。中政府悉應其要求。鴻章既行。俄人逐之以兵艦待之。以王禮。鴻章感之。遂於謁見俄皇。呈遞國書之後。即往俄舊都莫斯科。與俄國財政大臣微德締結中

俄密約六條。其主要之點。蓋爲防禦日本之侵略。而中俄兩國有攻守同盟之性質。俄國並利用此名義。使西伯利亞大鐵道得橫貫黑龍江吉林二省。以達海參崴。無事之日。亦可由此鐵道輸送兵糧。以逞其侵占滿洲之志。其鐵路之築造權。則由中國國家交與華俄銀行。並由中國駐俄公使與銀行另訂合同條款。顧當日所傳中俄密約之九條。與此全異。卽世所謂喀西尼密約是也。其主要之點。蓋借援助中國防禦別國侵略之名義。使滿洲全立於俄國勢力範圍之下。以後來之實際觀之。則前之六條較爲確實。雖中國政府曾拒不批准。然以俄使喀西尼直接間接之運動。卒皆承認之。於是華俄銀行。不得不實行設立。華俄銀行各種條件。不得不照約由駐俄中國公使與之締結。

華俄銀行者。爲中俄兩國合資之營業。中國政府出庫平銀五百萬兩。於光緒二十二年七月二十日。由駐俄中國公使許景澄與俄國訂立契約。尙無損害我國之處。乃又有華俄銀行條例九條出現。其第二章銀行業務之第十項規定如下。



一、領收中國國內之諸稅。二、經營與地方及國庫有關係之事業。三、鑄造中國政府許可之貨幣。四、代還中國政府募集公債之利息。五、布設中國國內之鐵路電線。此數語之精神，卽以一銀行之名義，實行政治上之侵略。翌三日，景澄又與華俄銀行訂結東清鐵道公司條約十二條。該條約中，雖將中俄兩國應得權利分別規定。然如第一條規定，股票准中俄人民購買，而實則爲俄國所獨有。第十條規定中國於鐵道交界之兩地點，有設置稅關征收關稅之權。其實該鐵道竣工後之四年，在光緒三十三年始與俄國議定北滿稅關章程大綱，而各車站仍爲免稅地域。故中國所得權利，悉爲空文。他若該公司之用人，則悉任該公司之便矣。該公司之所有地，則概免地稅矣。俄國之海陸軍隊，則該公司有運送之責，而對於我則無一字提及矣。且最後一條，雖載明八十年後無條件歸還中國，及三十六年後中國可以收買等語，而獨於開車後，首將中國庫平銀五百萬兩，全數還清，則兩國合同營業之契約，又一筆勾消矣。於是俄國所享本條約之利益，不但廣大

無比。且日後所獲實權更逸出此條約範圍之外。旋於同年十一月。俄國又發布東清鐵道條例三十條。悉得我政府之承諾。此條例爲異日滿洲問題之最大關係者。一爲開採礦山。一爲設置警察。其第一條規定採礦條文如下。公司經中國政府之許可。得採掘與鐵道連帶。或與鐵道無關係之炭坑。且同時得營中國之別礦業及商社業。其第八條規定警察條文如下。爲保護鐵道及附屬物之地段內之安寧秩序。公司委任警察部執行其事。因此公司得制定鐵道之警察規則。夫採掘礦山。無左右距離里數之制限。則凡有礦山之地。彼皆可任意開採矣。若警察權。則屬於行政方面。以區區一公司而得制定警察規則。尤屬駭人聽聞。且日後俄於鐵道沿線。或置本國軍隊。或設華俄護勇。皆警察之變相。而從條約中之保護安寧秩序數字階之厲也。我國當局者昏昏墮入五里霧中。毫無覺察。於是俄國侵奪北滿之政策。遂以一合立銀行與一公司之名義高唱凱歌矣。翌年又獲得京漢正太各鐵道之貸資權。建築權。且與英政府締結英俄協約。規定揚

子江流域。爲英國之鐵道建築範圍。長城以北。爲俄國之鐵道建築範圍。則我國之蒙古滿洲。俄國遂明認爲己國之勢力範圍矣。

顧俄國攫取北滿洲之目的。雖已完全達到。而尙未得有良好軍港。以爲海軍根據地。則對於干涉遼東割讓之報償問題。仍未能滿其所欲也。迨後德國以曹州戕害宣教師一案。藉口占領膠州灣。俄遂命西伯利亞艦隊駛入旅順港。以防禦他國侵犯滿洲爲辭。援例要求租借旅順大連二港。及築造自哈爾濱至旅大之鐵道權。我國政府竟忍氣吞聲。不敢抗拒。翌年三月初三日。駐京俄公使巴布羅福。遂與李鴻章、張蔭桓締結旅大租借條約九條。其主要之點如左。

一、中國將旅順大連灣二處。及其附近一帶之地。以二十五年爲期限。租借與俄國。但期限滿後。得由兩國會商斟酌續借。

二、旅順口作爲俄國海軍港。祇准中俄兩國船舶出入。大連灣開爲商港。各國船舶皆得出入。

三、俄國自備經費。於旅順大連建築礮臺營寨。中國軍隊不准在界內居住。  
四、自哈爾濱至旅大之鐵道。與自牛莊沿海濱至鴨綠江之鐵道。由俄國築造。  
此條約卽世所稱巴布羅福條約是也。翌月又在聖彼得堡締結旅大租借續約。  
翌年三月兩國又專派委員將勘定租借地域訂立條約。八月俄政府卽將遼東  
租借地。改建爲關東省。置總督治之。以旅順爲首府。至此而三國干涉返還之遼  
東半島一變而入俄人掌握。且又以己國之高加索中央亞細亞西伯利亞諸領  
地爲比例。而置省設總督以治之。是直以中國之地土置諸己國之領內。所謂二  
十五年期限者。將誰欺乎。我國政府既束手聽命矣。彼日本政府以已經入口之  
食忽被逼而吐棄於人。其痛恨誠有難以形容者。識者知日俄之決裂與我國之  
首承其敝。又在不遠矣。

俄之占領旅大也。雖本於夙昔經營遠東主義。然苟無德人嗾使之。亦未必卽時  
遽行其侵略。蓋俄法同盟德奧意同盟兩相對峙。德既與俄接近。參與於干涉遼

東。返。還。問。題。以。融。和。俄。法。之。感。情。矣。然。自。中。日。戰。後。俄。法。同。盟。益。覺。鞏。固。德。人。深。恐。法。報。普。法。戰。爭。之。恨。俄。雪。柏。林。會。議。之。恥。則。德。奧。意。之。同。盟。將。被。其。蹂。躪。故。非。另。籌。兩。全。之。策。必。不。能。折。衝。於。無。形。於是遣密使德璀琳與俄密使伯爾諾福會議。唆使俄國乘日本海軍尙未擴張之前。占領旅順口。而德先占膠州灣。以資俄國占領旅順之口實。俄政府深然其說。遂各俟機以決實行。光緒二十三年十月。有山東巡撫李秉衡解散之遊勇。在曹州鉅野縣。殺斃德國宣教師二名。德皇卽命海軍少將齊德黎。率鐵甲巡洋艦一艘。二等巡洋艦三艘。先赴膠州灣。旋又任命皇弟顯理親王爲極東巡洋艦隊司令長官。率大軍向膠州灣。陸續出發。十月十九日。齊德黎到膠州灣。卽脅令青島礮臺守將章高元。退出礮臺。翌日。遂占領之。蓋膠州灣之在中國海面。爲貿易上軍事上最有價值之根據地。德如得此。以爲殖民地。則對於東洋方面。尤足以發展其國力。然其時駐京德公使海靖。向總理衙門開始談判。止要求懲辦官吏。賠償銀兩。及山東省內之築路開礦權而已。尙

未議及租借膠州灣之事。乃未幾。顯理親王之大艦隊抵膠州。曹州復有驅逐教師、殺害外人之謠言。德公使忽翻前議。向總理衙門要求租借膠州灣。九十九年。中國政府以德國大軍已抵膠州。遂爲其所脅。於光緒二十四年二月十四日。與德使締結租借膠州灣條約三章。其文如下。

### 第一章 膠州灣租界

一、灣內各島嶼及灣口。與口外海面之羣島。又灣東北岸。自陰島東北角起。劃一線東北行至勞山灣止。灣西南岸。自齊伯山島對岸劃一線西南行至笛羅山島止。又灣內全水面。以最高潮爲標之地。爲租借區域。

二、租借區域。德國行使主權。建築礮臺等事。但不得轉租與他國。中國軍艦商船來往。均照德國所定各國往來船舶章程。一例待遇。

三、租借期限。以九十九年爲期。如租期內返還中國。則德國在該灣所用款項。由中國償還。另以相當地域。讓與德國。

四、自膠州灣水面潮平點起。周圍一百里<sup>中國</sup>之陸地。爲中立地。主權雖歸中國。然中國若備屯軍隊。須先得德國之許可。但德國軍隊。有自由通過之權。

## 第二章 鐵道礦務辦法

一、中國准德國築造自膠州灣經濰縣、青州等處。至濟南及山東界。又自膠州灣至沂州。經萊蕪至濟南之二鐵道。

二、鐵道附近左右三十里<sup>中國</sup>內之礦產。德商有開採之權。

## 第三章 山東全省各項事務辦法

一、以後山東省內開辦何項事務。或須外資。或須外料。或聘外人。德國有儘先承辦之權。

該條約締結之翌年。德皇又頒布詔勅云。依一八九八年三月六日。朕之政府與中國政府在北京締結之條約。其所指定之膠州灣領土。歸德意志所占有。茲朕以帝國之名。置該領土於朕保護之下。並改名爲膠州灣保護領。是直以有期租

借之地域與德國獲得之殖民地同一待遇此無他蓋中國主權早已於租借條約中一筆勾消且各路礦之許與權及全省開辦事務之優先權皆將山東全省劃入德國之勢力範圍行使政治與利益範圍之區域工商業優先之內發端甚微止殺宣教而結果如此之重大實國際事件所僅見者

中國因遼東返還問題應給報償者俄德之外尙有一法國也先是駐京法公使智拉爾已於光緒二十一年五月二十八日與慶親王奕劻締結中法境界即法

土得擴張至渭公河上流東岸之地及陸路通商採新開思茅河口爲貿易場開及江洪河畔確認爲法國領土是也及陸路通商採新開思茅河口爲貿易場開先商辦權安南鐵道可延長至中國境內陸路關稅比光緒十二年之條約減輕思茅至安南接續兩國之電線是也專條附章同年法公

使又勸我政府再興福州船政局訂立再興契約翌年二月法公使伊穆卒拉又要求海南島不割讓與他國及延長龍州鐵道開採兩廣雲南礦山修繕滇安間通商道路我政府均承認之法國之對中國似已滿其慾壑矣然以報酬言尙不足以語此況至光緒二十四年列國對中國之形勢一變紛紛宰割視中國如俎



上肉法又豈能一無染指。遂由法公使伊穆秋貝爾向總理衙門提出要求案四條。一、廣東、廣西、雲南不割讓與他國。二、自東京至雲南府之電線。三、租借廣州灣九十九年。四、郵便事務由總稅務司管下分出。時郵務由總稅務司英人赫德兼管用法人承辦。除第四項因英人反抗不能成議外。其第一第二兩項總理衙門悉承認之。至第三項之租借廣州灣。雖總理衙門亦承認其大體。然租借區域與期間兩問題久議不協。忽廣州灣附近遂溪縣有殺害法士官二人、宣教師一人之事。法國政府遂訓令克爾提督以剿辦暴徒爲名。率領艦隊直逼港內。我政府不得不予以讓步。乃締結租借廣州灣條約。其文如左。

一、陸地南自遂溪縣所屬通明港。沿官道北至志滿墟。東北轉至赤坎。更東進調神島北部。復東至吳川縣所屬西礮臺後面之間。水面自吳川縣之海口外三里中國十里之水面起。沿岸西進至南通明港口外三海里之間。又東海島

即川島礮州島之全部。皆爲租借區域。

二、租借期限爲九十九年。

三、期限內全屬法國管轄。得爲軍事上設備。又對於人民得發布命令。但不妨害中國之主權。

四、中國船舶往來。準中國通商口岸同一待遇。

五、赤坎至安鋪之間。法國得設鐵道電線。

至此而法國對於中國所獲之勢力範圍。利益範圍。與他國不相出入。蓋廣州灣水深口狹。足以防止外敵。法得此爲海軍根據地。一足以爲其東京方面之防衛。一足以保其在兩廣之利益。且與香港對峙。尤足與英國保平衡之局者也。未幾又以廣西殺害教師伯爾德勒一案。向總理衙門要求南寧、北海間築路權。我總理衙門亦承認之。

英國對於中國之侵略政策。不爲我首。僅以均勢抵制之名義爲要求之口實。而其所握定之勢力。則實合列強之所獲勢力範圍。利益範圍。而兼有之。其手腕之

英而且辣。誠不可思議矣。當光緒二十二年八月、中俄密約喧傳之時、各國驚駭。英國尤極注意。迨十一月二十五日、俄國西伯利亞艦隊突據旅順。英公使瑪德納特。遂於翌年正月、向我總理衙門提出要求案。一、揚子江沿岸各省之土地、不得租借割讓與他國。二、開放內河三二年後、開長沙爲通商口岸。三、中國稅務司、永久雇聘英國人。總理衙門悉承諾之。無何、而中俄締結租借旅大條約。英公使復向總理衙門要求租借威海衛。謂俄以旅順爲軍港、則中國異常危險。惟以威海衛租與英國、庶足以制俄國之跋扈。時中國以威海衛擔保賠款、爲日軍所占領。藉爲口實。希圖拒絕。然英公使強硬不屈。謂能毀俄國租借旅順之約、則英國不租威海衛。蓋英人已知日兵將退出威海衛也。我國舉朝驚愕。無詞以對。遂由慶親王奕劻、與英公使瑪德納特。於光緒二十四年五月十三日、締結威海衛租借條約。其文如下。

一、威海衛灣內之水面全部、灣內劉公島及諸島嶼、與沿灣濱岸連內地十里

合中國之地。爲租借區域。  
三十里。

二、依俄租旅順例。以二十五年爲期限。

三、租借地歸英國管轄。但不妨礙租借地之兵備。中國官員。仍可在城。各司其事。灣內水面。中國兵船仍可使用。

四、格林尼址東經一百二十一度四十分以東之海岸。即寧海州以東至茶城角之北海岸及附

近。爲中立地。歸中國管轄。但英國得於域內擇地戍兵卒。築礮臺。爲一切防護。與適用諸事務。如設醫院修道路諸事。又域內除中英二國兵外。不許他國兵進入。

同年四月。適總理衙門對於法國租借廣州之要求。已承諾其大體。英政府復謂。已國在中國南部數省之勢力。將被法國蹂躪。命駐京英公使提出租借九龍島之要求。蓋其時中政府已允法國兩廣雲南三省。不割讓與他國之要求。九龍半島。可以俯瞰香港。若一旦入他人勢力。足以危及香港。故英人云。雖經總理衙門嚴拒。而英公使迄不讓步。且憤然拍案曰。我之請此地爲貴國讓廣州灣於法。

以危我香港也。我爲軍事之設備，不得不爾。若中國能拒絕廣州灣之約，則我之議亦立刻撤回。總理衙門無以難之。遂於光緒二十四年四月十八日，由李鴻章與英公使瑪德納特締結展拓香港界址條約如左。

一、自大鵬之西角起，沿大鵬灣北岸，以直線橫貫九龍半島，沿深圳灣北岸，與西方小半島出外海，以一直線南下，至南大澳島（大嶼）西南海面，東折橫過香港南端，而東與大鵬灣南下直線相會合。凡線內九龍半島全部、香港附近大小四十餘島嶼，又大鵬深圳二灣及香港四近水面，悉爲租借區域。

二、租借地以九十九年爲期。歸英國管轄，以不妨礙兵備爲條件。中國官員仍可在城內司事，居民依舊樂業。大鵬深圳二灣水面，中國兵船仍可使用。

依以上兩條約，英國對中國之勢力，北可與俄均等，南足與法平衡，且大鵬深圳二灣面寬水深，大軍艦可以自由出入。比之廣州灣形勢，又遠過之。自是英國東方海軍根據地，遂十分完備。當時又有山西河南二省與福公司訂立採礦之契。

約總理衙門又承認英公使建築天津鎮江間山西河南襄陽間九龍廣東間上海南京間浦口信陽間蘇州杭州寧波間之各鐵道。後天津鎮一線由英德交涉雙方規定自天津至山東南境境至鎮江之路由德建築自山東南境至鎮江之路由英建築同年八月更締結關外鐵道借款契約由英國駐俄公使查爾斯可德與俄外務大臣穆拉威福締結英俄協約規定長城以北爲俄國築造鐵道範圍揚子江流域爲英築造鐵道範圍依此協定英國遂公然認定揚子江流域爲己國之利益範圍矣。

以上所述若俄若德若法若英皆因中日戰爭之結果而不辭操刀以宰割我者也。而獨戰勝中國之日本除馬關和約所得權利外尙未爲得步進步之要求。饒吻垂涎已非一日乃於光緒二十四年之春伊藤博文第三次內閣成立遂以臺灣與福建接近利害相關爲辭命駐京矢野公使要求總理衙門以公文申明福建省及沿海一帶永不租借割讓與他國總理衙門亦備文承認之時意大利亦欲援均勢主義冀於中國海面得一海軍根據地故一面命其地中海軍艦向中

國海出發。一面命其駐京公使瑪爾七諾。向總理衙門要求租借三門灣。經總理衙門嚴詞拒絕。返還其要求書。意公使遂發最後通牒。要求四日內答復。幸英政府先已向意政府有希望勿用兵力之語。故其最後通牒。由意政府直令撤消。而三門灣租借之議。遂卒不成爲事實。此則因意之國力本不能與列強相頡頏。故中國不至爲其所脅。非盡由外交當局之處置得宜也。嗣後美國大統領麥荊萊。以超然第三者之地位。謀世界之和平。命國務卿赫伊向與中門關係之英德俄法日意六國宣言。開放中國門戶。得六國之贊成。而列強處置中國之問題。遂爲之一變。蓋投骨於地。羣犬相爭。斯時中國全局。雖已成分裂之勢。而列強之利益。衝突亦隱伏其中。其禍患將有不堪設想者。至是而各國以相互之利益爲相互之約束。對於中國。遂開保全領土及商工業機會均等之新局面。中國瓜分之禍。得因此而稍息其焰。

## 第二章 拳匪之禍

## 第一節 拳匪之略歷

元時有韓林兒。明時有徐鴻儒。皆奉白蓮教邪說。以惑世誣民。率黨起事。及滿清入關。該教徒黨。又以恢復朱明之宗旨。隱謀革命。乾隆之季。四川、湖北、河南、陝西、甘肅各省。蜂起蝟集。清廷派兵剿撫。至八年之久。始得蕩平。至嘉慶十八年。河南滑縣之李文成。直隸大興之林清等。暗結宮廷。謀傾清祚。京畿一帶。人心震駭。及事敗。凡奉白蓮教者。皆罹刑網。厲禁既懸。其教遂變名爲天理教。八卦教。二派。義和拳之名。亦起於其時。又爲八卦教之一支派。稱八卦教爲義和門。復因朝旨嚴禁。旋避義和拳名目。改稱爲梅花團、大刀會、黑燈照、青燈照、紅燈照。諸名目。其黨仍蔓延各省。而以山東爲最多。維時中國當中日戰敗以後。各國乘機宰割。勢力所及。人民側目。而天主教徒。尤恃有護符。欺壓平民。怨毒所積。民教久有不兩立之勢。於是拳匪卽利用此時機。以扶清滅洋爲標幟。而翼達其潛圖不軌之目的。光緒二十六年春夏間。遂有匪首曹福、張德成、李中來、及劉十九、王老師、曹老師、



幹老師、龐老師等。以乾坤震艮離坎兌巽等團之名。女匪黃蓮聖母等。以紅燈照藍燈照花燈照等之名。號召醜類。聚集京津。始僅蔓延於近畿。繼且波及於秦晉。專以焚教堂、滅洋人、誅教民爲事。洶洶之勢。不可嚮邇。卽無八國聯軍之禍。而輦轂之下。羣賊如毛。識者固知其不能爲國矣。

## 第二節 滿清政府崇尚拳匪之原因

中國自被日本戰敗後。割臺灣。賠巨帑。已有岌岌不可終日之勢。嗣後俄據旅大。德據膠州。英據威海九龍。法據廣灣。又各省之築路採礦權。亦皆墮落於外人之手。國是日非。轉瞬卽步埃及印度之後塵。時清德宗英年親政。急思發憤自強。且鑒於世界之潮流。知非變法不可。適工部主事康有爲。先後五次上書。痛論國勢。阡危。泣懇變法維新。德宗深然其說。命王大臣進達其意見書。一見尤爲嘉許。遂於光緒二十四年四月二十三日。下更新國是之詔。翌五日。召見有爲於頤和園之仁壽殿。諮詢政略。多見採納。旋命入總理衙門行走。凡百新政。雖未及見諸實

行然明詔所頒天下耳目已爲之一新。先是有爲在北京組織保國會，朝士附之者數百人。有御史潘慶瀾等，屢加彈劾。自康召見後，彈者益衆。德宗毅然不爲所動，並以康之同志楊銳、林旭、劉光第、譚嗣同四人爲四品京卿，參與新政。凡有章奏皆經四卿閱視，凡有詔勅皆經四卿屬草。盈廷頑固黨因之大失勢力。其急欲推翻新政以保全祿位，蓋不可須臾緩矣。時今大總統袁公正在北洋練兵，康以爲促改革之進行而杜反動力之激起，不能不內外相維。然亦不料事變之至有如是之速也。至八月初七日，西太后那拉氏忽有垂簾訓政窮治黨人之事。十三日逮楊銳、林旭、楊深秀、譚嗣同、劉光第、康廣仁於獄，旋即殺之。康與其門弟子梁啟超出亡海外，得免於難。自是政府全權悉畀諸羣小之手。詔一切政治復舊，而又恐德宗一日不去位，終不利於彼輩，遂託詞皇帝病重，下詔徵醫。呂武之禍固卽在於眉睫間也。幸英公使亟向總署王大臣忠告，謂萬一中國皇帝有意外之變，影響所及歐洲各國，將與中國以不利。江督劉坤一亦電爭有死，不奉詔語。纂

弑。隱。謀。稍。沮。而。翌。年。十。二。月。二。十。四。日。復。有。謹。遵。慈。訓。立。端。郡。王。載。漪。之。子。溥。儀。爲。大。阿。哥。繼。承。穆。宗。毅。皇。帝。爲。子。之。詔。此。詔。名。爲。立。儲。而。其。實。不。止。立。儲。也。故。上。海。紳。商。經。元。善。等。及。海。內。外。紛。紛。電。奏。廢。立。又。不。果。然。載。漪。等。諸。宗。室。則。以。是。而。得。秉。執。政。權。矣。顧。此。輩。生。性。愚。悍。素。富。排。外。思。想。又。不。知。公。法。以。爲。外。人。將。挾。康。梁。以。謀。中。國。於。是。怨。毒。益。甚。又。以。國。家。積。弱。之。餘。決。無。能。力。與。列。強。一。決。雌。雄。也。乃。冥。搜。遠。想。時。思。得。一。策。以。洩。憤。適。調。任。晉。撫。毓。賢。以。義。和。拳。皆。義。民。且。有。神。技。可。用。貽。書。朝。貴。欲。倚。之。以。逐。外。人。且。將。匪。首。李。中。來。介。紹。於。載。漪。一。時。政。府。中。人。如。飲。狂。藥。以。爲。今。而。後。庶。其。可。以。達。吾。目。的。矣。乃。利。而。用。之。故。義。和。拳。實。政。府。與。民。間。之。合。體。也。此。拳。匪。猖。獗。之。所。由。來。而。其。仇。視。異。教。特。不。過。發。軼。時。藉。口。語。耳。

### 第三節 拳匪排外時之勢燄

山東全省本拳匪之產生地。自光緒二十五年。今大總統袁公爲山東巡撫。四處痛剿。拳匪遂竄入直隸境內。迨二十六年三四月間。京津一帶。設壇練拳。比比皆

是直隸總督裕祿。窺見政府有利用匪徒之意。因不敢出果斷之處置。於是易州之天主教堂。於四月十九日。首先被燬。且與官軍對抗矣。琉璃河鎮。長辛店。蘆溝橋。豐台。諸車站。又於二十九三十等日。先後被焚矣。時居留保定長辛店之外人。倉皇逃入北京。駐京各公使。亦亟調近海諸國水兵入京。護衛使館。五月初旬。英美德俄法意日七國弁兵。凡四百五十人。次第入京。載漪大怒。遂公然大唱召集義和拳。以張國威之說。而各公使聯牘詰問政府。西太后不得已。乃命軍機大臣剛毅。趙舒翹。赴涿州解散匪徒。實則陰使其察看匪情。究竟能爲國家用否也。時黃村車站。已被焚燬。京津鐵道。交通斷絕。雖經直隸提督聶士成。在落垡地方。殲匪四百八十人。反被嚴旨申飭。而召甘肅提督董福祥。率軍移駐京城。各公使以福祥在肅州時。有殺害外人事。至是要求董軍移駐五十里以外。福祥因此尤爲憤憤。遂與拳匪合爲一氣。五月十五日。日本使館書記杉山彬。爲董軍所殺。京城內外各教堂洋房。及正陽門外繁盛街市三千餘戶。爲拳匪所焚。王公邸第。及大

公主府亦皆延致拳匪建壇教拳。狼奔豕突已成。尾大不掉之勢。使剛趙回自涿州力陳利害。破除邪說。或尙可挽回於萬一。乃剛毅則力保拳民忠憤可用。舒翹又同聲附和之。於是政府遂決議三事。一保護義和團。二不攻使館。三拒絕洋兵。上陸顧拳匪本以殺滅洋人爲宗旨。今又議及保護。則雖欲禁其不攻使館而勢有所不能。若洋兵之來爲拳匪而來也。今旣保護拳匪。則洋兵之上陸。又何能拒絕之。拒之不能。則舍開戰外無他法也。

自是不數日。戰局卽開。政府命莊親王載勛與剛毅統率義和團。並派左右翼總兵英年、載瀾會同辦理。並先後發給團匪米數萬石。銀數十萬兩。以獎勸之。時有吏部侍郎許景澄、太常寺袁昶以拳匪不可恃。外釁不可開。冒死入諫。章凡三。上皆誣其擅改上諭。以大不敬正法。未幾復殺兵部尙書徐用儀。戶部尙書立山。內閣學士聯元。此輩狼子野心。政府旣鼓勵之。而於臣工不肯附和者。又輒駢戮之。於是匪燄愈熾。更無復有所顧忌矣。圍攻東交民巷各國公使館。及城內各教堂。

戕殺德國公使克林德。京城內外。焚殺無虛日。且蔓延所及。如直隸灤平縣。宣教師之被生理。宣教師墓之被挖掘。景州教民之被攻殺。京正鐵路技師與家屬之被襲擊。元城大名南樂各縣宣教師之被虐待。以及奉天省之殺外國教師四人。中國教師二人。黑龍江省之殺教師三人。呼蘭城之殺教師二人。掘教師墓一所。巴彥州之殺教師二人。浙江衢州之殺外國男女七人。又湖南衡州。江西南豐。南城。河南南陽等處。皆受其影響。而同時釀成巨案。一時風起雲湧。實爲古今所僅見。且教師被殺之地。教堂卽隨之而焚。搶教民卽偕之而同燼。其爲狀至爲慘酷。又何怪外人之視我爲野蠻耶。

然當時教案之烈。尙未有如山西之甚者。巡撫毓賢。本頑固黨之尤者。光緒二十六年四月。由魯調晉。下車未久。卽封閉武備學堂。命機器局搜羅廢鐵。製造刀矛劍戟。略有新知識之道台閻迺竹等。皆同時被劾去職。無何而京津一帶。拳禍大作。晉省榆次太谷壽陽祁縣平定等處。聞風興起。焚教堂殺教民之案。日有數起。

各牧令紛紛報警。毓賢悉置不答。凡公牘中有拳匪字樣者。以硃筆抹勒之。有義民字樣者。以硃筆圈識之。於是司道官以下。無不揣摩而迎合之者。旋毓賢又派候補知縣趙爾頤赴榆次。迎拳匪數千名入省。爾時各縣宣教師及妻女僕從等。皆入省請求保護。毓賢陽爲接待。使之居處一室。不數日。悉殲之。撫署大堂之下。尸纍纍然也。計共殺外國男女四十餘名。又教民等七十餘人。城內教堂。亦同時焚燬無遺。風聲所播。四處響應。汾州府教師十人。河津縣教師及家族七人。大寧縣女教師二人。忻州宣教師十餘人。歸化城宣教師十四人。隰州宣教師一人。曲沃縣宣教師一人。家族三人。太谷縣寧遠廳和林格爾城。托克托城等處。宣教師共十餘人。以及各處教民。共四千餘名。均先後被害。教堂之焚燬。教民財產之損失。則隨在皆是。無一完善之地。其附近山西之蒙古達特拉達喀拉善王各旗屬。教民亦遭波及。又共殺死宣教師數人。教民八百餘人。而頑固僚屬。如臬司陳澤霖。道員鄭文欽。知府徐繼孺。許涵度。知縣章之傑。周之驤。郭之樞。崔澄寰。徐桂芬。

毛世黼、李恕、白昶、王廷英、黃廷光、姚學康等百十餘人。或統帶匪徒。或手刃外人。或乘機敲詐。有藉此以作威作福者。亦有藉此以逢迎上司。以爲升官發財計者。質言之。凡自官僚以迄商賈。輿臺皆拳匪也。自衙署以迄大街小巷。皆拳匪設壇練拳之地點也。人情洵湧怪狀百出。誠千古以來之奇舉也。

#### 第四節 各國軍隊之聯合及攻陷占領各地與清室西狩之情形

當五月初間。各使館尙未被圍攻。德公使尙未被戕害。而京津鐵道已被破壞。各國駐京公使。見形勢不穩。電促碇泊大沽之各國軍艦。派兵入援。英國東洋艦隊司令長官摩西爾。於五月十四日。率英、美、俄、法、德、奧、意、日八國之陸戰隊二千五百人。由天津向北京進發。迨至楊村。以鐵道被燬。駐軍修繕。翌日黎明。拳匪約百人來襲。被聯軍擊斃三十餘名。十八日。至郎坊。又有拳匪三百人來襲。亦被聯軍擊斃八十餘名。十九日。拳匪破楊村以南之鐵道。以斷聯軍與天津之聯絡。於是聯軍遂困於楊村郎坊間。二十二日。董福祥復率甘軍進攻楊村。交戰半時許。敗



退。摩西爾援軍終爲甘軍拳匪所困。苦戰不得達。遂折回天津。時政府已於二十五日下宣戰之詔。聶士成軍。卽於是日。拒摩西爾於北倉南倉間。激戰三時之久。聯軍死傷甚衆。因卽棄北倉。依白河堤夜遁。旋占據西沽礮臺。並密遣人至大沽告急。大沽西軍卽派俄兵二千、英兵一千五百、德兵五百。赴援。中途遇聶軍。且戰且進。二十七日。抵西沽。遂與摩西爾軍相合。六月一日。攻北洋機器局。占領之。奪武庫槍礮。焚火藥庫。遂率全軍退還天津租界。

當摩西爾之困於楊村郎坊間也。拳匪又分股進攻天津租界。各國碇泊大沽軍艦之海軍將校。鑒於形勢日急。乃協議決定方針。以爲制勝地步。五月二十日。以大沽礮臺須暫時讓與聯合軍之公文。由俄士官送付礮臺守將羅榮光。榮光答以非奉直隸總督之命。決不將礮臺讓與。若強硬要求。卽開礮攻擊。俄士官云。此爲聯軍正當之要求。如今夜十二句鐘不撤兵。則聯軍將自取之。卒不得要領而退。大沽礮臺分南北二座。一在白河口北岸。爲第一礮臺。第二礮臺在白河口南

岸。同日午後。英俄陸戰隊各二百名。德兵百餘名。日本兵二百餘名。已由塘沽上陸。夜深時。聯合艦隊已向礮臺前面發礮。陸戰隊亦同時進擊。俄兵當第一線。英德兵當第二線。日本兵當第三線。臺上聞礮應戰。彈丸雨下。俄英德兵皆逡巡不敢進。惟日兵最奮勇。服部中佐。命以野礮二門爲中心。左右作縱隊。衝俄英德兵而過。渡流斷橋。猛厲直進。旋服部中彈立死。而兵氣仍不稍沮。突入礮臺下。俄英德兵亦漸進入壘下。日兵攀壘而登。守兵驚走。第一礮臺遂陷。復猛攻第二礮臺。登時亦下。其南岸礮臺亦由陸戰隊同時占領。於是日軍據第一礮臺。英軍據第二礮臺。俄德軍據南岸礮臺。敗報至北京。政府更怒。下詔促戰。於是拳匪官軍遂公然聯合以禦外兵矣。拳禍之初作也。日外務大臣青木周藏。以中日接近。日出兵救援各國公使。實爲唯一之便利。且遇此千載一時之機會。又豈能落人後著。然苟非英國爲同一之行動。尙不免受列強之異議。曾兩次命駐英公使與英政府提議。斯時英國政府認爲無出大兵之必要。漠然置之。迨摩西爾軍受困於楊。

村郎坊間。拳匪之勢益張。駐日英公使。遂訪青木外務云。奉本國政府電訓。以日本地理上便宜。特望出兵。青木大喜。卽以英國政府勸請出兵爲名。決派一師團向大沽。然恐他國懷疑。復請英政府周旋於列國政府。請其承認。於是英政府遂照會俄德二國。嗣俄政府則回文贊成。德政府則回文反抗。然於詞意間。皆特爲之制限。蓋恐日本出兵後。得有特別權利也。時天津租界與北京各使館。被拳匪圍攻。勢極危險。英政府遂不顧德政府之異議。頻促日本出兵。日政府以遣派大兵。需用軍費不貲。又故作躊躇之態。英政府復照會日政府。願於財政上之補助。竭力擔承。日政府得此宣言。遂令派定之一師團。向大沽進發。然此一師團之外。日本先已編成步兵二大隊。騎兵一中隊。礮兵一大隊。工兵一中隊。及輜重隊等。爲混成枝隊。紛紛出發。一爲保護本國臣民。一爲如有決裂。得與列強保均勢之局也。此爲第一次派遣隊。以福島安正爲司令長官。於六月初三日到天津。與各國軍隊聯合。爾時天津附近之中國軍隊。有直隸提督聶士成之武衛前軍二十

五營。浙江提督馬玉崑之武衛左軍十五營。天津鎮總兵羅榮光敗退之兵約三千人。總督裕祿直轄之兵約二千人。兵力甚厚。聯軍屢遭襲擊。不敢輕進。至六月中旬。日本第二次派遣隊。即一師團兵與英法俄美援軍次第到津。總數共一萬四千人。始依福島計畫。爲天津總攻擊。

六月十七日。聯軍進擊天津城。以俄德二國兵沿淀河前進。迫水師營附近礮臺。以拊津城之背。日法二國兵由本道攻天津南門。以扼津城之前。英美二國兵則尾隨日法兵之後。張兩翼而進。以爲後援。午前四時。日兵到海光寺。見無一守兵。急入據之。寺距城僅一千三百米。突。城兵瞭見。發礮瞄擊。日軍作縱隊而進。死傷頗衆。至九時。頃。進距城門三四百米。突。因前阻深濠。頓兵不進。亟命工兵赴濠架橋。至則原有橋梁。依然存在。旋即直薄城下。裝埋炸藥二十餘件。天明時。爆發城裂。全軍呼嘯而進。破其外郭。而內城上彈落如雨。日軍復冒死攀登。斬鑰啟門。城遂潰。守兵鼠竄。走。英法兵亦相繼入城。美兵則尾追敗兵於白河。殺獲無算。日美

英法四國兵。遂分據津城四門。各掠奪所據區域內之官民財產。研究國際公法者。頗惜之。戰時國際法。民有財產。公有財產。與官有財產。不供戰爭用者。不得沒收。時沿淀河進擊之俄德二國兵。尙未至水師營。十八日午前六七時。駐屯天津車站之日軍。探知津城已陷。守兵逃走。遂急攻水師營附近礮臺。與海關道衙門。及俄德兵到。而其地已悉爲日軍占領矣。初聶士成以拳匪竊名。忠義誤國。殃民痛剿之。於落堡。旣被朝旨譴責。因是見惡於匪衆。至大沽陷落後。士成任天津南方防禦。拳匪遂乘間戕其家屬。掠其財物。以爲報復。士成大憤。而聯軍復於天津總攻擊之。圍之於競馬場八里臺之間。士成進退維谷。因陷陣死之。官軍失此大將。南方之防禦遂虛。故聯軍進攻城南時。如入無人之境。至日兵之勇敢突進。非各國所及。尤爲此役首功。

楊村帶白河。連鐵道。爲京津間之形勝地。天津陷後。直督裕祿移駐楊村。提督馬玉崑、宋慶、總兵何永盛、呂本元、各軍約二萬人。亦分屯於楊村北倉間。聯軍初擬乘勝進擊。終恐衆寡不敵。因遲至六月末。援兵大集。始議定先破北倉。再攻楊村。

並分爲左右二翼。沿白河兩岸夾攻北倉。右翼爲日英美三國之兵。攻北倉之西。北面左翼爲俄德法奧意五國之兵。攻北倉之東面。而日兵更分一枝隊。沿白河。攻北倉南面。顧日英美三國之兵。雖以攻北倉爲目的。第北倉西南面之火藥局。及韓家樹之官軍。皆足爲其後顧之憂。不先破之。則不能達其目的。七月初十日。各隊自天津出發。十一日午前二時。右翼軍突攻火藥局。守兵倉卒應戰。逾時潰敗。火藥局遂陷。韓家樹之官軍亦如之。右翼軍卽乘勢繞過右方。扼北倉之背。時進攻北倉南面之日兵枝隊亦至。雙方夾擊。北倉卽陷。先是官軍跨白河沿鐵道。作直線防禦。復引白河水以遏敵軍。致俄德法奧意之左翼軍。阻於水。不克進。故北倉之破。又以日軍爲首功。十二日。英美俄法軍沿白河左岸進。楊村卽被攻破。日師團本隊沿白河右岸進。而其所分之一枝隊。又於十三日。占領南蔡村。裕祿遂倉皇自盡。自是聯軍沿白河進至河西務。擊馬頭鎮。占張家灣。勢如破竹。直入通州。奪獲軍糧器械無算。幫辦直隸軍務李秉衡。執拗成性。戰守機宜。素所不習。

甫奉命視師。驟遇大敵。舍一死外。別無他術。以自解。遂於六月十八日亦自殺。政府聞報大震。然防戰之兵。尙有端郡王載漪之神機營。虎神營。董福祥之武衛後軍。榮祿之武衛中軍。武衛左軍。與其他殘兵。約四萬人。較之聯軍。固我衆而彼寡也。況京城建築極固。攻陷尤難。如果使統兵大臣力保堅城。一面靜候各省勤王之師。一面命聲望素著之員辦理外交事宜。先向各國公使謝罪。任咎。斡旋和局。並以恢復秩序。剿滅拳匪。自任。則雖已兵連禍結。卒不免城下之盟。然京城地面。或猶不至蹂躪過甚。且各國亦知此次縱匪開釁。絕非出自德宗之本意。況自戊戌政變後。各國對於德宗。尤極拳拳。光緒二十四年八月英公使向總理衙門忠告謂萬一皇帝有意外之變。各國將與中國以不利。果使以德宗之名義。向各公使誠懇道歉。或西太后卽乘此時機。明詔歸政。則已危之局。必可復安。乃西太后以此。次戰事實與己大有關係。聯軍入京後。或將與以不利。遂決計於通州陷落後之三日。挾同德宗出奔。由地安門。德勝門。向萬壽山啟行。除西太后德宗及后各乘轎車外。其隨行王公大臣。寥寥數

人悉皆徒步。且倉卒之際。御用服食。均所未備。西太后僅衣藍布夏衫。德宗僅衣黑紗大褂。黑布戰裙。而沿途又爲敗兵搶劫。店肆皆空。無物可購。兼以道途不靖。護衛無人。危險之狀。饑寒之苦。有令人言之泫然者。旋遇見率兵勤王之岑春煊。遂護衛西行。並向沿途村落。搜括食物。以資供給。其朝中官吏。宮內宦豎。亦漸次追及。迨至懷來宣化間。而蒙塵之苦。漸得稍舒矣。維時聯軍先已會議。決定於七月二十日。直逼北京。俄軍以北倉各處。容易攻陷。意北京亦如之。竟貪功背約。於十九夜。卽猛向東便門開礮攻擊。日福島司令長官。與山口師團長。聞信驚駭。因命本國全軍。速由通州進發。比二十日天曉。已抵朝陽門外。以山礮三十六門。野礮十八門。置距朝陽門一千五百米。突之高地點。爲猛烈之轟擊。乃城堅不破。山口師團長。又募集工兵。決死隊七名。突至城下。裝置爆發彈。仍被城兵擊斃。山口旋下令工兵。限今夜九時十時間。爆裂城門。工兵遂組織破壞隊四隊。分赴朝陽門之第一門。第二門。東直門之第一門。第二門。裝置藥函。是夜黑雲掩月。城兵未



及覺察。迨裝置已畢。卽由隊長啓導電線。轟然數聲。該四門已次第破裂。日軍如潮湧進。城兵相率潰走。於是東直門進入之日軍。則沿城北以占領安定、德勝、西直、三門。由朝陽門進入之日軍。則以一枝沿天文臺、東便門、而通公使館。以一枝依朝陽門大街而進據皇城。其結局。則皇城三面及東安、地安、西安、三門。皆爲日兵於二十一日午前一時占領。同時。俄美二軍亦於東便門攀登而入。官軍少抗卽潰。惟英軍因廣渠門有教民啟鑰導引。故能先一日不戰而入。法軍在英軍之後。遲至二十一日黎明。方得入城。至此而載漪諸王大臣所轄之軍隊義和團。多被截殺。其倖免者。則結隊搶劫。白晝殺人。城圍戶井。靡不遭其塗炭矣。旋由聯軍以北京已無中國政府。遂協議決定。從朝陽門畫一橫線。其北部皆歸日軍管轄。南部以正陽門爲中心。東歸俄法二軍。西歸英美二軍。並設民政廳。各自整理其區域內之秩序。顧又各私其利。所轄區域內。無問官有民有之金銀寶物。皆掠奪之爲己有。既見利而忘義。遂爾詐而我虞。其甚者。俄法二軍占有景山、萬壽山。

與沿北海南海諸宮殿大起。日英之忌而日軍又收戶部金銀與占領皇城東西北三門亦大起。各軍之紛議雖屢開會議協定而卒歸於有名無實於是皇都之菁華與夫數千年相傳之寶物皆爲八國聯軍之戰勝紀念品矣。

聯軍占領北京以後中國政府雖已有和議之發動然帝后蒙塵愈行愈遠自八月十七日抵太原後又於閏八月初八日由太原西幸長安矣。聯軍知和議之不易成立也不得不於軍事上先期計畫以謀海陸之聯絡顧轉瞬入冬大沽冰凍海運將絕勢非占領山海關以達秦皇島大連灣等處不凍之港則北京之聯軍易有坐困之虞因要求北塘守將將礮臺讓與守將不應遂以一戰得之旋要求山海關守將讓與礮臺守將束手受命聯軍又占領之時德皇勅命之瓦爾德西爲聯軍統帥已得各國之贊成瓦爾德西遂於閏八月行抵大沽旋入北京組織司令部聞拳匪與董福祥之殘兵尙以保定府爲根據地卽下令聯合軍進攻保定以德兵爲甲縱隊英法意兵爲乙縱隊連日占領定興固城安肅等縣抵保定

後。見無兵匪與之抵抗。遂占領府城。並盡燒拳匪曾經匿跡之屋宇。嗣以和議漸入談判。瓦爾德西又在京城。以修繕京榆、京保、津榆鐵道及電線電信爲事。後更設立北京軍事警務衙門。行政委員會。其天津及各處占領地。亦皆設軍事行政機關。迨至翌年正月。以和議談判中。於元兇處罰問題。不得要領。復令聯軍遠攻西安府。且因晉省拳匪尙夥。代爲剿討。爲詞。組織大兵一萬五千名。由直隸經山西以達陝西。山西之固關。本有晉威新軍五營。湖南勁字兵五營。又榮祿所部之武衛軍。亦於敗退後潰入晉省。經當道檄令駐守直晉交界之所。其東北紫荊關一方面。則有陝西藩司升允之兵數營。兵力尙厚。且山路崎嶇。聯軍欲經過其間。亦非易易。然各營皆烏合之衆。紀律極疎。以之禦敵。則不足以之。生事。則有餘。時山西巡撫錫良。本李秉衡毓賢一派人物。對於教案。不但視爲緩圖。且仍挾有庇匪仇教之意見。外人之嘖有煩言。已非一日。如聯軍西進。則西安行在既極危險。而三晉地方。亦無復噍類。故中國全權議和。大臣一面與各公使磋商處罰元兇。

問題。以阻聯軍之西行。一面電訓晉省大吏。除將教案迅速查辦。拳匪嚴行懲處外。並令嚴飭固關等處守兵。遇見洋人。不得無端開釁。然當時聯軍正躍躍欲試之時。而固關等處之守兵。又欲借排外舉動。以肆搶掠。於是彼此相持。幾再釀巨禍。後幸錫良去晉。繼之者爲岑春煊。遂將晉威勁字武衛各軍。次第撤退。並派幹員赴直隸。獲鹿縣。與聯軍劃定界線。供給牛酒。約以各不相犯。並以懲辦拳匪。及庇匪之官吏。自任。瓦爾德西頗是其所爲。且西安行在亦已發布加懲元兇之諭旨。爲各國所滿意。故西行之軍。遂爾中止。

聯軍兵勢既大。且以使館被圍。德使被戕。之故。尤極仇視中國。以患寡。患貧。之老。大帝國。萬不能以一敵八。當時滿清舊政府之能否存在。尙不可知。顧東南各省。獨能不預戰事。安寧如故者。則以各省督撫。尙能洞悉大局。深恐再啟兵釁。全局益難收拾。而山東巡撫。爲今大總統袁公。素嫉拳匪。嚴厲剿討。凡朝廷守舊派所主張。而見諸詔勅者。悉視爲僞政府命令。拒不奉行。部下武衛右軍之在直隸者。

悉召赴山東任保護外人勦討拳匪之職務。兩江總督劉坤一、湖廣總督張之洞、兩廣總督李鴻章、閩浙總督許應騷復互相協議決定東南保護之約。所有五月二十四日以後之上諭亦視爲守舊派諸臣之矯制。概不應命。旋各督撫以連署之正式公文通知上海領事團。告以無論北京成何形勢。本省內之和平秩序與外國人條約上之權利保護。不怠領事團欣然承認。卽以東南各省爲中立地。蓋隱然有新聯邦組織之情勢也。爾時管內居民雖不免以民教積怨爲北省風潮所激動。然祇私人之行爲。其真正排外團體終不發見。迨京城失陷。各督撫又電致上海領事團言東南保護之局係奉旨辦理。萬一聯軍到京後震驚兩宮。何以處東南各督撫。旋得中國駐日李公使電謂日本政府已允保護兩宮。各督撫又電致領事團表明感慰之意。並將擔任東南保護之約。剴切聲明。故自五月以來。西北各省雖已土崩瓦解。而東南各省則仍秩序井然。中外商民依舊樂業。則實各督撫權宜應變。有以減輕糜爛之禍也。

## 第五節 東三省與俄國開戰及被俄軍之占領

聯軍之占領山海關也。其表面爲謀海陸之聯絡。實則因俄國關東總督。欲占領關內外鐵道。以便直達北京。故聯軍遂急急據有山海關。以斷其南侵之路。蓋俄國之陰謀詭計。早爲各國所窺破。而隱含有衝突之意見矣。先是光緒二十二年七月。俄國得由西伯利亞經呼倫貝爾、齊齊哈爾、哈爾濱、至海參崴。修東清鐵道。二十三年三月。又得修自哈爾濱、經長春、奉天、至旅順、大連之鐵道。至此而東清鐵道。將於本年冬、翌年春、全部開通。南滿洲鐵道、旅順至鐵嶺之線、亦已開車。及拳禍起。倏忽延至奉天。該處土匪。遂焚燬火藥庫。攻擊俄國鐵道警衛兵。雖經將軍增祺暫時鎮定。然不久即奉政府宣戰之詔。奉天副都統晉昌。督同兵隊。既燒天主堂。又毀鐵嶺鐵道。外人財產。搶劫一空。旋又攻遼陽鐵道。俄國鐵路技師長。即命所屬之南滿鐵道員。就近退避關東省。中部鐵道員。就近退避哈爾濱。無如官軍拳匪業已合成一氣。聲勢洶湧。鐵道員之退避者。仍強半在中途被殺。而關

東省總督所部兵力。僅能占領牛莊。與保護遼東中立地之不受侵害。不能再顧其他方面。其哈爾濱方面。爲鄰近各區之俄國鐵道員與婦豎等避難之所。亦祇有少將額爾古羅斯。所率之少數鐵道警衛兵。在彼防戰。六月下旬。官軍拳匪。進逼哈爾濱。東西北三面。皆遭攻擊。勢極岌岌。幸額爾古羅斯。防戰得宜。未受大創。同時黑龍江副都統。又礮擊黑龍江俄國船舶。旋以俄布拉郭威什臣斯克市守兵甚少。復令愛琿之官軍。以礮八門擊之。布市守兵。僅以礮二門應戰。勢不能敵。損害甚巨。時兵匪雖皆烏合之衆。然以之敵少數之俄兵。則我羸而彼絀。一若處處立於優勝地位也者。於是黑龍江將軍壽山。遂分軍爲二。以一隊阻絕黑龍江航路。以一隊由齊齊哈爾出後貝加爾。占領鐵道。無何俄國政府聞警。卽下緊急命令。以黑龍江軍管區之軍隊。進攻北滿洲。以關東省之軍隊。進攻南滿洲。以鐵嶺分南北界。又以北滿洲之俄軍。分四道而進。西方支隊。則由後貝加爾。沿呼倫貝爾。進齊齊哈爾。中央支隊。則由布拉郭威什臣斯克。沿愛琿。墨爾根。進齊齊哈爾。東北

支隊。則沿松花江、進哈爾濱。東南支隊。則沿阿什河鐵道、進寧古塔。西方支隊。則以哥薩克兵組成。沿西方鐵道而進。我軍一戰於完工。而死者九百人。退至呼倫貝爾矣。再戰於額克兒。雖統領幸免。兵亦傷亡潰散無存矣。俄軍遂進迫齊齊哈爾。與中央支隊會合。先是中央支隊。恐布市僑商。與愛琿官軍通聲氣。且布民挾有六月下旬官軍礮擊之恨。遂驅迫中國商民六千餘人。拋棄財產。限日渡黑龍江。抗之者。卽以斧刃加之。商民不得已。全體起行。迨至江邊。又無船隻可渡。而哥薩克兵。且持鎗迫其後。六千餘人之男女老弱。號泣聲與江水聲相應。遂同投大江。悉葬魚腹。中央支隊。旋即進攻愛琿。陷之。盡焚其房屋。以爲報復。不數日間。而墨爾根、齊齊哈爾。復先後被陷。將軍壽山。遂自殺。殘兵悉潰。走伯都訥。時俄軍西方支隊。亦與中央支隊會合。遂次第進據長春、吉林、鐵嶺等處。所至皆不遇抵抗。吉林官軍。且自投鎗礮於松花江。以爲俘虜。俄軍復收銀元局銀九百萬兩。大礮六十九門。同時俄軍東北支隊。陷三姓城。守兵四千。交鋒不逾時。卽悉棄武器而



遁。旋進哈爾濱。解額爾古羅斯之圍。次偪阿什河。守兵戰敗。遂爲俄軍所占領。其東南支隊。初擬依葉河。向寧古塔。進軍。嗣以步兵過少。因與占領琿春之別隊。聯合前進。遂占領寧古塔。再與中央支隊相合。至此而北滿洲之區域。遂全入於俄軍。占領範圍以內矣。

俄國關東省之軍隊。雖以派赴京津與各國聯合之故。所留於原駐地域內者。爲數無幾。然以戰術得宜。先畧蓋平。次取海城。海城之戰。我官兵又戰死六百人。其殘兵皆向北方潰走。時俄軍對於南滿洲。已在掌握之中。特衆寡懸殊。仍不敢遽存進取之心。迨八月中旬。本國援兵大至。遂占有沙河。遼陽。旋卽進逼奉天省城。將軍增祺。率領大部軍隊。出走蒙古。於是馬賊。拳匪。與潰敗殘兵。乘機搶掠。殺人放火之事。所在皆是。奉天城內。連日焚燒不絕。其擾亂情形。與北京陷落時相彷彿。俄軍。屢勝之勢。入無人之境。又何所顧忌。而不一償其平昔之慾望耶。至是關東省軍隊。與黑龍江軍管區之軍隊。遂相會合。而東三省區域。悉被占領矣。其

不。幸。而。不。得。長。驅。直。入。以。據。我。腹。心。者。則。以。山。海。關。聯。軍。爲。之。障。礙。然。要。不。能。不。另。籌。對。付。之。策。庶。此。次。占。據。南。北。滿。洲。不。至。成。爲。畫。餅。耳。

### 第六節 各國公使於議和前之協商及英德協約

俄國經營遠東野心勃勃。至此已不難達其目的。願自占據東三省後。忽又向聯合各國提倡宣言書。大致謂對於北京之善後策。俄政府具有四要旨。一、維持各國共同之一致。二、維持中國從前之國家編制。三、排除分割中國之原想。四、各國協同恢復北京中央政府以維持國內安寧秩序。至俄國之向滿洲出兵。實因布拉郭威臣斯克被擊。俄國爲保護鐵道起見。不得不爾。將來滿洲秩序恢復。即當撤兵。並以中國皇帝蒙塵不易。達各國協同恢復中國政府之目的。故將命俄國駐京公使率同軍隊。退返天津。希望各國政府共表同情。依此宣言書。俄之對待中國。實已仁至義盡。返之平日之侵略政策。適成一反比例。殊不知俄國此舉。實因山海關爲聯軍所據。勢難席卷入關。且以八國之衆。將來議和時。於利益上尤

不免意見衝突。與其與各國相爭。不如以市惠政略。買中國政府之歡心。將來可不受列國之束縛。而別索中國政府之報償。其文書中所稱維持中國從前之國家編制。及恢復中央政府各節。蓋其時列國皆不滿意於中國頑固政府。德皇派遣軍隊之訓諭有曰。處分中國問題。以鎮定暴徒。懲罰元兇。恢復秩序。設立足以維持公法之強固政府爲目的。其政府以何人組織。則非朕之所敢知。倫敦太晤士時報論中國善後策。亦曰。聯合各國。若謀中國問題根本解決。則勿使守舊政府返北京。另組織新政府。爲根柢之改良。庶足以謀中國真正之保全。不然。斷難免瓦解之虞。凡此皆爲中國舊政府所驚懼。而俄乃宣言保全舊政府。以謀己國之便利。固舊政府所欣幸不置。而不惜予以重大報償者也。他若撤兵問題。俄既首先提議。異日處罰元兇問題。俄又獨持寬大主義。無非欲中國政府感戴其厚意。使排外派皆成爲親俄派而已。當是之時。各國公使意見紛歧。除改組新政府之議。後漸消滅外。其撤兵問題。則各國皆不贊成。處罰元兇問題。則德使持之最

力。奧意兩國更表同情。其餘各國亦無有反對之者。且因此而德帥瓦爾德西有發令遠攻西安之舉。依此情形。俄國之主張。皆歸失敗。

厥後各公使。以各國要求不一致。有礙談判進行。先開八國會議。磋商和案。奈各公使紛紛提議。依然莫衷一是。於是法國外相。乃首先提出議和案六條如左。

一、在北京各國公使指定之犯罪元魁。處適當之懲罰。德國外務大臣畢羅曾未開之前須令中國政府將國際法上犯罪之元兇先行交付與此條同意

二、禁止中國輸入兵器。

三、中國對於各國政府團體及各私人。出相當之賠償金。

四、為保護公使館。各國組織護衛兵住北京。

五、拆毀大沽礮臺。

六、天津北京間。擇二、三地方。置守備兵。以保大沽至北京之交通自由。

依此提議。頗為緊切。為各國所贊成。遂將此案送付北京。由各公使會議。乃未幾。

而英德政府。忽向各國政府。發表英德二國在倫敦締結之英德協約。其文如左。

一、中國之河川。及沿海諸港。無論何國臣民貿易。及其他正當經濟上之活動。皆得自由開放。以謀各國共同永久之利益。凡英德二國勢力可及之中國領土。相約守此主義。

二、英德二國政府。不利用現時之事變。爲自己謀中國範圍內領土上之利益。且維持中國領土不變更之政策。

三、列國中若有利用現時事變。冀獲中國領土內利益之時。英德二國政府。爲保護在中國自己利益起見。得協商對付之手段。

四、英德二國政府。以本協約通知法意日奧俄美各關係國。並勸告各國。承認本協約記載之主義。

此協約締結之原因。就英國一方面而觀察之。則以俄軍方占據南北滿洲。有囊括席捲之勢。而中國問題。於和議未定之前。又異常危迫。萬一有瓜分之禍。則英

國在中國貿易上獨享之利益。將受無窮損害。且英於此時方用兵於南阿弗利加。更無餘力能干涉俄國。計惟有聯合德國。藉以牽制俄國於歐洲大陸。況德於中國。又新派元帥瓦爾德西統率大軍。則其侵略政策。難免不爲英政府所疑忌。與其存猜忌之見。不若相與提攜。以互保其利益。此英政府與德政府協商之原因也。若就德國一方面觀察之。則雖於前年獲有山東省之利益。然遠不及英國所獲揚子江利益之廣大。況德自十九世紀後半期以來。工商業日益隆盛。人口日益增殖。其經濟政策久欲與英國並享揚子江權利。今與英提攜。尤易發展其政策。此又德政府承諾英政府協商之原因也。若開放門戶。爲美國所倡導。經各國之贊成。至此更無不同意之理。至領土保全。各國中不無隱含反抗之意。然爲均勢之局所束縛。亦不能顯示異議。於是俄日法美意奧皆承認之。第該協約第一條。有英德二國勢力可及之中國領土一語。不免成爲列國間之大問題。蓋英政府締此協約。本阻俄人侵占滿洲。當然主張滿洲在勢力範圍之內。日本與滿

洲有密切關係。亦與英爲同一之主張。獨俄政府早窺見此中情形。力言該協約之效力。僅限於英德二國勢力範圍內之各區域。不適用於滿洲。以避日後實行侵占滿洲時之妨礙。是時俄德相接近。俾斯麥避俄至此一變爲親俄政策。翌千九百零一年。俄皇訪德帝於恆澤港。兩帝交歡極深。又德於滿洲無利害關係。故亦主張滿洲不在英德協約之中。德畢羅外務使明言英德協約於滿洲無關係因此遂無正當之解釋。而滿洲問題。卽隨之以起。

英德協約既爲各國所公認。於是北京和議問題。漸得各公使維持。共同一致。仍以法國提出之議案。加以討論。遂由德公使提議。加入中國皇帝簡派勅使前赴柏林一條。日公使提議。加入中國政府向日本政府爲名譽賠償一條。美公使提議。加入中國地方官不盡保護外人之責任者。革職永不敘用一條。英公使提議。加入改正現行條約一條。意公使提議。加入整理中國財政。使爲損害賠償一條。更由各公使公共之意見。加入改革總理衙門。及制定各公使謁見皇帝之禮式一條。計費四十餘日。始會議決定。交付中國講和全權大臣。今先揭其和案大綱。

十二條如左。

- 一、德國公使被戕害。由中國皇帝欽派皇族一人往柏林。代表慚悔之意。於遇害地方。建築紀念碑一座。書以拉丁德漢各文。敘中國皇帝惋惜兇事之旨。
- 二、中歷閏八月初二上諭中指定之犯罪人。與今後各國公使指定之犯罪人。各科以該當之嚴刑。又各國人民遇害被虐之城鎮。五年間不得舉行文武各考試。

- 三、戕害日本書記生事。中國政府必須用優榮之典。以謝日本政府。
- 四、污瀆及發掘各國人民墳墓之處。建立滌垢雪侮之碑。
- 五、軍火暨專為製造軍火之材料。禁止輸入中國二年。
- 六、中國允賠補各國人及為外國執事之中國人。身家財產所受公私各虧。又中國政府容列國處理中國財政之意見。
- 七、各國常駐兵隊。護衛使館。中國民人。概不准在界內居住。



八、大沽礮臺及有礙京師至海通道之各礮臺一律削平。

九、京師至海邊須留出往來暢行通道。

十、張貼永禁軍民人等仇視諸國之諭旨於中國全境。

十一、修正通商行船各約。又按照第六款賠償事宜。約定中國政府應允襄辦

改善北河黃浦兩水路。

十二、改變總理各國事務衙門。並各國駐使覲見皇帝禮節。

### 第七節 北京媾和

當聯軍未陷通州之先。中國局勢危急。彼頑固派亦非不知之。故七月十三日。政府即授李鴻章爲全權大臣。令電商各國。先行停戰。將應行議結事宜。分別妥商。然仍不肯引咎自責。上諭中至有此次中外啟釁。各國不無誤會之語。迨京城失陷。帝后蒙塵。亡國之禍。懸於眉睫。始有准鴻章便宜行事。朕不爲遙制之旨。又允鴻章加派親貴重臣會議和局之請求。遣派慶親王奕劻回京。江督劉坤一。鄂督

張之洞。皆准參與和議。函電互商。軍機大臣榮祿。本充留京辦事大臣。至是亦添派會同辦理。顧其時消息阻滯。駐京各使及聯軍。均不知有中國政府已派遣議和全權大臣之事。其如何結局。正難懸揣。況北京已陷於無政府之境。地各國軍隊。餘勇可賈。焚掠奸殺。尤紛亂不可名狀。時惟日本福島少將。逆料事局。必以媾和了結。不如乘機市恩之爲得。遂密商滿族中大臣之烏珍、敬信、阿克丹、崇禮、崑岡、裕德、那桐、聯芳等。派章京樸壽。追迎奕劻回京。而中國政府已令奕劻由宣化府星馳入京。俄公使得信後。欲以俄軍保護奕劻由阜成門入城。福島聞之。立遣騎兵將。強迎奕劻由德勝門入。然奕劻亦自決由德勝門入京。俄使之謀。因以中止。嗣鴻章乘俄國汽船。由廣東赴北京。各公使遂以會議已決之和議大綱十二條。照會奕劻等。奕劻等電奏西安行在。奉旨批准。旋經奕劻等將交來和案大綱。逐條草成意見書。有全認者。有質問者。有要求磋商者。各公使接受後。與奕劻等會見。爲逐條談判之開始。與會者。爲俄、法、英、德、美、日、意、西、比、荷、奧十一國。

談判中之首難解決者。爲處罰元兇問題。該問題分爲中央、地方兩項。無如中央元兇。皆親貴權要。雖已得罪於宗社及天下人民。萬死不足以蔽厥辜。然清室尙竭力庇護。卽全權大臣亦不免存投鼠忌器之見。非被迫至無可如何。決不肯爲正確之處分。當閏八月初二日。德宗以諸王大臣庇匪開釁。曾將莊親王載勛、怡親王溥靜、貝勒載瀛、載灃均革去爵職。端郡王載漪從寬撤去差使。交宗人府從嚴處分。輔國公載瀾、都察院左都御史英年、交該衙門嚴議。大學士吏部尙書剛毅、刑部尙書趙舒翹、交都察院吏部議處。以謝外人。然各公使則謂除已死之剛毅、李秉衡外。其載漪、載勛、載瀾、毓賢、趙舒翹、英年、董福祥、啓秀、徐承煜等。皆須處以死刑。以伸中外之憤。迭次提出照會。而奕劻等於談判時。僅允認真辦理。實則默揣諸元兇中。能加重懲治者。止載勛、毓賢二人。並以諸人爲國家懿親。卽依各國慣例。亦無處以死刑之法。駁詰累日。不得要領。然西安行在。亦知前諭不能滿外人之意。復於九月十九日。將載漪革去爵職。與載勛、溥靜、載灃同交宗人府圈

禁載濂已革爵。著閉門思過。載瀾英年降調。趙舒翹革職留任。毓賢已革職。著發往極邊充當苦差。各公使見此上諭。後再由英公使爲最後之讓步。宣言曰。端郡王載漪。罪宜處死。以帝室之親。由皇帝特恩減刑。永禁錮新疆地方。董福祥。載瀾。從輕免死。亦永禁新疆。載勛。毓賢。英年。趙舒翹。啟秀。徐承煜。六人。處死刑。此案電奏至行在。越日奉到上諭。內言朝廷處莊親王。毓賢。以死。實爲顧全睦誼之故。豈能多殺無辜。該王大臣等須力與各國磋商。鴻章奉旨後。往訪英公使。英公使固執前議不爲動。其他公使亦然。於是再電奏。復奉十二月二十五日上諭一道如左。

已革莊親王載勛。縱容拳匪。圍攻使館。擅出違約告示。又輕信匪言。枉殺多命。實屬愚暴冥頑。著賜令自盡。已革端郡王載漪。輕信拳匪。妄言主戰。致肇禍端。咎實難辭。輔國公載瀾。隨同載勛。妄出違約告示。咎亦應得。均著革去爵職。惟念俱屬懿親。特予加恩。均著發往新疆永遠監禁。已革巡撫毓賢。昏謬兇殘。罪

魁禍首傳旨卽行正法。已故吏部尙書剛毅。追奪原官。革職留任甘肅提督董福祥。紀律不嚴。又不諳交涉。從寬革職。都察院左都御史英年。於載勛擅出違約告示。未能力爭。刑部尙書趙舒翹。查辦拳匪。草率貽誤。均加恩革職。定爲斬監候。已故大學士徐桐。已故降調前四川總督李秉衡。均著革職。撤銷卹典。吏部尙書啟秀。刑部尙書徐承煜。均先革職。著奕劻李鴻章查明所犯確據。奏明嚴懲。

各公使見此上諭後。大譁。以屢開談判未經解決之案。而中國政府。竟不由各公使之承認。自行宥某死刑。予某處分。既大悖各公使之主張。且遷延諉卸。斷非口舌所能了事。遂由元帥瓦爾德西下令。遠攻西安。法軍則任工程事務。英軍則任偵察事務。和平破裂。祇在須臾。奕劻等將此警信。復加緊電奏。政府皇遽無措。不得已。於翌年正月初三日。依各公使之要求。將各元兇。一一加重懲治。除載勛已賜自盡。毓賢在甘正法外。復將載漪。載瀾。定爲斬監候。加恩發往新疆極邊。永遠

監禁。英年趙舒翹自盡。啟秀徐承煜由各公使交回正法。時啟徐在京爲聯軍拘禁至是各公使始無異言。且又聞中國政府已將力駁殊悖諸國義法被害之許景澄袁昶徐用儀立山聯元及新疆戍所被殺之前吏部侍郎張蔭桓一律開復原官。尤極滿意。中央元兇處罰問題遂告終局。至地方獲咎官員則先由各公使委員調查彙成名簿。將提示中國全權大臣。忽俄國以滿洲事件將與中國另開談判。抗不簽押。然各公使既一致協議。不能因俄一國反抗遽爾中止。遂將名簿交與全權大臣轉達行在。於是懲處自山西歸化道鄭文欽以下文武五十餘人。有斬決者。有發遣者。有斥革者。有傳旨申飭者。縱匪仇教各官吏。後又有由各公使各宣教師查出交地方大吏查辦者。有由各省大吏自行查出奏參者。以山西爲最多此輩一經指摘。皆手足失措。向前日仇殺未盡之教士教民俯首搖尾。涕泣請命。甚至暮夜苞苴大肆運動。苟得外人一言。不但身犯嫌疑者立時湔雪。卽已入名簿見諸上諭者皆不難邀免。處分其最可駭者如毓賢撫晉時曾以知縣趙爾頤爲拳匪之統

領省城焚殺之案。爾頤實有發號施令之權。迨北京失陷。拳勢頓衰。適晉撫錫良與爾頤尤有瓜葛。因得膺渾源州知州之優缺。未幾而岑春煊撫晉。整飭吏治。於庇匪諸僚屬。尤嚴懲無貸。爾頤爲晉省首禍。外人更力請治罪。因先飭藩司將其撤任查辦。爾頤知不免。遂運動繼任渾源州之祝家瑞。稟報病故。一面毀容更姓。遠颺他處。時軍務洋務正形吃緊。苟外人置不追究。爲大吏者亦姑聽之而已。乃一二年後。忽有已死復生之趙爾頤。出現於晉省政界中。細加調查。則以當日之撫晉者。因友于之愛。牽續命之絲。昔之撤任查辦稟報病故各案卷。皆已付諸一炬。並能使居留晉省之外人。處於被動者之地位。默認無言。其手段亦高矣哉。其事雖微。錄之亦足以見當日辦理教案之出入顛倒矣。

至於償金問題。此尤爲媾和條件中最一困難之事。中國民窮財盡。不易擔負。此巨款固無論矣。卽以列國間之情勢論之。索賠償者共十國。而其利害關係之各異。損害情形之不同。及賠償額之多寡。償還時之方法。與時間。均不易確定。矧中

國。財。政。紊。亂。果。以。何。項。財。源。爲。償。金。之。擔。保。又。以。何。項。方。法。管。理。擔。保。之。財。源。皆。爲。最。應。研。究。之。重。要。問。題。於。是。各。公。使。遂。舉。德。奧。荷。比。四。國。公。使。爲。確。定。償。金。之。調。查。委。員。先。定。賠。償。金。之。基。礎。五。條。如。左。

一、因此事變受直接之損害者得請求賠償。

二、賠償分三種。一、對於國家之損害賠償。二、對於商社及個人之損害賠償。三、對於外人雇用華人之損害賠償。

三、此次軍事費與死傷者撫恤費及公使館領事館修繕費與政府一切財產之蒙損害者。又關於此次之調查費均作爲國家之直接損害。在中國各處之外國商社。其房屋財產被破壞之損害。又工場業務中止之損害。又已失之貨物錢票股票。又不可收回之債權債證。又一切私有財產之損害。又關於此項之調查費均作爲商社個人之直接損害。被雇華人之一身或財產上損害。與失生命之撫卹費作爲雇人之直接損害。



四、私人之請求賠償。由本國公使呈出。列國公使會議。經列國公使調查之後。定適當之賠償額。

五、賠償金自財產破壞之日起。民事以五分、商事以七分、利息計算。

以上各條。係規定應行賠償之目的物。若賠償額之多寡。則各國主張不同。惟美國最爲寬大。其所定標準。總以中國之擔負力爲範圍。並由其國務卿電訓其駐京公使云。償金總額。宜以英貨四千萬鎊爲限。約中國四億元然各國索償之數。皆傾向於目的物之高價。一方面。德國最甚。俄日次之。美國之所主張。迄無效果。後經各公使會議。卒以中國海關銀四百五十兆兩。百萬爲償金總額。列表如左。

俄 一三〇、三七一、一一一 兩 以出兵滿洲損害最大故占多數

德 九〇〇、七〇五、一五 以派瓦爾德西率大軍至北京故次之

法 七〇、八七八、二四〇

英 五〇、七一二、七九五

|    |             |
|----|-------------|
| 美  | 三二、九三九、〇五五  |
| 日  | 三四、七九三、一〇〇  |
| 意  | 二六、六一七、〇〇五  |
| 奧  | 四、〇〇三、九二〇   |
| 荷  | 七八二、一〇〇     |
| 比  | 八、九八四、三四五   |
| 其他 | 二一二、四九〇     |
| 合計 | 四五〇、〇〇〇、〇〇〇 |

中國全權大臣接到此償金總額公文。驚嘆過巨。回書償金准以三十年還清。由稅務司經理。要求酌減。並請增加海關關稅。各公使接回書後。不但無酌減之意。且以回書中不言及利息。再開會議。旋以利息問題及拒絕酌減之要求。照復全權大臣。慶李不得已。允給償金四百五十兆兩。分四十年還清。週年四釐行息。電

奏行在。旋奉旨批准。償金額與利息額遂確定。顧償還方法及指定何項財源爲擔保。則尤不可不協同妥議。於是各公使又選定英法日德四公使。爲調查償還方法及財源委員。四公使於調查後。先擬定償還方法四條。一使中國無列國保證。自行募集公債。二列國協同爲中國公債之保證。三由中國按償金之額。發行定期公債券。交付列國。四使中國以年賦償還。

次又查得中國財源。有六種可爲償金之擔保。一外人監理之海關稅。除開支各費外。年有一千四百萬。二海關稅率。從價增爲五釐。除鴉片煙外。年可三將外國輸入之粉類、牛酪、乾酪、織物及酒精等無稅品。一律課稅。四內地關稅。改由海關監理。年可得三萬。五海關稅率。增爲一分。年可增一千五百萬。六鹽務課稅。年可得四百萬。兩以上。二時各公使議論紛歧。無可折衷。後償還方法。由英國主張。第三項。中國發行定期債券。交付列國。美德法又先後贊成之。償還方法。因以確定。其擔保償金之財源。各公使各依己國利害關係。主張不同。經數月之久。會議不

決。至七月上旬始一致決議如左。

一、以海關稅、內地關稅及鹽稅三項充償金之財源。

二、海關稅增定爲五釐。

三、海關稅中從來之從價稅一切改爲從量稅。

至此償金問題又已解決。此外諸問題中國全權大臣與各公使稍事商榷無甚更改。各國亦無大意見衝突。談判頗易進行。光緒二十七年北京和議成立。其條約如左。

一、中國皇帝欽派醇親王載灃爲頭等專使。赴德國代表惋惜德使被害之意。並於遇害處樹立銘誌之碑。

二、端郡王載漪、輔國公載瀾、加恩永禁新疆。莊親王載勛、英年、趙舒翹均賜自盡。毓賢、啟秀、徐承煜均正法。剛毅追奪原官。徐桐、李秉衡革職。撤銷卹典。董福祥革職。徐用儀、立山、許景澄、聯元、袁昶均開復原官。各省地方獲咎官吏。

依本年三月十一、四月十七、七月初六、各上諭所定各罪案懲辦。又虐殺虐遇外人之各城鎮。均停止文武考試五年。

三、中國皇帝簡派戶部侍郎那桐爲專使。赴日本代表惋惜日書記生被害之意。

四、中國政府付給各國被污瀆及挖掘各墳墓之建碑費。京師一帶每處一萬兩。外省每處五千兩。

五、中國政府已於本年七月十二日降旨。禁止軍火及製造軍火之器料進口。二年。嗣後如各國以爲有仍應續禁之處。亦可降旨展限。

六、中國皇帝允付各國償款海關銀四百五十兆兩。甲此四百五十兆。係以海關銀一兩。依左率兌換各國之金貨計算。即德國馬克三〇五五。奧

國克勒尼三五九五。美國圓〇七四二。法國佛郎三七五。英國先零  
三。日本圓一四〇七。荷蘭佛樂林一七九六。俄國盧布一四一二。

乙、還款事宜。在上海執行。各國各派銀行董事一名。專任收受中國本息償金。與分給關係諸國之職務。丙、中國政府將全數保票一紙交駐京各公使。此保票以後分作零票。每票由中國特派官員畫押。各國銀行董事。關於此節及發票一切事宜。各遵本國飭令而行。丁、付還保票財源各進款。按月給銀行董事收存。戊、所定擔保債票之財源如下。子、新關稅之收入。內除給付擔保舊借外債之本利外。餘剩者。又進口貨稅。增至切實值百抽五。丑、在各通商口岸之常關。均歸新關管理。寅、鹽稅之收入。除歸還外債一宗外。餘剩一併歸入。至進口貨稅。增至切實值百抽五。如依下二端。各國方可承認。一、從前之從價稅。改爲從量稅。其改定之方法。依最近三年間各貨品卸貨後之平均價格爲基礎。二、北河黃浦兩水路改善。中國分擔經費。

七、中國政府允定各使館境界以爲專與住用之處。並獨由使館管理。不准中

國人住居。亦可自行防守。從崇文門大街分東北西南。循城牆南址隨城堞而畫。各國常留兵隊分保使館。

八、中國允將大沽礮臺及有礙北京至海通道之各礮臺一律削平。現已設法照辦。

九、中國政府應允各國分任主辦會同酌定數處留兵駐守。以保北京至海通道無斷絕之虞。係黃村、郎坊、楊村、天津、軍糧城、塘沽、蘆臺、唐山、灤州、昌黎、秦王島、山海關等處。

十、中國政府對於各府廳州縣二年之內頒布左列各上諭。甲、永禁或設或入與各國仇敵之會。違者皆斬。乙、載明懲辦犯罪人罪案。丙、各國人民遇害被虐各城鎮。停止考試。丁、各省督撫文武大吏及有司各官。倘於所屬境內復有傷害外人之事。不能立即彈壓懲辦者。革職永不敘用。

十一、中國政府允定將通商行船各條約均議商改。其襄辦改善北河黃浦兩

水路方法如下。一、北河改善河道。在光緒二十四年會同中國所興各工。近由各國派員重修。一俟治理天津事務交還之後。即可由中國派員與各國所派之員會辦。中國政府應付海關銀每年六萬兩以養其工。一、現設立黃浦河道局。經管整理改善水道各工。其最初二十年間。每年支用海關銀四十六萬兩。中國政府與各關係國人。按年各分擔其半。

十二、中國政府將總理各國事務衙門改爲外務部。班列六部之前。又變通各國欽差大臣覲見皇帝禮節。商定由中國全權大臣照會各國政府。

右條約於七月二十五日批准。以各國維持均勢之局。尙無割讓土地之事。不可謂非不幸中之大幸。然禁止軍火及製造軍火器料之輸入。則我無禦侮之資矣。削平大沽間礮臺。則我無可守之險矣。以密邇都城之黃村郎坊等處。而允其無期間之占領。則門戶洞開。在在爲人所利矣。況償金總額。本息併計。共有九億八千二百三十三萬八千一百五十兩。見戶部奏案則閭閻脂膏。已吸盡無餘。雖欲振興。



其又何能。時各國軍隊。除第七款所述之防守使館外。並除第九條所述各處外。餘均於八月上旬。一律退出京城直隸。至是北京陷落。已一年餘矣。至二十四日。西太后挈德宗自西安啟鑾回京。

### 第八節 中俄密約及英日同盟

俄國侵略政策。爲世界所共見。今滿洲全部。既以兵力占據。豈肯吐棄不顧。特因各國疑忌。恐犯衆怒。故特宣言。無特別行動。俟滿洲恢復秩序。卽當撤兵。然究竟撤兵與否。仍視其在滿洲所獲利益如何。且以英德協約。足以制限其在中國之行動。故其解釋。隱示該協約不適用於滿洲。苟中國外交當局。能於此時。覺悟。亦何至爲其甘言所誘。而以己國之領土。爲他人角逐之場耶。乃北京和議開始之際。卽有各國喧傳。關東總督與奉天將軍。締結密約九條。其主要之點。則滿洲全部。悉置於俄國管領之下。迨光緒二十七年正月西二月二日。倫敦太晤士報。又揭載駐俄中國公使楊儒。與俄外務大臣拉穆斯多福。締結滿洲密約十條。其

文如左。

- 一、俄國交還滿洲於中國。行政之事。照舊辦理。
- 二、俄國留兵保護滿洲鐵路。俟地方平靜後。並本條約之樞要四條。一概履行。後始可撤兵。
- 三、若有事變。俄國將此兵助中國鎮壓。
- 四、若中國鐵格未開通之間。中國不能駐兵於滿洲。即他日或可駐兵。其數目亦須與俄國協定。且禁止輸入兵器於滿洲。
- 五、若地方大吏處置各事。不得其宜。則須由俄國所請。將此官革職。滿洲之巡察兵。須與俄國合商。定其人數。不得用外國人。
- 六、滿洲蒙古之海陸軍。不得聘請外國人訓練。
- 七、旅順口之北金州之自主權。中國承認放棄。
- 八、滿洲、蒙古、新疆之塔爾巴哈臺、伊犁、克什葛爾、葉爾羌、和闐、于闐、等處之礦

山鐵路及他之利益。非得俄國所許。則不得讓與他國。或中國自爲之。必亦須經俄國允許。牛莊以外之地。不得租借與他國。

九、此次俄國所有之軍事費用。一切皆由中國支出。

十、若滿洲鐵路公司有何損害。須由中國政府與該公司商議賠償。

十一、上項之賠償。或以全部利益。或以一部利益爲擔保。

十二、許中國由滿洲鐵路之支路。修一鐵路。以達北京。

右條約發現之後。英政府卽向俄國質問。俄外務大臣力辯其無。駐美俄公使喀西尼。亦向美國政府聲明傳聞之誤。然事實昭然。不能掩飾。旋由楊儒電經慶李轉奏請旨。蓋楊儒之與俄外務大臣締此密約。實爲俄廷所迫壓。無爭議之餘地。其電達慶李轉奏請旨。陰欲使慶李假列國之力以拒絕之也。旋李鴻章以條約本文。提示各公使。日英美德奧意六國。同起反對。向中國紛紛警告。美國且謂中國如將此約批准。是自促其瓜分。時奕劻與江督劉坤一。鄂督張之洞。粵督陶模。

桂撫德壽。鐵道大臣盛宣懷。及今大總統時任東撫之袁公。均一律主張抗爭。上海志士百九十餘人。且電致日本政府。以滿洲關係東亞存亡。要求其代爲力爭。而日政府亦以滿洲區域。與己國有地理上人種上經濟上各種之關係。一旦爲俄所奪。不但己國不能於中國佔優勝之位置。且返諸昔日被俄干涉返還遼東之積憾。尤難隱忍自甘。先是日本聞關東總督與增祺締結密約。國論已極沸騰。公爵近衛篤磨。且組織國民同盟會。以迫政府之反抗。至此復要求政府直接向俄國抗議。決意訴之兵力。於是日政府遂於一方面向議會宣言。解釋英德協約。係包括滿洲全部。一方面向俄政府要求將密約提示列國會議。俄政府推諉。至再迫不得已。始削除第八條。迫中國於西四月一日批准。中國藉口各國之反對。嚴詞拒絕之。日本於此期間內。迭開軍事會議。準備戰鬥。俄政府不得已。遂向各國聲明廢棄此約。

然俄政府對於滿洲。決不能就此了結也。同年七月。北京和議成立。清廷尙未能

即時回鑾。俄公使以北京主權尙未確定爲口實。聲明繼續占領滿洲。復乘機向李鴻章提出協商案。鴻章知滿洲事件。非予俄國以特別利益。斷難望其撤兵。遂與訂第二次密約。其全體條文。因當時中俄兩全權各守秘密。無從窺見全豹。特較之第一次。則俄之讓步實多。旋因中國政府納劉坤一張之洞之奏。仍拒不批准。鴻章亦卽於九月二十七日。因勞病卒。卒之前一日。俄公使尙至賢良寺催促畫押。卒之此約未能成立。

同年十一月。清室由西安府回京。迭促俄國撤退滿洲之兵。迄不遵約。時日政府已與英政府相接近。蓋英國之對於極東。久持與俄國勢力均衡主義。滿洲密約。與日本固多不利。與英亦不免有害。自英德協約告成後。英在中國。方以德爲同志。乃德相畢羅公。又主張該協約與滿洲無關。且此時俄對西藏。又大有活動。英欲維持其中國之勢力。決不能不另求同志以相提攜。由是英日二國。遂成實際。上之結合。光緒二十八年正月初四日。一九〇二年。駐英日公使林董。與英外務

大臣蘭斯頓、締結英日同盟條約如左。

一、兩締盟國以相互承認中國朝鮮兩國之獨立。聲明該兩國。無論何方。不爲全然侵略的趨向所牽制。但兩締盟國之利益。卽英國以對於中國之利益爲主。日本對於中國之利益。及朝鮮政治上商業上之特殊利益。若因他國侵略行爲。致締盟國之利益受侵害。或因中國朝鮮兩國自起騷擾。致締盟國之利益。及締盟國臣民之生命財產。受侵害。兩締盟國爲擁護該利益起見。各得執行必要之手段。

二、兩締盟國若一方因防護利益與乙國交戰之時。他一方之締盟國。須守嚴正中立。並努力妨礙第三國加入乙國。與同盟國交戰。

三、上記戰鬪中。若他之一國。或數國。與同盟國交戰之時。他一方之締盟國。卽當出兵援助。協同戰鬪。媾和亦與該同盟國合意爲之。

四、兩締盟國無論何方。若不經他一方協議。不得與他國結妨害上記利益之

別約。

五、英國或日本若認上記利益迫於危殆之時。兩國政府互相竭全力通告。不得隔閡。

六、本協約自調印之日起。五年間有効力。若第五年期滿時之十二個月以前。兩締盟國皆不照會廢約。則本協約以締盟國一方表明廢約意思之日。仍繼續一年間有効力。但此一年間期滿時。若締盟國一方在交戰中。則本同盟之効力。必繼續於媾和結局之時。

右同盟條約之精神。雖以保全中國朝鮮爲名實。則英日兩國恐在中國朝鮮之利益被俄侵害。故合力以抵禦之。而極東大局遂亦藉以維持之也。繹第一條之意義。則此一方之締盟國。因擁護利益而向對敵國開嚴重談判。或竟出於戰鬪。其他一方之締盟國。決不反抗。第二條嚴正中立。譬如日後日俄一役。英國之地中海、蘇彝士海峽、蘇彝士雖非英領而主權在英印度洋、中國海及南洋羣島之英領。皆不准

俄國軍艦下碇。英領之英商亦不得運賣戰時禁制品。於是東洋方面若有日俄衝突。其成敗利鈍已可想見矣。若第三條之協同戰鬪。則防法防德有助俄之舉動也。當時俄國知此項同盟條約實與己國爲敵。占領滿洲之慾望不免大受打擊。然又不敢固執己見。遽開兵衅。也不得已。一面假裝面目表示承認。一面將俄法同盟之關係擴充至極。東方面其宣言書大旨謂俄法兩同盟國爲尊重日英協約確信其以保全中國朝鮮兩國領土及商業上兩國門戶開放爲基礎。與俄法從來保持極東現狀及全局和平之主張不相違異。如第三國有侵略行動。或中國新生騷擾致中國之保全與其自由發達不能鞏固。因之兩締盟國之特別利益有受侵犯。兩國政府得取防衛之手段。時中國政府正繼續要求俄國交還東三省。同年三月初一日。俄公使雷薩爾與慶親王奕劻王文韶遂締結滿洲撤兵條約四款如左。

一名交收東三省條約

一、俄國皇帝表明對中國皇帝交誼親厚。將東三省邊境暴擊俄民之事付之



不問。尤將東三省各地交還中國治理。一如俄軍未經占領之時。

二、中國政府自接收滿洲自行治理後。須實力遵行光緒二十二年八月二日與華俄銀行締結之各條款。又對於鐵道及鐵道員。與住在滿洲之俄國一般臣民。併所創設事業。均極力保護。中國承認上記各情。再無變亂發生。又無他國之妨害。俄國政府依下列方法。撤退滿洲軍隊。本協約調印後。限六個月。俄國撤退盛京省西南段至遼河之軍隊。並將該鐵道交還中國。再六個月。撤退盛京其餘各段。及吉林全省。再六個月。撤退黑龍江省。

三、爲恐兩國官軍再起衝突。俄軍尙未撤退之前。應先協定中國駐屯滿洲之兵額。與其駐屯地方。中國於此協定兵數外。不得另派軍隊。俄軍全撤之後。中國酌核滿洲駐兵。應添應減時。仍隨時知照俄國政府。蓋中國增添滿洲軍隊。俄國亦必增添邊境軍隊也。關於滿洲綏靖地方設巡捕等事。除東清鐵道公司所管各地段外。各省將軍。須專用中國之馬步捕隊以充。

## 巡捕。

四、俄國政府依下列條件。將山海關、營口、新民廳、各鐵道交還中國。甲、自後

中國自任該鐵道之保護責任。不得請他國代理。又俄退還各地段。不准他

國占據。乙、該鐵道經營各節。必遵照一八九九年四月十六日之英俄協

約。即光緒二十五年聖彼得堡協定之英俄協約與一八九八年九月二十八日中國與一私立公

司借款契約。即光緒二十四年八月二十五日中英山海關牛莊鐵道借款契約辦理。該公司不得藉端占據

或經理該鐵道。丙、自後南滿洲鐵道延長。或敷設支線。或營口建築鐵橋。

或山海關鐵道終點有遷移之計畫時。由中俄兩國協商辦理。丁、俄國修

繕山海關、營口、新民廳、各鐵道費用。以未包於償金總額之內。俟協定金額

後。由中國政府賠償。

右條約之性質。較之前此各密約。俄之讓步。洵不爲少。未始非英日同盟有以束縛之也。義和拳之事變至此。遂告終局。然俄軍之在滿洲。果能按照條約依期撤

退與否。尙未可知也。

### 第三章 日俄之戰

#### 第一節 俄國滿洲撤兵之違約及制限日本對於朝鮮之勢力

光緒二十八年九月十五日。爲俄國對於滿洲第一次撤兵期滿之日。俄政府果於先半月間。開始撤兵。凡駐屯錦州、遼河西南部之俄軍。至期撤退無餘。其野戰用之郵務電話局。亦皆停閉。並將關外鐵道。同時交與奉天將軍收回自管。迨至翌年三月十五日。又爲俄國對於滿洲第二次撤兵之期。所有駐屯金州、牛莊、遼陽、奉天、鐵嶺、開原、長春、吉林、寧古塔、琿春、阿拉楚喀、哈爾濱、各處之俄軍。均應遵約回國。乃屆時一兵不撤。且駐京代理俄公使布拉穆損。忽謂滿洲問題。決不能爲無條件之撤兵。遂提出新要求案數條。雖條件內容。當時傳聞異詞。然其大要。卽閉鎖滿洲門戶。而置於俄國保護之下。日英美三國得此消息。同向中國政府警告。美國日勸中國先將牛莊、奉天、大東溝。開放爲通商口岸。又直接詰問俄廷。

中政府以有三國之援助。且其時各省督撫亦皆反對。故命奕劻向俄公使嚴詞拒絕。俄政府知衆怒難犯。遂撤回新要求案。且於奉天大東溝之開作商埠。表示贊成。迨至五月中旬。俄公使雷薩爾歸任北京。更向奕劻提出五款如左。

一、擴張華俄道勝銀行之營業權。凡東三省中國經營之事業。與中俄共同事業。悉由該銀行貸給資金。

二、營口稅關事務。今後二十年。委託華俄道勝銀行管理。

三、奉天吉林兩府設交涉局。由中俄兩國委員組織。關於兩省之政治、軍事、經濟、衛生、司法等事。相互協商辦理。

四、由北京至張家口、經庫倫達恰克圖之蒙古鐵道。歸華俄道勝銀行修造。

五、西藏西北部。行中俄協同行政制度。

此項要求。於滿洲外。又擴充其勢力於張庫鐵道。西藏行政。中國政府萬無承認之理。時俄國陸軍大臣苦魯巴金東游日本。日本國民喧傳苦魯巴金之東來。係

與其政府交換滿洲朝鮮條約。國論沸騰。向其政府詰責甚急。實則並無其事。苦魯巴金到東。四日即返旅順。與極東俄官開大會議。俄國駐紮中國朝鮮兩公使。道勝銀行總理。關東總督。及滿洲各地守備隊之一等參謀。皆列席審議。十日始將對於滿洲之方針。協同決定。後俄公使雷薩爾返北京。即告奕劻曰。俄國鑒於東三省現狀。縱令列國干涉。亦斷不能無條件撤兵。雖因此與日本開戰。亦所不辭。同時俄政府。又於關東省設極東大總督府。即以關東總督亞歷氣哲福任之。凡極東之外交。行政。軍事。皆歸其統轄。與高加索大總督之制度相同。依此制度。俄國之對於滿洲。已實行其統治領土之制。第二期之撤兵。遂公然食言矣。

初中日戰後。日本對於朝鮮之勢力。日益擴張。日使井上馨。草改革內政案二十條。逼朝鮮國王矯正積弊。內閣各部。皆聘日人爲顧問。又以日人訓練各軍隊。排日派嫉之。以閔妃爲中心。與俄公使威巴私通聲氣。乘井上馨歸國。將日本黨全行推翻。井上馨聞變急返。復組織日本黨內閣。閔妃一派。再與俄公使威巴密謀。

將一舉以覆日本黨內閣。日本黨聞信後。先機制勝。率兵入宮。閔妃死焉。自是朝鮮臣民頗怨日本。俄公使即乘機與排日黨謀。將日本黨大加慘殺。另以俄國黨組織內閣。於是朝鮮之實權遂由日本而移轉於俄國矣。至光緒二十二年。俄皇加冕。日本不得已。派山縣有朋爲奉賀使。與俄結第一日俄協約。同時又由朝鮮日公使小村與俄公使威巴。在漢京再結協約。兩國對於朝鮮之勢力歸於平等。乃一二年後。俄公使又背約。迫朝鮮聘俄國將校三十餘名爲軍隊教練。又迫朝鮮罷度支顧問兼海關總稅務司英人布拉安之職。而改聘俄人亞歷氣哲福。英國大怒。命東洋艦隊巨艦七艘。突逼仁川。朝鮮震恐。遂復布拉安之職。而對於俄國一方面。深憤其專橫。又轉而傾向於日矣。時俄國方注全力於滿洲。恐日本從中妨害。故對於朝鮮之政策。亦變爲緩和。光緒二十四年二月。俄公使率財政顧問陸軍教練等官歸國。而與日本結第二日俄協約。暫將朝鮮利益讓與日本。以便已國得於滿洲爲積極之行動。後以拳匪之禍。實行占領滿洲。而日本之於滿

洲仍一步不肯放鬆。苦魯巴金東遊後，亟欲威懾日本。不但於滿洲方面逕行統治領土之制，且又援逾期之採伐森林權利。該條約係光緒二十二年七月朝鮮與俄人訂結，約定五年以後不著手即作爲無效。至此逾期已一年有餘矣。強迫朝鮮履行條約，更要求租借龍巖浦。朝鮮不應。俄人卽於該地強築礮臺，復將軍用電線布設至安東縣。又改其名爲尼古拉斯浦。俄皇蓋俄人至是已不憚與日開釁矣。

## 第二節 日俄開戰前之交涉

中日之戰，日所以兼併朝鮮也。顧自馬關議和，併遼東半島而有之，亦極志得意滿矣。乃忽爲俄國干涉，將遼東半島揮淚奉還。使俄國果出於義，俠行爲，日猶不免飲恨。矧今日之肆行侵略者，卽昔日託爲仗義執言之人。且併朝鮮已得之利益，亦爲其所染指。是可忍，孰不可忍也。於是小村外務於一九〇三年七月二十八日。光緒二十九年六月電命駐俄栗野公使，訪俄外務部，告以極東兩國之特殊利益，須協商劃清。俄外務大臣拉穆斯多福承諾之。小村遂以協約草案，令栗野向俄廷

提出。

一、日俄兩國相互尊重中國朝鮮兩國之獨立。及保全其領土。對於該兩國之商工業。相互保持機會均等主義。

二、俄國承認日本對於朝鮮之卓越利益。日本承認俄國對於滿洲經營鐵道之特殊利益。

三、日俄二國。限於不違背本協約第一條。日本對於朝鮮、俄國對於滿洲之商業活動。互不阻礙。朝鮮鐵道延長至滿洲南部。與東清鐵道山海關牛莊鐵道相接。俄國不得阻礙。

四、爲保護本協約第二條之利益。日本對於朝鮮、俄國對於滿洲、認必要派遣軍隊之時。其所派軍隊。相約不超過實際必要兵額之上。且事平後即召還。

五、俄國承認日本對於朝鮮改革。有與助言及援助並含軍事上之援助之專權。



時拉穆斯多福將扈從俄皇巡遊歐西。未能與栗野在俄京協議。而該事件。又爲極東地方實際問題。勢難懸擱。遂欲命駐日俄公使。與極東大總督。當談判之局。而移談判於東京。且主張由俄廷另作一對案。與日本提案同爲談判基礎。日本不得已承諾之。旋由駐日俄公使羅栓。與關東大總督亞歷氣哲福。於會商之後。向日政府提出對案。將日本協約草案內。關於中國所規定之一切條件。盡行削除。單就朝鮮一方面規定條件。且於日本獲得朝鮮之權利與利益。大加限制。蓋俄政府非但不尊重中國之獨立。與保全其領土。且欲侵略朝鮮。故與日本原案之主義。適成一反比例也。嗣又由小村將俄國對案修正。向俄公使提出。雖經迭次談判。關於朝鮮一方面。已經彼此同意。而滿洲問題。尙各不相下。西十月三十日。小村又向俄公使提出第二修正案如左。

一、相互尊重中國朝鮮兩國之獨立。又保全其領土。

二、俄國承認日本對於朝鮮之卓越利益。及對於朝鮮之行政改良。

三、俄國不阻礙日本對於朝鮮商工業之活動發達。日本爲保護此等利益所出一切行爲。俄國不反對。

四、日本爲上記目的。向朝鮮派遣軍隊之時。俄國承認爲日本之權利。

五、日本不於朝鮮沿岸。建築妨礙自由航行之兵事要工。

六、滿洲朝鮮境界兩側各五十啟米羅突之地。定爲中立地帶。非兩國相互承認。不得引軍隊進入。

七、日本承認滿洲在日本特殊利益範圍之外。俄國承認朝鮮在俄國特殊利益範圍之外。

八、日本承認俄國之特殊利益。并承認俄國爲保護此等利益。得出必要處分之權利。

九、俄國對於朝鮮條約上所獲關於商業及居住之權利與豁免。日本不妨害。日本對於中國條約上所獲關於商業及居住之權利與豁免。俄國不妨害。

十、今後朝鮮鐵道與東清鐵道延長至鴨綠江畔時。約不阻礙該兩鐵道之聯絡。

羅榘公使接此案後。電告本國政府。復由小村電命栗野。向俄政府聲明日本之要求爲正當。時俄皇與拉穆外相。已由歐西歸聖彼得堡。栗野公使遂訪拉穆外相。談判數次。不獲要領。至西十二月十一日。駐日俄公使忽向小村外務提出第二對案如左。

一、兩國相互尊重朝鮮之獨立。又保全其領土。

二、俄國承認日本對於朝鮮之卓越利益。及對於朝鮮民政改良與助言及援助之權利。

三、俄國不阻礙日本對於朝鮮商工業之活動發達。又不反對日本爲保護此等利益之行爲。

四、日本爲上記目的。向朝鮮派遣軍隊之時。俄國承認爲日本之權利。

五、朝鮮領土內不爲軍略上之目的使用。朝鮮沿岸不築妨害自由航行之兵事要工。

六、北緯三十九度以北之朝鮮領土爲中立地帶。兩國皆不引軍隊進入。

右對案仍將滿洲條項盡行削除。則中國領土爲俄國所不肯承認保全。殆無疑義。特限制日本之在朝鮮權利與利益。較前稍爲寬大。小村接此案後。卽修正其第二、第五兩條。刪除其第六條。提示俄公使。且申言滿洲不加入本協約內。日本萬萬不能承認。請俄國再思。翌年一月六日。俄公使提出復案。第二條全依日本之要求。五六兩條仍用第二次對案原文。更新增左之一條。

滿洲及其沿岸。日本承認爲己國範圍之外。但日本或他國於滿洲區域內。依條約上獲得之權利及特權。俄國不阻礙。

至此已爲俄國最後之讓步。然日本之於朝鮮。處心積慮。早視爲囊中物。斷不容他人之限制。且其雄心鬱勃。久欲執東亞之牛耳。尤不能置滿洲於度外。斯時舉

國上下主張開戰。悉有致死於俄之心。於一月十三日。小村再促俄國反省。俄政府遷延不答。各爲軍事之準備。二月四日。日本開御前會議。決議取自由行動。旋命栗野公使向俄政府提出斷絕國交公文。下旗返國。并促俄公使同日退出東京。當俄國提出第二對案時。日政府即決計於外交上雖取緩和主義。而於軍事上則努力預備。務立於自動制勝地位。故凡戰時軍政、軍隊、財政、交通。至此已一律整備完全。迨二月五日。國交斷絕。即命聯合艦隊。於翌日自佐世保出發。八日夜半。襲擊旅順俄艦。九日正午。又擊破俄艦於仁川。十日。日皇遂下詔宣戰。至俄國關於極東之外交軍事。均統轄於關東省大總督亞歷氣哲福。前後對案。即由其作成。本年一月下旬。始見形勢日非。乃由旅順派步兵二大隊。送朝鮮北境。命鴨綠江附近及海參崴各軍隊。均準備戰鬪。至二月八九日。軍艦被襲擊。亦遂宣戰。

### 第三節

日俄開戰時中國宣告中立及日本乘機與朝鮮訂保護協約

俄國占據滿洲。不肯遵約撤兵。中國自政府以迄在野者。無不同聲憤恨。又聞俄國不承認保全中國領土。一時人心。尤極傾向於日本。今日本因此與俄宣戰。且交戰區域。在中國領土以內。愈不能作壁上觀。致自失其領土上之主權。然果與日本爲攻守同盟。則戰局之結果。實不可測。蓋蒙古新疆各邊境。俄軍處處可入。中國邊備空虛。萬難抵制。且經甲午庚子兩役以後。財政尤極紊亂。一旦發生戰事。應付各國賠款。將有不能履行之虞。故當時英美德法意奧各國。次第宣告中立。并認中國應守局外中立。以免後慮。西三月九日。日政府復以公文勸中國守嚴正中立。並向英美德法意奧各國政府。要求確保俄亦尊重中國之中立。十二日。美國政府勸告日俄兩交戰國。劃定交戰區域。以尊重中國之中立。並保滿洲之行政。英德兩政府亦以除滿洲外。中國全部領土。皆作爲中立區域之語。告兩交戰國。蓋英美德三政府之意。皆欲限定滿洲爲交戰區域。而令中國守局部之中立也。十三日。中國外務部。遂向日俄二國宣言曰。

日俄失和。朝廷均以友邦之故。特重邦交。奉上諭。守局外中立之例。所議辦理方法。已通飭各省。使之一律遵守。且嚴命各處地方官。監視一切。保護商民。教徒。盛京及興京。因爲陵寢宮闕所在之地。責成該將軍。嚴重守護。東三省所在之城池。官衙。民命。財產。兩國均不得損傷。原有之中國軍隊。彼此不相侵害。遼河以西。凡俄兵撤退之地。由北洋大臣派兵。使之駐紮各省及邊境。內外蒙古。均照局外中立之例辦理。不使兩國軍隊。稍爲侵越。如有闖入境界內之時。中國自當竭力攔阻。不得視爲有乖和平。但滿洲爲外國駐紮軍隊未撤退之地。方以中國因力有未逮。恐難實行局外中立之例。惟不論何國勝敗。東三省土地權利。仍歸中國。自不得佔據。

日俄二國接此公文後。皆承認之。於是公認遼河以東爲交戰地。以西爲中立地。乃翌年一月。俄國騎兵團忽犯及遼西。復以溝幫子至新民府之鐵道。爲中立與交戰地之境界。

當朝鮮俄使要求朝鮮租借龍巖浦之時。日英二公使向朝鮮政府爲同一之警告。且勸其開義州龍巖浦爲通商口岸。朝鮮畏俄之威。不敢遽允。迨二月九日。日艦隊在仁川擊破俄艦。卽派陸軍二大隊入漢京。朝鮮半島遂全落日人之手。至是朝鮮政府又以向之畏俄者畏日。且以當日日本向俄提出之草案。及厥後日皇宣戰詔勅。皆以保全其領土爲言。視日軍爲仁義之師。極表歡迎。於是駐在朝鮮日公使林權助。卽乘機與朝鮮外務大臣李鎔址。於二月二十三日結義定書。書成而朝鮮遂爲日本保護國。中外耳目一時聳動。蓋日本手段之敏捷。與朝鮮政府知識之昏闇。皆令人不可思議者也。其議定書如左。

一、日韓兩帝國。因欲保持恆久不易之親交。確立東洋之平和。自後韓國政府。當確信日本政府。凡其關於政治上之改革。有所忠告。皆聽從之。

二、日本政府以誠實親誼。俾韓國皇室得安全康寧。

三、日本政府於韓國之獨立及其領土保全。爲確實之保障。



四、韓國若遇第三國之侵害。或內亂。日本政府可執行臨機必要之措置。而韓政府對於日本政府之行動。許以完全便宜行事之權。日本政府因欲達此目的。凡軍略上必要之地點。皆得臨機收用。

五、以後不經兩國政府承認。不得與第三國結違反本協約之條約。

六、關聯本協約未悉之細目。以後由兩國臨機協定。

此議定書。卽一種保護協約。此後朝鮮雖有獨立之名。而內政則容日本干涉。版圖內則聽日本爲臨機處分。重要主權。拋棄無遺。蓋事實上實已承認爲日本之被保護國也。林權助旋又要求朝鮮。將平昔與俄所結之一切條約。宣布廢棄。於是日本朝鮮。遂又成爲攻守同盟。至八月二十二日。更締結保護新條約。規定朝鮮之財政外交。悉歸日本監督。其約如左。

一、韓國政府聘日本政府所推薦之日本人一名爲財政顧問。凡關於財務事宜。悉聽其意見施行。

二、韓國政府聘日本政府所推薦之日本人一名爲外交顧問。凡關於外交事宜。悉聽其意見施行。

三、韓國政府自後與外國締結條約及其他重要外交案件。須先與日本協議。右協約成後。日本卽薦日人目賀田種太郎爲朝鮮財政顧問。薦美人齊思文爲朝鮮外交顧問。同時締結契約。凡關於財政外交。皆須得其同意。方能施行。此外教育、警察、礦山亦無不以日本人爲顧問。其郵局事務且盡委日本人辦理。尤日本對於朝鮮扶植勢力之所在。厥後戰局告終。日勝俄敗。樸資茅斯條約。規定日本對於朝鮮。有政事上、軍事上、經濟上之卓絕利益。並承認日本對於朝鮮。有指導、監督、保護之必要處分權利。於是伊藤博文遂以統監名義。盡握朝鮮一切實權。不轉瞬間。日韓合併之議以起。數千年箕子遺墟。遂爲東海狂流捲盡矣噫。

#### 第四節 日俄交戰

日俄戰事既開。平壤爲朝鮮形勝之地。若被敵軍占領。則全局已爲其所制。故日

軍第十二師團由仁川上陸後。卽急向平壤進發。三月十一日。全師悉抵平壤。遂占領之。旋於二十八日。破俄軍於定州。時日軍近衛師團與第二師團乘俄艦鰲伏旅順港內之際。已由海路安抵朝鮮。由鎮南浦上陸。四月三日。集於平壤。與第十二團合爲一軍。大將黑木維植令全軍對鴨綠江作陣。四月二十九日。令工兵隊於鴨綠江架橋。工兵冒彈前進。自正午起。至翌日午前三時。軍橋完成。日本評戰績以工兵爲首日軍次第渡江。時俄軍張左翼至水口鎮。東北伸右翼至安東縣西南。而其主力則集於九連城。日軍以五月一日向九連城爲總攻擊。第二師團攻破九連城正面之俄軍。占領擢鉢山。近衛師團攻破俄軍右翼。奪腰溝、馬溝、榆樹溝、諸壘。第十二師團攻破石城之俄軍。九連城全陷。是役爲日俄陸軍第一次會戰。分勝敗之數。全軍士氣所關。今以難攻易守之九連。一戰而爲日有。遂乘勢向遼陽進發。

日本大本營作戰計畫之重要點。一以雄師直逼關東州。一以黃海日本海之海

上權歸其掌握。欲達此目的。非將旅順口閉塞。使俄艦不能出港。則不易收功。遂於二月二十四日午前三時。爲第一次閉塞。先由司令長官東鄉平八郎中將。編制閉塞艦五艘。招集決死將卒七十七名。應募者二千人。屆時向旅順口進發。俄軍瞭見日艦進襲。以探海燈照射閉塞艦上。將卒目眩。不能前進。又以俄兵由礮臺猛放彈丸。遂不達目的而止。三月二十七日。爲第二次閉塞。閉塞艦四艘。決死將卒六十五人。以是日午前三時突進距港口二哩許。俄軍始以探海燈照見日艦。開礮射擊。閉塞艦冒彈并進。達目的地後。卽爆沈之。然港口水滿時。有三十二尺之深。爆沈之閉塞艦。仍未足以阻鐵甲艦之出入。乃再決行第三次閉塞。閉塞艦十二艘。決死隊應募者達二萬人。於五月三日午前三四時向港口進發。雖僅有閉塞艦五艘入港爆沈。然自是以後。巡洋艦以上之船。均不能通航。俄軍遂困守港內矣。

日軍於旅順口既達閉塞之目的。大將奧保鞏。乃以第一、第三、第四各師團組成

第二軍於五月五日由海軍送至貔子窩上陸。即攻破附近駐屯之俄軍。同月十四日第一師團進攻金州城。第四師團之一部爲後援。又以第三師團與第四師團、阌貔子窩、普蘭店之間。藉防俄軍從遼陽南下。第一師團於十六日占據老虎山一帶天險。二十六日轉戰至金州城下。工兵隊用棉火藥炸裂金州東南二城門。金州遂陷。日軍乘勝進攻南山。復得金州灣海軍援助。南山亦下。尋占領南關嶺、柳樹屯、青泥窪等處。並封鎖金州半島。

俄大將苦魯巴金作戰計畫。將集大軍於遼陽、奉天附近。以與日軍決一大野戰。故於日軍由貔子窩上陸、攻陷南山之時。不即南下夾擊。然日軍第二軍於攻破南山後。除以第一師團留守金州外。即率新加入之第五師團與騎兵第一師團疾馳而北。六月十五日乘俄軍尙未大集之時。即破之於得利寺。因是而俄軍南下之計畫全被阻止。旅順亦絕救援之望。日軍乃木大將又以第一、第九、第十各師團組成第三軍。於六月二十六日占領歪頭山及劍山。直迫旅順方面。迨七月

二十三日第三軍進逼之地。僅距旅順市街二里。旅順俄軍不得已。退伏於本軍防禦線之內。

潛伏旅順口內之俄艦。以日軍海陸兩方愈逼愈緊。外援又已絕望。遂圖逃出旅順。以免坐斃。八月十八日黎明。俄艦十八艘依次出港。向南疾駛。旋被日本聯合艦隊包圍猛擊。激戰數時。俄艦力不能支。大半遁回旅順。餘艦則分遁膠州灣、芝罘、上海、庫頁島（即樺太）等處。初海參崴俄艦之一部。以四月二十五日擊沈日艦金州丸於新浦沖。六月十五日又擊沈日艦和永丸、常陸丸於對馬海峽。八月十四日。日本上村將所率艦隊。偶與海參崴俄艦相遇於蔚山沖。即開礮猛擊。沈其一艘。毀其三艘。自經此役。海參崴殘艦亦屏息不復出矣。於是俄國之極東海軍。力因以破碎。海上權悉爲日本所有。日本於戰局上遂得莫大便利。

日本第一軍自鴨綠江戰捷之後。由九連城畧鳳凰城。寬甸。賽馬集。諸處。七月十七日與俄軍激戰於摩天嶺。十九日占領細河沿。八月一日又與俄軍激戰於榆

樹林子及本溪湖附近。其第二軍則沿南滿洲鐵道北進。六月二十一日略熊岳城。七月九日略蓋平。旋破苦魯巴金之軍於大石橋。長驅而至營口。即占領之。八月三日又占領海城、牛莊二處。第四軍日本於第二軍自魏子窩上陸後另遣河使謀第一軍與第二軍之聯絡後則於六月八日占岫巖。二十七日占領分水嶺。即為第四軍野津大將統率之。七月十三日占領析木城。各軍所向皆捷。惟遼陽方面為俄軍集中之點。非合力以攻陷之。則勝敗之數仍未可知。且不能絕旅順之救援。至此日軍總司令官大山巖率參謀總長兒玉大將以下。移總司令部於滿洲。親揮各軍。進略遼陽。旋依兒玉作戰計畫。以第一軍為右翼軍。出遼陽之東北。以第二軍為中央軍。出遼陽之正面。以第四軍為左翼軍。出遼陽之西面。右翼軍自八月二十五至二十七日。由遼陽東南至紅沙嶺。轉戰至弓張嶺附近。又自九月一日至四日。進擊遼陽北面。破黑英台之俄軍。遂占領之。左翼軍自八月二十七至九月一日。與俄軍激戰於首山堡、方家屯、新立屯。各方面俄軍敗退。為日軍追殺無算。四日。遂占領遼陽。

車站中央軍自八月二十七日起迭破遼陽西南甘泉堡鞍山站新立屯等處之俄兵。復於九月四日攻破遼陽。遂占領之。計是役也。日軍苦戰一旬。死傷共一萬七千五百餘人。爲鴨綠江一役後第二次之大戰鬪也。

俄軍自遼陽戰敗後。苦魯巴金奉俄皇嚴諭。恢復遼陽以救旅順之急。時俄國本部之精銳大軍亦已陸續集奉天。約達九師團以上。苦魯巴金遂以全軍分爲中央隊、左縱隊、右縱隊及總預備隊。南下進擊。日軍探聞俄軍南進。仍分左翼、右翼、中央、三軍。禦之於沙河附近。十月七日至十八日之十二日間。兩軍爲猛烈之戰爭。而以馬耳山、黃山、歪頭山、三塊石山、林盛堡數處之戰爲尤劇。計日軍死傷將校一萬五千九百餘人。俄軍死一萬三千三百人。被虜七百人。俄軍旋敗退北岸。旅順救援之目的至此全歸水泡。

日將乃木所率之第三軍專攻旅順。業已逼近目的地。乃以八月下旬行第一次總攻擊。十月十九日行第二次總攻擊。二十六日行第三次總攻擊。無如旅順俄



軍素著勇毅之名。武器亦甚精良。況又據此天險。作困獸之奮鬪。以故日軍雖得進逼防線之內。而屢受猛烈之礮彈。死傷過多。兵力漸薄。已不克再接再厲。迨十一月二十六日。得新加入之第七師團。兵氣遂爲之一振。十二月五日。日軍肉薄猛撲。得占領二〇三之高地。由此俯擊旅順俄艦。如弋池中之鷗。同時日艦隊又礮擊港內。十四十五兩日日水雷隊殲滅。港外餘艦。十八日日軍占領東雞冠山。二十八日占領二龍山。三十一日占領松樹山。翌年一月一日占領望臺。卽攻擊旅順背面礮臺。至此旅順俄軍已無施展之餘地。俄總司令官斯德色爾將軍不得已。於是日遣使至日軍乞降。乃木允之。一月二日兩軍委員會議。旅順開城條約。將校八百七十八人。兵卒二萬三千四百九十一人。悉爲俘虜。堡壘礮臺五十九所。及兵器彈藥車輛船艦。亦作爲戰利品。東洋第一天險。又爲日軍所有矣。自戰事開始以迄今日。日軍屢戰皆捷。幾於所向無敵。然精壯軍士多被損傷。國中現役預備兵。悉已召集。後備兵年限延長至十二年。以爲兵力之補充。更募集

國民兵。其窮迫之境。亦可想見。迨沙河會戰。旅順陷落。後因天氣酷寒。不得不休養兵力。再於翌年決一大戰。乃翌年一月。俄將斯密狄哥。忽率新到騎兵團。直犯遼西中立地。襲擊牛莊營口。實出日人意外。一時日軍大爲狼狽。尋俄將克里伯爾克。又率大兵八萬五千。大礮二百五十門。渡渾河。一月二十五日。襲日右軍於黑溝臺。日軍倉皇敗退。幸得第二、第三各師團之援。始於一月二十九日。擊退俄兵於渾河右岸。當時日軍兵力甚少。如俄軍用全力攻擊。則遼陽方面之勝負。洵未知誰屬也。乃俄軍計不出此。日軍遂自信爲天祐云。

二月間。兩國援軍大集。計俄國在滿洲兵力。步兵三十八萬八千人。騎兵二萬六千七百人。礮兵三萬四千人。大礮一千三百六十門。以第三軍陣中央。第二軍陣左翼。第一軍陣後方。第四軍爲總豫備隊。日本兵力。步兵二十萬人。礮騎工輜重等兵十五萬人。大礮一千一百門。以第四軍陣中央。野津第一軍陣右翼。黑木鴨綠江軍陣最右翼。河村第二軍陣中央。部隊之左翼。奧第三軍陣最

左翼（乃木）大山巖爲總司令官。戰線互四十餘里。兩軍總數達八十五萬。大戰二千五百。蓋開戰以來之第一大戰鬪也。大山巖與參謀總長兒玉爲牽制俄軍計。命鴨綠江軍先發。以二月十九日由城廠北進。轉戰靖河城。救兵臺。馬羣丹等處。旋迫撫順。三月十日陷之。遂向奉天後面進攻。苦魯巴金誤認日軍主力向此方面轉進。命總豫備隊亦由此方面進禦。此間日本第一軍以二十四日渡沙河。謀與鴨綠江軍聯絡。第四軍以二十七日開戰。第二軍亦同時前進奮戰。俄軍強硬對抗。激戰至一旬之久。勝負未決。而日本第三軍由渾河遼河間迂繞北進。兼程鼓行。三月一日即達新民屯。更西轉出俄軍之後方。八日破壞奉天以北鐵道。斷俄軍退路。時俄軍探知己軍已陷入包圍中。乃力扼日本第三軍之進路。然日軍在各路猛厲進擊。俄軍披靡。苦魯巴金不得已。命總軍退卻。日本第四軍即以九日渡渾河。旋占領奉天北方之魚鱗堡。第二軍又出奉天西方。追擊敗兵。於三月十日與第四軍之一部會合。協力鏖戰。遂占領奉天。是役日軍死傷四萬一千。

二百名。俄軍死者二萬八千名。被虜者四萬名以上。亦可見戰鬪之劇烈矣。俄軍敗退後。日本亦以兵力缺乏。未能進追。至十二日始進達奉天北十里之地。苦魯巴金因戰敗辭職。大將李尼維齊代之。以恢復敗軍秩序。不遑作戰。日軍又乘機占領鐵嶺、開原、昌圖等處。

俄國海軍在東方者。有旅順海參崴之艦隊。在西方者。有波羅的海之艦隊。當海參崴艦隊破滅之後。又值旅順圍急。俄國在極東之海上權。已一敗塗地。乃決計以波羅的艦隊組織第二太平洋艦隊。以羅哲斯德威斯克中將爲司令長官。於一九〇四年九月十一日由波羅的海出發。俄政府又要求土耳其政府。設黑海艦隊。通過他大尼里海峽。以與第二太平洋艦隊會合東航。旋經英政府以英日同盟之關係。迫令土耳其嚴重執行閉鎖他大尼里海峽條約。即千八百五十六年之巴黎條約是也。俄政府不得已中止之。及旅順既陷。又以波羅的餘艦組織第三太平洋艦隊。命尼波喀多福少將。於一九〇五年二月十七日率領東行。迨

三月下旬第一太平洋艦隊繞喜望峯。俄艦全部不取道蘇彝士運河者以運紅海峽禦戰且運河規則交戰國之軍艦相會一方出發屆二十四時後他方軍艦始得發航今俄軍艦數十艘若遇此妨害則延期太久故寧繞喜望峯耳集合於法領馬達加斯加島。四月八日過麻刺甲海峽。十四日入法領安南西貢灣。日政府迭向法政府嚴重抗議。俄艦隊遂於四月二十日退出西貢灣。避入漢可而灣。在西貢灣北方約二百七十海里水深而曲僅有自新嘉坡一月一回復往之汽船行走諸外國無通信機關俄艦避此為諸外國船艦視線所不及第三太平洋艦隊於五月五日過麻刺甲海峽。九日與第一太平洋艦隊會合於漢可而灣。法政府因日政府之詰問。屢促俄艦啟碇。俄艦以旅順要塞時已陷落。欲以海參崴為根據。五月中旬遂備載石炭糧食。游弋黃海方面。時日海軍司令官東鄉已預為準備。知俄艦必從對馬島水道東航。乃下令曰。皇國興廢在此。一戰各員須努力奮戰。五月二十七日。俄艦三十八艘。舳艫相望向日本海進發。午後一時過對馬島。日艦即發礮要擊。時俄艦以久處波羅的海內。船員實欠練習。故一經交戰。祇十餘分間。而俄艦已見凌亂。運動遂不一致。於是或沈或沒。

或起火紛如亂麻。日本復於薄暮時以主力艦隊集合於鬱林島附近。三面攻擊。二十八日晨又以日片岡艦隊追俄殘艦。俄司令長官羅哲斯德威斯克中將與尼波喀多福少將遂揭白旗乞降。戰局乃終。是役俄戰鬪艦八艘擊沈者六。捕獲者二。巡洋艦九艘擊沈者四。逃走者五。海防艦三艘擊沈者一。捕獲者二。驅逐艦九艘擊沈者五。捕獲者一。逃走者三。特務船六艘擊沈者四。逃走者二。又捕獲病院船一艘擊沈。假裝巡洋艦一艘。俘虜總數六千一百四十二名。俄國海軍力遂全行殲滅。實特拉法加海戰後（納爾遜滅拿破崙艦隊）之第一大海戰也。先是中日戰爭後。俄國亟亟經營極東之海上權。日本亦即以俄國東洋艦隊與波羅的海艦隊之總勢力爲擴張海軍之標準。至是。日本之計畫遂悉達目的。

#### 第五節 日俄媾和

日本以三島之地戰勝龐大之俄國。不可謂非極大榮譽。然當此之時。精銳傷亡。國內財政尤極困難。轉瞬卽成強弩之末。俄國亦以內亂日亟。大有弗戢自焚之

象二國媾和之機。因茲以啟。六月下旬。美國大總統羅斯福。遂以謀人類幸福。終止戰鬪。由兩國即時直接媾和之意。勸告日俄兩政府。兩政府皆應其勸。其時日本以屢戰屢勝之故。欲以戰勝者之態度。傲睨俄國。勢將要求賠償軍費。與割讓土地。顧俄則以日軍尙未進。俄領一步。其所失者。僅在中國之利益。絕不以戰敗者自居。又媾和意思。不由本國發起。方續調大軍。以示不少屈撓之意。且日本國內之困窮。俄已盡知其真相。日本處此地位。既有不得不和之勢。又不肯因媾和而故予讓步。此實爲談判困難之極點。而未易使雙方合意者也。嗣日政府派小村外相爲首席全權。駐美公使高平爲次席全權。於七月二十五日抵紐約。俄政府派德德爲首席全權。前駐日公使羅棊爲次席全權。於八月二日抵紐約。美大總統介紹兩國全權會合。舉杯祝慶。定樸資茅斯爲會商地。除於正式會見後。互證全權文憑。並先締結休戰條約外。旋由小村提出媾和條件。其重要者。一、俄國承認日本對於朝鮮有卓絕利益。及指導保護監督之處置。二、俄國以一定期間。

撤退滿洲軍隊。又拋棄在滿洲一切利益與權利。三、日本現時占領滿洲全部。皆還付中國。惟遼東租借地域不在此限。四、中國爲發達滿洲工商業利益。兩國互不阻礙。五、庫頁島及附屬島嶼。割讓與日本。六、遼東租借權及關聯之利益。與俄國所建房屋等。均讓與日本。七、哈爾濱以南之鐵道。及材料與炭礦等。無條件讓與日本。八、橫貫滿洲鐵道。限於商工業。爲俄國管有。九、俄國賠償日本軍費。十、逃走中立港之俄國軍艦。作爲捕獲物。交付日本。十一、俄國在極東之海軍力。加限制。十二、日本海等處之俄領沿岸。許日本人民有漁業權。俄德全權接此案後。卽公言曰。俄國雖戰敗。未被征服。割地償金之屈辱。尙無忍受之必要。彼此約日會見。至期俄全權嚴拒割地償金二款。且言因此條件破裂。談判非所避也。小村全權請依提案逐條審議。俄德諾之。遂逐日會議。已議決至十分之六。惟償金及庫頁島之割讓。中立港逃艦之交付。與限制海軍力四條。激論多時。仍未議決。俄德以此四款非戰爭目的之條件。而爲戰爭結果所生之條件。有傷俄國威嚴。絕



對不能承認。俄皇又電訓微德曰：償金一錢不能承認。後經美大總統向雙方互勸讓步。小村即撤回中立港逃艦與限制海軍二條。另立庫頁島北部還付與俄。俄出償金十二億圓之新案。提示微德。微德仍行嚴拒。談判決裂。間不容髮。並備文一件。向聯合通信社發表大要。謂日本以返還庫頁島北部。要求償金十二億圓。名為賣卻。實為補償戰費。此如讓步。不得認日本真正平和。今日之事。在日本單云金錢問題。在俄國則為體面與威信問題。日本不撤此要求。平和斷不成立。於是小村又撤還金錢問題。單要求割讓庫頁全島。仍被微德拒絕。小村不得已。提出最後大讓步案。則僅割庫頁南半島與日本是也。微德始許之。和議遂成。是為樸資茅斯條約。其文如左。

一、日俄兩國皇帝陛下與兩國臣民之間。將來當平和親睦。

二、俄國承認日本對於韓國。有政事上、軍事上、及經濟上之卓絕利益。日本對於韓國。認指導保護及監理之必要處置時。俄國不阻礙。不干涉。但俄國臣

民在韓者。受最惠國臣民之待遇。又兩締約國爲避一切誤解。於俄韓國境。不爲軍事備置。

三、日俄互約左之各事。甲、遼東半島租借權效力以外之滿洲地域。全然同時撤兵。乙、遼東半島租借地域外。現時日俄兩國軍隊占領之滿洲全部。還付中國。全屬中國行政。俄國於滿洲侵害中國之權。及妨礙機會均等主義之領土上利益。又優先及專屬之讓與等權利。概不得有。

四、中國因使滿洲商工業發達。爲各國共通一般之設置時。日俄兩國互不阻礙。

五、俄國以中國政府之承認。將旅順、大連、及附近領地領水之租借權。與關聯租借權。及組成一部之一切權利特權。及讓與。又租借權效力所及地域之一切公共房屋、財產。均讓與日本。但在該地域內俄國臣民之財產權。受安全之尊重。

六、俄國以中國政府之承認。將長春、寬城子旅順間之鐵路。及其支線。並同地方

附屬一切權利特權。及財產與其所一切經營之煤礦。無條件讓與日本。

七、日俄兩國於滿洲各自之鐵道。相約限於爲商工業之目的經營。決不爲軍略上之目的經營。但遼東半島租借地域之鐵道。不在此限。

八、日俄兩國爲增進交通運輸。且使便宜爲目的。使滿洲之鐵道相接續。另訂別約。規定接續業務。

九、俄國將庫頁島北緯五十度以南之半部。及其附近一切島嶼。與該地方內之一切公共房屋財產之主權。完全讓與日本政府。但兩國皆不於該島及附近島嶼之自領內建築堡壘。及其他軍事上之工作。又相約不爲有妨害宗谷海峽。及韃靼海峽。自由航行之軍事上事件。

十、割讓地域之俄民。願賣其不動產退歸本國者。聽其自由。願在舊地域居住者。以服從日本之法律。及管轄權爲條件。受完全之保護。不服從者。日本有

自由放逐之權。但其財產仍受完全尊重。

十一、俄國許日本臣民於日本海、鄂霍次克海、白令海之俄領沿岸。有漁業權。

十二、兩國通商航海條約。以戰爭廢止。茲以戰爭前之約爲標準。從速締結新約。

十三、本條約實施後。兩國從速付還一切俘虜。各將俘虜之死亡數。及供給俘虜費資之實額。提出。兩抵之後。俄國急償還日本供給俘虜之過多額。

十四、本條約經兩國皇帝批准後。於五十日內。日本經法國公使通告俄國政府。俄國經美國公使通告日本政府。自雙方通告後。本約全體有效力。

十五、本約英法文合作二通。有誤解時。以法文爲主。

右媾和案之外。另於附約中。規定兩締約國爲保護滿洲鐵道。於每啟羅米突得置二十五名之守備兵。此條約成立。日俄戰局遂告終。

日本此役。共募國債總額十七億二千萬圓。而樸資茅斯條約。不獲一圓之償金。

公家不無踴躍之嗟。人民亦覺負擔之重。顧論其結果。則以極東島國一躍而列世界一等國之班。駸駸乎將執東亞之牛耳。其報償誠不可謂不大矣。

第六節 日俄媾和後中日締結滿洲善後協約及日本勢力之膨脹

樸資茅斯條約其第三、第四、第五、第六、第七、第八各條皆與中國有絕大關係。善後之方誠不可不從速協定。日政府旋派小村全權來京。與中國全權奕劻、瞿鴻機及軍機今大總統袁公於光緒三十一年十一月二十六日明治三十八年十二月二十日締結中日滿洲善後協約如左。

- 一、中國政府承認日俄媾和條約第五條與第六條俄國讓與日本之各項。
- 二、日本政府承認遵行中俄兩國締結之租借地及築造鐵道諸條約。又如將來生何等案件時隨時與中國政府商釐定。

- 三、本協約以調印之日起施行。限二個月在北京交換批准。
- 又同時結附約十一款。其重要者如左。

一、中國政府。於日俄二國撤退軍隊後開左記之地方爲通商埠。

甲、盛京省之鳳凰城、遼陽、新民屯、鐵嶺、通江子、法庫門。

乙、吉林省之長春、寬城子、吉林、哈爾濱、寧古塔、琿春、三姓。

丙、黑龍江省之齊齊哈爾、海拉爾、愛琿、滿洲里。

二、如俄國允將滿洲鐵道護衛兵撤退。或中俄兩國另商別項辦法。日本之南滿守路兵亦一律照辦。又如滿洲地方平靖。中國能周密保護外人的生命財產時。日本亦可與俄國將護路兵撤退。

三、中國政府允將安東、奉天、間軍用鐵道。仍由日本政府接續經營。改爲專運各國商工貨物鐵道。自此路改良竣工之日起。除運兵歸國十二個月不計外。以二年爲改良竣工之期。以十五年爲限。卽至光緒四十九年止。屆期雙方選請他國評價人一名。安  
定該鐵道各物件價格。售與中國。至該鐵道改良辦法。由日本承辦人與中國特派員妥實商議。所有辦理該路事務。中國政府援照東清鐵道條約。派

員查察經理。

七、中日兩國政府爲增進交通運輸起見。准南滿洲鐵道與中國各鐵道接續聯絡。

八、中國政府允南滿洲鐵道所須各項材料。豁免一切稅捐釐金。

九、營口安東奉天各商埠。由中日兩國派員劃定日本租界。

十、中國政府允設一中日合同材木公司。以採伐鴨綠江右岸之森林。其地區年限。與公司如何設立。及一切共營章程。另訂詳目規定。總期兩國股東均分權利。

十一、滿洲陸路通商。彼此以最惠國之例待遇。

以上中日兩約名義上。爲日本戰勝俄國之結果。代俄國悉有關東州租借地。與東清鐵道所獲之一切利益而止。實則日本所得利益。按諸附約。較昔日俄國所獲者尤極擴張。其最著者。爲安奉鐵道。前因俄國恐日本伸勢力於滿洲。故拒絕。

滿洲朝鮮鐵道之聯絡爲開戰原因之一。然日本欲囊括滿洲萬不可不使滿洲朝鮮鐵道聯絡。故於未開戰之前以此條件爲提出案之一。既開戰以後則乘進軍滿洲。趕築安奉軍用鐵道。以爲他日要求中國之基礎。我外交當局若能窺見其包藏禍心。固不難執樸資茅。斯條約與之力爭。蓋該條約限於俄國所獲中國之權利與利益。讓與日本而止。且尙須經中國政府之承認。若安奉鐵道在俄國所獲利益之外。日本更無要求管理該路之權。縱使路已造成。亦不難由中國備價購回。又何必定十五年有名無實之期限耶。乃計不出此。遂任日本得以聯絡滿洲朝鮮之鐵道。以擴張其勢力。貽滿洲以無窮之憂。豈非外交當局交涉無方之所致乎。

日本至此。不但大雪昔日返還遼東之恥。且其國威之伸張。實有一日千里之勢。如設置關東州都督府。組織南滿洲鐵道株式會社。經營滿洲。着着進行。自光緒三十二年五月以後。關於滿洲方面中日兩國間所發生之採伐鴨綠江森林間。



題。撫順煤鑛問題。新法鐵道問題。安奉鐵道問題。新奉吉長兩鐵道問題。營口支線問題。鴨綠江架橋問題。渤海漁業權問題。中國無一不立於失敗地位。日本復挾其東方之霸權。以與列強相周旋。於是一九〇五年八月有英日新同盟協約之發見。一九〇七年六月有法日協約之發見。一九〇八年十一月有美日照會之發見。一九一〇年七月有俄日協約之發見。蓋日本既一躍而爲東洋大國。遂乘此機會。可以定對於中國之政策。陽爲保全中國之盟主。陰爲分滅中國之先鋒。故諸協約成。而中國之前途。反益危矣。

## 二十年來之中日關係終

